





ԶԱՌԱՇԻՆ


1984

Դ

ՀԳՆ 196



ԽԱ
ՏԱՐԻ




ԷԶՄԻԱԾԻՆ



ՊԱՇՏՈՆԱԿԱՆ
ԱՄՍԱԳԻՐ
ՀԱՅՐԱՊԵՏԱԿԱՆ
ԱԹՈՌՈՒՅ
Ս. ԷԶՄԻԱԾՆԻ

ԿԵՂԻՒ

1984



ՀՐԱՄԱՆԱԻ

Տ. Տ. ՎԱԶԳԵՆԻ ԱՌԱՋՆՈՅ

ՎԵՀԱՓԱՌ ԵՒ ՍՐԲԱԶՆԱԳՈՅՆ ԿԱԹՈՂԻԿՈՍԻ
ԱՄԵՆԱՅՆ ՀԱՅՈՑ



ԱՄԵՆԱՅՆ ՀԱՅՈՑ ԿԱԹՈՂԻԿՈՍ Տ. Տ. ՎԱԶԳԵՆ Ա
ՀԱՅՐԱՊԵՏԻ ԶԱՏԿԱԿԱՆ ՔԱՐՈԶԸ՝ ԱՐՏԱՍԱՆՎԱԾ
ՍՈՒՐԲ ԷԶՄԻԱԾՆԻ ՄԱՅՐ ՏԱԾԱՐՈՒՄ
(22 ապրիլի 1984 թ.)

«Յանուն Հօր եւ Որդւոյ եւ Հոգւոյն Սրբոյ. ամէն»:

«ՔՐԻՍՏՈՍ ՅԱՐԵԱՒ Ի ՄԵՌԵԼՈՑ»:

Սիրելի հավատացյալ ժողովուրդ,

Աշխարհի վրա վերստին գարուն է բացվել ու գարնան հետ ուրախությունը նոր կյանքի վարթոնքի: Այսպես ահա գարուն է աշխարհում և գարուն մեր սրտերում: Եվ ինչպես ամեն գարուն, նո՛ր գարուն է և նո՛ր վարթոնք, այնպես էլ Քրիստոսի Հարության ավետիսը ամեն տարի նոր ավետիս է հանդիսանում:

Մենք՝ մարդիկս, միշտ ու տևապես փոփոխական ենք: Անվերջ հոսող ժամանակը ինչ-որ չափով մեզ կերպարանափոխում է: Երբեմն մոռալվում է մեր ապրելու ուրախությունը, երբեմն նվազում է մեր կյանքի ավյունը, երբեմն հանգում է մեր հույսերի ճրագը, երբեմն ընկնում ենք հոգու ու մարմնի փորձությունների հորձանքի մեջ, ու այսպես՝ կյանքի ալեկոծումների, տագնապների մեջ, որոնում ենք փրկության մի լաստ, մի նոր ստուգություն, մի պայծառ արահետ, նոր եռանդով, նոր լավատեսությամբ վերստին նվիրվելու մեր ապրած կյանքին, մեր ձեռաց գործերին, մեր իղեալներին: Կամենում ենք բոցավառել մեր հույսերի ճրագը, գտնել մեր ինքնությունը և իմաստը մեր գոյության: Կամենում ենք վերանորոգվել, այլակերպվել, դառնալ ավելի աւարատ, ավելի կատարյալ, ավելի բարի ու արդար:

Տխուր պիտի լիներ կյանքը առանց գարնան, առանց հոգեկան նոր լուսաբացի, հետևաբար առանց Քրիստոսի Հարության ավետիսի:

Սիրելի հավատացյալներ, այս գարնան առավոտյան, Սուրբ Էջմիածնի բարձունքից, այս խոհերով ձեզ բոլորիդ բերում եմ աշխարհաստան այս մեծ ավետիսը:

Հիսուս՝ Որդին Աստուծո, իջավ աշխարհ, եղավ մարդ, ապրեց, գործեց ու տառապեց: Նա մարդացավ, որպեսզի երկրի վրա ապրի փորձառությունը մարդկային, որպեսզի ըմպի դառնության բաժակը մարդկային ողբերգությանց, ունենալով մի նպատակ. այն է՝ օգնության ձեռք երկարել մարդկության և բաց անել նրա առաջ փրկության մի ճանապարհ, ճանապարհը մեղքերից ազատ մի կյանքի, ճանապարհը արդար ու խաղաղ մի կյանքի:

Հիսուս՝ մարդացյալն Աստված, երկրի վրա բաժանեց տառապալի ճակատագիրը մարդկանց, ենթարկվեց մարմնի ու հոգու չարչարանքների, խոնարհությամբ իր վրա վերցրեց ողջ մարդկության մեղքի ու չարիքի դարավոր ծանրությունը, մահն իսկ ճաշակեց խաչափայտի վրա ու գերեզման իջավ ծանր քարի տակ:

Կատարվեց սակայն հրաշքը մեծագույն: Երեք օր հետո նրա գերեզմանը դատարկ գտնվեց: Յուդաբեր կանանց, հրեշտակը ավետեց՝ «Զի՛ խնդրեք վկենդանին ընդ մեռեալս: Չէ աստ, այլ յարեալ» (Ղուկ. ԻԴ 6): Հիսուս, իբրև Աստված, քանդել էր կնիքը բնության օրինաչափության և մեռելներից հարույրուն էր առել ու բարձրացել դեպի անհունը երկնքի:

Հիսուսի Հարությունը խորհրդանշել է չարիքի ու մեղքի կապանքների քանդման, ստուգությունը բարվո ուժերի հաղթության, ճանապարհը հոգու փրկության:

Այսպես է, որ փրկության մի լաստ որոնող մեր ծարավի հոգիները, ամեն տարի նոր հույսերով, նոր սպասումներով, նոր լավատեսությամբ մանկացած սրտերով, դիմավորում են Քրիստոսի Հարության ավետիսը, Հարության շնորհներով թոթափելու համար իրենց տկարությունները, գտնելու իրենց իսկությունը, իրենց կյանքի արդար ուղին: Հարության ավետիսը երկնքի պատասխանն է մեր բարոյական խղճի վարթոնքի ու հրավերը՝ քանդելու մեր կյանքի չարիքի ու մեղքի շղթան և դառնալու նոր մարդ, բարի գործերով արդարացյալ մեր հոգիների փրկության հույսը ծրարած մեր սրտերում:

Լսենք մեծ առաքայլի պատգամը՝ «Զի մեղքի թոշակը մահ է, այլ Աստուծոյ շնորհները յալիտենական կեանք ի Քրիստոս Յիսուս Տէր մեր» (Հռոմ. 2 23):

Դուք, հարազատ զավակներ առաքելական մեր Մայր Եկեղեցու, զատկական սրբազան այս ժամին, երբ հավաքվել էք հուսացյալ սրտերով Փրկչի Իջման բազմադարյան այս սուրբ տաճարի կամարների ներքև, բաց արեք ձեր սրտերը և հաղորդվեցեք Աստվածորդու հրաշալի Հարության խորհրդով, և հոգով ու մարմնով վերանորոգված, ուխտ կատարեցեք, նվիրական խոստում տվեք՝ անսայթաք ընթանալու ավետարանական կենարար պատգամների ուղիով, հեռու պահելու ձեզ անմաքուր փորձություններից, լինելու ավելի ու ավելի կատարյալ, մաքուր ու պարտաճանաչ ձեր ընտանեկան կյանքում, ձեր աշխատանքի վայրում, ձեր ընկերային համայնական կյանքում, լինելու նաև կարգապահ, շինարար քաղաքացիները ձեր հայրենիքի:

Աղոթեցեք նաև, որ սուրբ Հարության շնորհներով առավել աճեն ու ամրապնդվեն մարդկային աշխարհում՝ խաղաղ գոյակցությունը ապգությունների և արդար հարաբերությունները պետությունների միջև, որպեսզի անցյալում բազում անգամներ արյունով ներկված մեր երկրագունդը այլևս երբեք, երբեք չտեսնի սև ուրվականը պատերազմի, որպեսզի այլևս ոչ մի պետություն չհա-

մարձակվի լինել ավերակների ճարտարապետ, որպեսզի փլատակների ու դիակների տակ չխեղդվեն երգն ու ծաղիկը աշխարհի:

Այո՛, աղոթք արարեք, որ Քրիստոսի Հարության շնորհներով, սիրո և խաղաղության ոգին լուսավորի սրտերն ու ձեռաց գործերը մեր օրերի պետությանց ղեկավարների, որպեսզի իսպառ խորտակվեն բոլոր վենքերը պատերազմի, և խաղաղության սպիտակ աղավնին ապատ ու անվտանգ սավառնի աշխարհից աշխարհ:

Մարդասիրության ու խաղաղության ոգու ամրապնդումը ավելի քան անհրաժեշտ է մեր օրերում: Պատերազմները դժվար թե վերանան, ինչքան ժամանակ աշխարհում տիրական են ագահությունը, շահագործումը և տիրապետելու մարմաջը, մինչ վիճարանները լիքն են ատոմական ռումբերով: Մարդկանց և ժողովուրդների միջև կայուն բարեկամության և շինարար գործակցության մթնոլորտի ստեղծումը, այսօր նույնքան հրամայական է, ինչքան վիճաբանությունը:


Այսպես է, որ նաև դարեր ու դարեր ահարկու ողբերգություններ ապրած ու 1915-ի Եղեռնը տեսած մեր ժողովուրդը, այսօր փրկության ու վերածնունդի փնին հասած, պիտի շարունակի իր վերելքն ու ծաղկումը մայր հողի վրա, սուրբգրական Արարատի ստորոտին, ի մխիթարություն համայն հայ ժողովրդի: Ստոված մի արասցե, բանաստեղծի խոսքերով ասած, որ «վերստին կանգնենք մեր ժանիքավոր ճակատագրի առաջ ճակատ առ ճակատ»:

Մեզ՝ հավատացյալներին համար, մարդասիրության ու խաղաղության ոգու մարմնացումն է Փրկիչը մեր Քրիստոս, իսկ նրա Հարությունը՝ գերագույն ստուգությունը այդ ոգու հաղթության: «Ձի ոչ է արքայութիւն Աստուծոյ կերակուր և ըմպելի, այլ արդարութիւն և խնդութիւն և խաղաղութիւն ի Հոգին սուրբ» (Հռոմ. ԺԲ 17):

Թող աշխարհի ու ողջ մարդկության երկնականմարի վրա հավետ շողա լույսը Քրիստոսի, լույսը արդարության Արեգակի և խաղաղության Իշխանի:

Փառք Հարության Փրկչին մեր Հիսուսի Քրիստոսի, այժմ և հավիտյանս. ամեն:





ՓՐԿԶԻ ՀՐԱՇԱՓԱՌ ՍՈՒՐԲ ՀԱՐՈՒԹՅԱՆ ՏՈՆԻ
ԱՌԹԻՎ ԱՄԵՆԱՅՆ ՀԱՅՈՑ ԾԱՅՐԱԳՈՒՅՆ
ՊԱՏՐԻԱՐԲ ԵՎ ԿԱԹՈՂԻԿՈՍ, ՆՈՐԻՆ ՍՈՒՐԲ
ՕԾՈՒԹՅՈՒՆ Տ. Տ. ՎԱԶԳԵՆ Ա ՀԱՅՐԱՊԵՏԻ ԵՎ
ՔՈՒՅՐ ԵԿԵՂԵՑԻՆԵՐԻ ՀՈԳԵՎՈՐ ՊԵՏԵՐԻ ՄԻԶԵՎ
ՓՈԽԱՆԱԿՎԱԾ ՈՂՋՈՒՅՆԻ ՀԵՌԱԳՐԵՐՆ ՈՒ
ԳՐՈՒԹՅՈՒՆՆԵՐԸ

Հռոմեական Կաթողիկ եկեղեցու Քահանայապետ, Նորին Սրբություն
ՀՈՎՀԱՆՆԵՍ-ՊՈՂՈՍ Բ ՊԱՊԻՆ (Հռոմ),
Կոստանդնուպոլսի հունաց Տիեզերական Պատրիարք, Նորին Սրբություն
ԴԵՄԵՏՐԻՈՍԻՆ (Ստամբուլ),
Մոսկվայի և համայն Ռուսաստանի Պատրիարք, Նորին Սրբություն
ՊԻՄԵՆԻՆ (Մոսկվա),
Ալեքսանդրիայի և համայն Աֆրիկայի Հունաց Ուղղափառ եկեղեցու
Պատրիարք, Նորին Սրբություն ՆԻԿՈՂԱՅՈՍ Զ-ԻՆ (Ալեքսանդրիա),
Երուսաղեմի Հունաց Ուղղափառ եկեղեցու Պատրիարք, Նորին Սրբություն
ԴԻՈԴՈՐՈՍԻՆ (Երուսաղեմ),
Ղազի Ուղղափառ եկեղեցու Պատրիարք, Նորին Սրբություն
ԱՄԲԱ ՇԸՆՈՒԴԱ Ե-ԻՆ (Կահիրե),
Համայն Եթովպիայի Պատրիարք, Նորին Սրբություն
ԱԲԲԱ ԹԵՔԼԵ ՀԱՅՄԱՆՈԹԻՆ (Ադիս Աբեբա),
Հնդկաստանի և Արևելքի Մալաբար եկեղեցու կաթողիկոս, Նորին Սրբություն
ԲԱՍԻԼԻՈՍ ՄԱՐ ԹՈՄԱ ՄԱՏԹԵՈՍ Ա-ԻՆ (Քոթայամ),
Համայն Վրաց Պատրիարք-կաթողիկոս, Նորին Սրբություն
ԻԼԻԱ Բ-ԻՆ (Թբիլիսի),
Ռումին Օրթոդոքս եկեղեցու Պատրիարք, Նորին Սրբություն
ԺՈՒՍՏԻՆԻՆ (Բուխարեստ),
Բուլղար Օրթոդոքս եկեղեցու Պատրիարք, Նորին Սրբություն
ՄԱՔՍԻՄԻՆ (Սոֆիա),
Անտիոքի Ասորի Ուղղափառ եկեղեցու Պատրիարք, Նորին Սրբություն
ԻԳՆԱՍԻՈՍ ԶԱՔԶԱ Ա ԻՎԱՍԻՆ (Դամասկոս),
Անտիոքի և համայն Արևելքի Հույն Կաթողիկ եկեղեցու Պատրիարք, Նորին
Սրբություն ՄԱՔՍԻՄՈՍ Ե ՀԱՔԻՄԻՆ (Դամասկոս),

Անտիոքի Ասորի Կաթողիկ Եկեղեցու Պատրիարք, Նորին Սրբություն
ԻԳՆԱՏԻՈՍ ԱՆՏՈՒԱՆ ՀԱՅԵՔ ԲԻՆ (Բեյրութ),
Անտիոքի և համայն Արևելքի Հույն Օրթոդոքս Եկեղեցու Պատրիարք,
Նորին Սրբություն ԻԳՆԱՏԻՈՍ ԴԻՆ (Դամասկոս)
Քենթրբերիի Արքեպիսկոպոս, համայն Անգլիայի Եպիսկոպոսապետ և
միտրոպոլիտ, Նորին Գերաշնորհություն ՌՈԲԵՐՏ ՌԸՆՍԻՐՆ (Լոնդոն),
Աթենքի և համայն Հելլադայի Արքեպիսկոպոս, Նորին Գերաշնորհություն
ՍԵՐԱՖԻՄԻՆ (Աթենք),
Սերբիայի և համայն Հարավսլավիայի Պատրիարք, Նորին Սրբություն
ԳԵՐՄԱՆԻՆ (Բելգրադ),
Վարչավայի և համայն Լեհաստանի միտրոպոլիտ, Նորին
Գերաշնորհություն ՎԱՍԻԼԻՆ (Վարչավա),
Պրագայի և համայն Չեխոսլովակիայի միտրոպոլիտ, Նորին
Գերաշնորհություն ԴՈՐՈՖԵՅԻՆ (Պրագա),
Կիպրոսի Արքեպիսկոպոս, Նորին Գերաշնորհություն
ԽՐԻՍՏՈՍՏՈՄՈՍԻՆ (Նիկոպոլիս),
Անտիոքի Մարոնիտ Պատրիարք, Նորին Ամենապատվություն
ԱՆՏՈՒԱՆ ՊԻԵՐ ԽՈՐԵՇԻՆ (Կերկե),
Մարսելի Արքեպիսկոպոս, Նորին Ամենապատվություն կարդինալ
ՌՈԺԵ ԷՉԵԳԱՐԱՅԻՆ (Մարսել),
Վիեննայի Արքեպիսկոպոս, Նորին Ամենապատվություն կարդինալ
ՖՐԱՆՅ ՔՅՈՆԻԳԻՆ (Վիեննա),
Քրիստոնեական Միության Քարտուղարության նախագահ, Նորին
Ամենապատվություն կարդինալ
Ժ. Գ. Մ. ՎԻԼԼԵԲՐԱՆԴՍԻՆ (Վատիկան),
Փարիզի Արքեպիսկոպոս, Նորին Ամենապատվություն
ԺԱՆ ՄԱՐԻ ԼՅՈՒՍՏԻԺԵՆ (Փարիզ),
Լատվիական ՍՍՀ Ավետարանական-Լուսերական Եկեղեցու Արքեպիսկոպոս,
Նորին Գերազանցություն ՅԱՆԻՍ ՄԱՏՈՒԼԻՍԻՆ (Ռիգա),
Էստոնական ՍՍՀ Ավետարանական-Լուսերական Եկեղեցու Արքեպիսկոպոս,
Նորին Գերազանցություն ԷԴԳԱՐ ԽԱՐՔԻՆ (Տալլին),
Ֆրանչիսկյան միաբանության կուստոդ
ԻԳՆԱՏԻՈՍ ՄԱՆՉԻՆԻՆ (Երուսաղեմ),
Խաղաղության Քրիստոնեական Կոնֆերանսի նախագահ,
Նորին Սրբապետություն ՔԱՐՈԼԻ ՏՈԹԻՆ (Պրագա),
Եկեղեցիների Համաշխարհային Խորհրդի ընդհանուր քարտուղար
դոկտ. ՖԻԼԻՊ ՓՈԹԸՐԻՆ (Ժնև),
Միխթարյան ուխտի Աբբահայր, Գերապայծառ Հայր
ՀՈՎՀԱՆՆԵՍ վարդապետ ԴԵՐՉԱԿՅԱՆԻՆ (Վենետիկ),
Միխթարյան ուխտի Աբբահայր, Գերապայծառ Հայր
ԳՐԻԳՈՐԻՍ վարդապետ ՄԱՆՅԱՆԻՆ (Վիեննա),
Քրիստոսի սուրբ Հարության ավետիսը լուսավորում է մարդկային աշխարհը
և պայծառացնում մեր բոլորիս հոյսը, մեծ հոյսը՝ ձերբազատվելու մեղքի
ու մահվան կապանքներից, մեծ հոյսը՝ մեր հոգիների փրկության:
Ձի «Քրիստոս յարեալ ի մեռելոց, մահուամբ զմահ կոխեաց և Յարու-
թեամբն իրով մեզ զկեանս պարգևեաց»:
Այս մեծ ավետիսով ողջունում ենք Ձերդ Սրբությունը և հղում Մեր սըր-
տաբովս բարի մաղթանքը, որ հարուցյալ Փրկչի շնորհներով լուսավորված՝

Չեզ հատուկ հոգևոր հեղինակությամբ շարունակեք Ձեր նվիրական առաքելությունը պտղառատ արդյունքներով, ի պայծառություն ձեր պատմական մեծ Եկեղեցու և համրապնդումն քրիստոնեական եղբայրության համայն աշխարհում:

Սուրբ Հարության ջնորհներով նաև թող առավել աճի սերը և բարի կամեցողությունը մարդկանց ու ազգությունների միջև և խաղաղ գործակցությունը պետությունների:

«Ամենայն ինչ ձեր սիրով լինիցի» (Ա Կորնթ. ԺԶ 15): «Քանպի ամենեփն որդիք Աստուծոյ էք՝ հաւատովք ի Յիսուս Քրիստոս» (Գաղատ. Գ 26), ամեն:

Եղբայրական հարգալից սիրով՝

Վ Ա Ջ Գ Ե Ն Ա


ԾԱՅՐԱԳՈՒՅՆ ՊԱՏՐԻԱՐԷ ԵՎ ԿԱԹՈՂԻԿՈՍ
ԱՍԵՆԱՅՆ ՀԱՅՈՑ

Ա. Էջմիածին

*
* *

Ի պատասխան Ամենայն Հայոց Վեհափառ Հայրապետի՝ Փրկչի հրաշափառ Սուրբ Հարության ջնորհավորական գրությունների, ստացվել են քույր Եկեղեցիների հոգևոր պետերի և կրոնական այլ համայնքների ու կապմակերպությունների ղեկավարների կողմից այդ առթիվ ուղարկված ջերմագին ջնորհավորական հեռագրեր ու գրություններ, որոնցում մի անգամ ևս պայծառորեն արտահայտվում է քրիստոնեական սիրո, եղբայրության ու համագործակցության ոգին քույր Եկեղեցիների ու կրոնական այլ համայնքների և կապմակերպությունների միջև:

Հանուն Հայոց Հայրապետի ջերմ ջնորհակալություն ենք հայտնում ստացված պատասխան ջնորհավորականների համար:





ԱՄԵՆԱՅՆ ՀԱՅՈՑ ՎԵՀԱՓԱՌ ՀԱՅՐԱՊԵՏԻ
ՇՆՈՐՀԱՎՈՐԱԿԱՆ ԳԻՐԸ ՓՐԿՉԻ ՀՐԱՇԱՓԱՌ ՍՈՒՐԲ
ՀԱՐՈՒԹՅԱՆ ՏՈՆԻ ԱՌԹԻՎ՝
ՈՒՂՂՎԱԾ ՀԱՅԱՍՏԱՆՅԱՅՑ ԵԿԵՂԵՑՈՒ ՆՎԻՐԱՊԵՏԱԿԱՆ
ԵՐԵՔ ԱԹՈՈՆԵՐԻՆ, ԹԵՄԱԿԱԼ ԲՈԼՈՐ ԱՌԱՋՆՈՐԴՆԵՐԻՆ
ԵՎ ԵԿԵՂԵՑԱԿԱՆ ՀԱՄԱՅՆՔՆԵՐԻՆ

Քրիստոսի սուրբ Հարության ավետիսը վերստին լուսավորում է մարդկային աշխարհը և պայծառացնում մեր բոլորիս հույսը, մեծ հույսը՝ ձերբազատվելու մեղքի ու մահվան կապանքներից, մեծ հույսը մեր հոգիների փրկության:

Ձի «Քրիստոս յարեալ ի մեռելոց, մահուամբ զմահ կոխեաց և յարութեամբն իրով մեզ զկեանս պարգևեաց»:

Մայր Աթոռ Սուրբ Էջմիածնից, այս լույս ավետիսով ողջունում ենք Ձերոյ Սրբապետությանը և հղում Մեր օրհնանքը թեմիդ եկեղեցյաց ոխտապահ հոգևոր սպասավորներին, թեմական և համայնքային վարչությանց, տիկնանց և երիտասարդաց հանձնախմբերի և դպրաց դասերի եկեղեցաշեն անդամներին և համայն մեր հավատացյալ զավակաց, ջերմագին մաղթանքով, որ բոլորը ձեռք-ձեռքի տված, Ձերոյ Սրբապետության հովանու ներքո սիրով միաբանած՝ համերաշխորեն գործեն հառավել շինություն և ծաղկումն թեմիդ հոգևոր, կրթական և մշակութային կյանքի:

Նաև սուրբ Հարության շնորհներով թող առավել աճի սերը և բարի կամեցողությունը մարդկանց ու ազգությունների միջև և խաղաղ գործակցությունը պետությունների:

«Ամենայն ինչ ձեր սիրով լինիցի» (Ա Կորնթ. ԺԶ 15): «Քանզի ամենեքին որդիք Աստուծոյ էք՝ հաւատովք ի Յիսուս Քրիստոս» (Գաղատ. Գ 26). ամեն:

Վ Ա Ձ Գ Ե Ն Ա
ԾԱՅՐԱԳՈՒՅՆ ՊԱՏՐԻԱՐԺ ԵՎ ԿԱԹՈՂԻԿՈՍ
ԱՄԵՆԱՅՆ ՀԱՅՈՑ



ԵՏՐԱԳՐԱԿԱՆ

ՔՐԻՍՏՈՍԻ ՀՐԱՇԱՓԱՌ ՀԱՐՈՒԹՅՈՒՆԸ

Ամեն տարի Հայաստանյայց Եկեղեցին, ինչպես նաև բովանդակ քրիստոնեական աշխարհը, յուրահատուկ ջուրով և հանդիսավորությամբ է նշում Քրիստոսի հրաշափառ Հարության տոնը՝ որպես կյանքի և լույսի հավերժական ավետիս, որպես բարու և գեղեցիկի հաղթանակի խորհրդանիշ։ Քրիստոնեական Եկեղեցու նվիրական կամարների տակ վերստին հնչում են Փրկչի հրաշափառ և սուրբ Հարությանը նվիրված շարականները, օրհներգություններն ու ալելուիաները.

**«Այսօր յարեաւ ի մեռելոց
Փեսայն անմահ և երկնատը.
Քեզ անետիք խնդութեան,
Հարսն ի յերկրէ եկեղեցի»** (Շարական) :

Քրիստոսի հրաշափառ Հարությունը, որպես հոգևոր պարթոնքի խորհրդանիշ, տոնախմբվում է գարնանը, երբ ծաղկում, գեղեցկանում, կարծեք հարություն է առնում նաև բնությունը։ Եվ պատահական չէ, երբ Հայոց Հայրապետը իր այս տարվա վատկական քարոզը սկսում է այսպես.

«Սիրելի հավատացյալ ժողովուրդ,

Աշխարհի վրա վերստին գարուն է բացվել ու գարնան հետ ուրախությունը նոր կյանքի պարթոնքի։ Այսպես ահա գարուն է աշխարհում և գարուն մեր սրտերում։ Եվ ինչպես ամեն գարուն նոր գարուն է և նոր պարթոնք, այնպես էլ Քրիստոսի Հարության ավետիսը ամեն տարի նոր ավետիս է հանդիսանում։

Այո, Եկեղեցին գեղեցկորեն ներդաշնակել է բնության վերապարթոնքը հոգեկան կյանքի ուժերի վերապարթոնքի հետ։

Նորից մարդկային մտածումներն ու զգացումները թևածում են դեպի հեռավոր անցյալը, երբ փշրվեցին մահվան շղթաները, և մարդկությունը լուսավորվեց լույսովը Քրիստոսի հրաշափառ Հարության։ Քրիստոսի թափուր գերեզմանը մարդկային հոգում նորից բոցավառում է փրկության, հոգևոր ապատության և բարոյական վերածննդյան ավետիսը։ **«Քրիստոսի Հարությունը, — ասում է Վեհափառ Հայրապետը, — խորհրդանիշն է չարիքի ու մեղքի կապանքների քանդման, ստուգությունը բարվո ուժերի հաղթության, ճանապարհը հոգու փրկության»։**

Եվ այսօր, քսան դար հետո, նոր գարնան և նոր պարթոնքի հետ նորից հնչում է Քրիստոսի ձայնը. **«Ես եմ, մի՛ երկնչիք. զի՛ խընդյւք զկենդանիս ընդ մեռեալս»։** Այդ ձայնը ամեն գարնան նորովի է հնչում և նոր լիցք հաղորդում հայ հավատացյալի հոգուն։

Քրիստոսի հրաշափառ Հարությունը քրիստոնեական Եկեղեցու ամենանվիրական տոներից մեկն է և այն հիմնաքարը, որի վրա հաստատված է քրիստոնեական մտածողության ճշմարիտ վարդապետությունը։ **«Ես եմ յարութիւն և կեանք»։** Եկեղեցին խարսխվել է հիմնականում այս վկայության վրա։ Առանց վարանման կարելի է ասել, որ Քրիստոսի մահն ու հարությունը կապմուն են Եկեղեցու քարոզության ողն ու ծուծը, որովհետև **«Եթէ Քրիստոս չիցէ յարուցեալ, ընդունայն է քայտութիւնն մեր, ընդունայն են և հաւատքն ձեր»։** Հարության ավետիսը քրիստոնեական կրոնի անշարժ վեմն է։ Այն իր մեջ խտացնում է կյանքի անմահության, կյանքի հավերժության գաղափարը։ Քրիստոսի Հարության ավետիսը մահվան տապալման և մարդկային

իոգու անմահության, մարդկության փրկության ավետիսն է:

Ըստ քրիստոնեական մտածողության, յուրաքանչյուր հավատացյալ, յուրաքանչյուր քրիստոնյա հաղորդակից է դառնում Քրիստոսի մահվանը և հարությանը:

**«Քրիստոս յարեալ ի մեռելոց,
Մահուամբ զմահ կոխեաց
Եւ յարութեամբն իյրով
Մեզ զկեանս պարգևեաց»** (Շարական):

Ճիշտ է, Քրիստոսի Հարության իրողության բացատրությունը և գիտական մեկնաբանումը թերևս վեր է մարդկային մտածողության սահմաններից, սակայն այն մի ստույգ իրողություն է՝ հաստատված ժամանակակիցների վկայություններով, այնպիսի մի իրողություն, որ միայն հավատքով կարելի է ըմբռնել: «Ձի՛նչ են հաւատք, եթէ ոչ յուսացելոց իրաց հաստատութիւն, և յանդիմանութիւն որոց ոչև երևին», — ասում է Պոլոս առաքյալը:

Քրիստոսի Հարության առաջին վկայությունը կապված է այն բարեպաշտ կանանց հետ, որոնք Ավետարանում հայտնի են «յուդաբեր կանայք» անվամբ: Նրանք է, որ Փրկչի առաքելությամբ շտապում են Քրիստոսի աջակերտների մոտ և վկայում իրենց տեսածը:

Քրիստոսի Հարության երկրորդ վկաները դառնում են նրա աջակերտները: Նրանք լսում են Հարությունից հետո Փրկչի առաջին պատգամը. «Գնացէք ի Գալիլիա և անդ տեսցէք զիս... եւ ընդ ձեզ եմ պամենայն առուս մինչև ի կատարած աշխարհի»:

Սակայն Քրիստոսի Հարության մեծագույն վկայությունը բերում է Քրիստոնեական Եկեղեցին՝ իր 2000-ամյա պատմությամբ ու կերտած մշակույթով, իր ապրող և շնչող իրականությամբ, վեհ գաղափարներով, իր անխոնջ պայքարով՝ հանուն խաղաղության և մարդկանց երջանկության: Ինչպես ամեն մի

պատեհ առիթով, Ս. Հարության տոնի առթիվ էլ Ամենայն Հայոց Հայրապետը իր ավգու ձայնը բարձրացնում է հանուն խաղաղության, որպեսզի «...Հարության շնորհներով առավել աճեն ու ամրապնդվեն մարդկանց աշխարհում՝ խաղաղ գոյակցությունը ապգությունների և արդար հարաբերությունները պետությունների միջև, որպեսզի անցյալում բազում անգամներ արյունով ներկված մեր երկրագունդը այլևս երբեք, երբեք չտեսնի սև ուրվականը պատերազմի, որպեսզի այլևս ոչ մի պետություն չհամարձակվի լինել ավերակների ճարտարապետ, որպեսզի փլատակների ու դիակների տակ չխեղդվեն երգն ու ծաղիկը աշխարհի»:

Հարության տոնը՝ իր պատգամներով և իր ավետիսով, թվում է ավելի հարապատ հայ հավատացյալի հոգուն: Մեր բազմաչարչար ժողովուրդը, որ դարեր շարունակ կենաց և մահու պայքար է մղել չարի ու բռնության բիրտ ուժերի դեմ, որ չարչարվել, խաչը ուսին՝ բազմիցս իր արյունոտ Գողգոթան է բարձրացել, միշտ հավատարիմ է մնացել իր պապերի հավատին և Քրիստոսի պատգամին՝ «Ես եմ ձանապարհ, ճշմարտություն և կեանք», երբեք չի կորցրել իր հարության հույսը: Այդպես մեր ժողովուրդը վերջին անգամ խաչվեց 1915 թ. Ապրիլյան եղեռնին, բայց նորից կարողացավ, ի պարմանս շատերի, հարություն առնել, բուժել իր անցյալի արևոտ վերքերը: Եվ այսօր հայ ժողովուրդը իր վերածնված հայրենիքով, գիտությամբ ու մշակույթով իր նոր խոսքն է ասում աշխարհին և, ինչպես նշում է Վեհափառ Հայրապետը իր պատկական քարոզում, «...դարեր ու դարեր ահարկու ողբերգություններ ապրած ու 1915-ի եղեռնը տեսած մեր ժողովուրդը, այսօր փրկության ու վերածնունդի ամփին հասած, պիտի շարունակի իր վերելքն ու ծաղկումը մայր հողի վրա»:

Փա՛ռք Քրիստոսի հրաշափառ Հարությամբ:

Փա՛ռք մեր ժողովրդի հարուցյալ ոգուն:



ԱՄԵՆԱՅՆ ՀԱՅՈՑ ՎԵՀԱՓԱՌ ՀԱՅՐԱՊԵՏԻ ԿՈՆԴԱԿԸ
ԿՈՍՏԱՆԴՆՈՒՊՈԼԻՏԻ ԵՐԶԱՆԿԱՀԻՇԱՏԱԿ Տ. ՆԵՐՍԵՍ
ՊԱՏՐԻԱՐԲ ՎԱՐԺԱՊԵՏՅԱՆԻ ՄԱՀՎԱՆ
ՀԱՐՅՈՒՐԱՄՅԱԿԸ ՆՇԵԼՈՒ ՄԱՍԻՆ

ՔՐԻՍՏՈՍԱԻԱՆԴ ՍԻՐՈՅ ՈՂՋՈՅՆ ԵՒ ՕՐՀՆՈՒԹԻՒՆ ՀԱՅՐԱՊԵՏԱԿԱՆ
ՄԵԾԻ ՏԱՆՆ ԿԻԼԻԿԻՈՅ ԿԱԹՈՂԻԿՈՍՈՒԹԵԱՆ, ՊԱՏՐԻԱՐԲՈՒԹԵԱՆ
ՀԱՅՈՑ ԵՐՈՒՍԱՂԵՄԻ, ՊԱՏՐԻԱՐԲՈՒԹԵԱՆ ՀԱՅՈՑ ԹՈՒՐԲԻՈՅ,
ԱՐԲԵՊԻՍԿՈՊՈՍԱՅ, ԵՊԻՍԿՈՊՈՍԱՅ, ՎԱՐԴԱՊԵՏԱՅ, ՔԱՀԱՆԱՅԻՑ,
ԹԵՄԱԿԱՆ ԵԿԵՂԵՏԱԿԱՆ ԺՈՂՈՎՈՅ, ՀԱՅ ՄՇԱԿՈՒԹԱՅԻՆ
ԿԱԶՄԱԿԵՐՊՈՒԹԵԱՆՅ ԵՒ ՍԻՐԵՑԵԱԼ ՀԱՄԱՅՆ ՀԱՌՏԱՑԵԱԼ
ԺՈՂՈՎՐԴԵԱՆ ՀԱՅՈՑ

Բարեխնամողն Աստուած, մեր Մայր Եկեղեցու տասնեօթարեայ պատմութեան ընթացքում, մեր ժողովրդին յաճախ է պարգևել Սուրբ Հոգով ներշնչուած եկեղեցական մեծ դէմքեր, որոնք իրենց երկնատուր շնորհներով և արժանայիշատակ գործունէութեամբ փառատրել են սուաքելական մեր Սուրբ Եկեղեցին:

Ինչպէս յայտնի է, ԺԹ դարի երկրորդ կեսին, այդպիսի բազմաշնորհ անձերից մէկը հանդիսացաւ Տ. Ներսէս եպիսկոպոս Վարժապետեանը, որ, իբրև Կոստանդնուպոլսի հայոց պատրիարքութեան պատմական Աթոռի Գահակալ, մեծ հռչակ վաստակեց Հայ Եկեղեցու և ժողովրդի պատմութեան մէջ:

Նա ծնուել է 1837 թ. Կ. Պոլսի Խաազիդ թաղամասում և սովորել տեղի Ս. Ներսէսեան վարժարանում, ապա իր ուսումն առաջ տարել ինքնաշխատութեամբ: 1855 թ. տեղափոխուել է Ադրիանապոլիս ուսուցչական պաշտօնով: Երեք տարի անց, առաջնորդ Տ. Արիստակէս եպիսկոպոս Ռաֆայէլեանի ձեռամբ, ձեռնադրուել է Կոստակոս քահանայ և կարճ ժամանակ յետոյ էլ ստացել վարդապետական աստիճան: Վերադառնալով Կ. Պոլիս, ծաւալում է արդիւնաշատ գործունէութիւն: Գործուղում է Ռումիլիա, Տրանսիլվանիա և Ադա-նա, տեղի հայ համայնքներին այցելելու և հոգու մխիթարութիւն բաշխելու հայ հաւատացեալ ժողովրդին:

Սպի Տ. Կիրակոս Բ կաթողիկոսը, տեսնելով Վարժապետեան վարդապետի գործունէութեան արդիւնաւետութիւնը, ադանացիների խնդրանքով 1862 թ. եպիսկոպոս է ձեռնադրում նրան 25 տարեկան երիտասարդ հասակում: 1866-ին նրա ջանքերով Խաազիդում բացում է Նուպար-Շահնապարեան վարժարանը: 1872 թ. Սուրբ Էջմիածին այցելելով, նա անցնում է Մայր Աթոռի եպիսկոպոսաց դասը:

Տ. Ներսէս Վարժապետեանը կարճատև, սակայն բեղմնատուր իր գործունէութեան ընթացքում, որպէս մանկավարժ և քարոյիչ, վանական յանձնաժողովների անդամ, կրօնական ժողովի ատենապետ, պատրիարքական պատուիրակ և կաթողիկոսական ընտրական ժողովի պատգամաւոր, այնքան աչքի է

ընկնում, որ Ներսիսյան Հայրիկի պատրիարքական Աթոռից հրաժարումից յետոյ, Կ. Պոլսի հայոց պատրիարք է ընտրուում 1874 թ., երբ նա հասել 37 տարեկան էր:

Նրա գահակալության տարիներին Վուգադիպեց 1877 թ. ռուս-թուրքական պատերազմը: 1878-ի մարտի 3-ին ստորագրուած Սան-Սթեֆանոյի պայմանագրում նշուած 16-րդ յօդուածը, որ վերաբերում էր հայերին և հայկական հարցին, խմբագրուել էր նաև Ս. Ներսէս Պատրիարքի ջանքերով: Յոյժ բեղմնաւոր եղան նրա պատրիարքական գահակալության գործունէութեան տարիները, մեծապէս գնահատուած համայն հայ ազգութեան կողմից իր ժամանակին:

1884 թ. մայիսին, Սուրբ Էջմիածնում կաթողիկոսական ընտրութեան ժամանակ, Ս. Ներսէս Վարժապետեան պատրիարքը ընտրուեց Ամենայն Հայոց Կաթողիկոս, սակայն հիւանդութեան պատճառով նա հրաժարուեց այդ պատասխանատու պաշտօնից և հինգ ամիս յետոյ, 1884 թ. հոկտեմբերի 26-ին, վախճանուեց դեռ 48 տարիքը չբոլորած:

Ս. Ներսէս Պատրիարքի մահուան 100-ամեակը լրանում է այս տարի աշնանը:

Ս. Ներսէս Պատրիարք Վարժապետեանը բնաւորութեամբ հեզահամբոյր, լայնախոհ, գաղափարապաշտ և պարզասէր մի հոգևորական էր, բարոյական անձնատրոյթեան մի կատարեալ տիպար, իր ժամանակի հոգևորականութեան աչքառու դէմքերից մեկը՝ ազգասիրական ջերմ պգացումներով խանդավառ:

Մեծանուն Օրմանեան Պատրիարքը ուղիղ է բնութագրել Վարժապետեանին, հետեւելը գրելով պատկերաւոր կերպով նրա մասին. «Ներսէս իւր ազգին բարոյն և յառաջդիմութեան նախանձայոյզ եղաւ: Ներսէս իւր ազգին ճշմարիտ օգուտին համար անձնուէր աշխատեցաւ: Ներսէս իւր Եկեղեցւոյն պայծառութեան ժիր մշակ եղաւ... Ներսէս արդեամբ և արժանեօք բարձրացաւ: Ներսէս պարագաներուն ներածին չափ իւր ազգն ու Եկեղեցին շահեցուց և վարճացուց»:

Մենք սիրով և խոր գոհունակութեամբ ենք ընդառաջում Ամենապատիւ Մեր Եղբօր, Կ. Պոլսի հայոց Պատրիարք Ս. Շնորհք արքեպիսկոպոս Գալուստեանի 22 Փետրուար 1984 թուակիր դիմումին և սոյն Մեր կոնդակով հրաւիրում ենք մեր Մայր Եկեղեցին և համայն մեր հաւատացեալ ժողովրդին որ ի Հայաստան և որ ի սփիւռս աշխարհի, սոյն տարուայ աշնանը արժանավայել կերպով տօնախմբելու պայծառ յիշատակը Ս. Ներսէս Վարժապետեան սրբաւան Պատրիարքի, նաև ջերմապէս աղօթելու նրա հոգու խաղաղութեան համար երկնային յաւերժութեան մէջ:

«Յիշեցէք վառաջնորդս ձեր որ խօսեցան ձեզ պբանն Աստուծոյ, հայեցեալք յելս գնացից նոցա՝ նմանողք եղերուք հաւատոցն» (Եբր. ԺԳ 17):

Կարգ Ջե Ռ

ԾԱՅՐԱԳՈՅՆ ՊԱՏՐԻԱՐԷ ԵՒ ԿԱԹՈՂԻԿՈՍ
ԱՄԵՆԱՅՆ ՀԱՅՈՅ

Տուաւ կոնդակս ի 20 Ապրիլի
1984 Փրկչական ամի,
եւ ի տումարիս Հայոց ՌՆԼԳ
ի մայրավանս Սրբոյ Էջմիածնի:
Հմր. 1249.



ՎԵՀԱՓԱՌԻ ՀԱՅՐԱՊԵՏԸ ՄԱՅՐ ՏԱԺԱՐՈՒԹ ԶԱՏԿԱԿԱՆ ՔԱՐՈԶԸ ԱՐՏԱՍԱՆԵԼԻՄ

ՍՈՒՐԲ ՀԱՐՈՒԹՅԱՆ ՏՈՆԸ ՄԱՅՐ ԱԹՈՌՈՒՄ

Ապրիլի 22-ին, կիրակի.—ՉԱՏԻԿ. Յարու-
թիւն Տեառն մերոյ Յիսուսի Քրիստոսի:

Մայր Աթոռը Փրկչի Հարության տոնակա-
տարության առթիվ այսօր ցնծության և բերկ-
րանքի մեջ է: Հապարավոր հավատացյալներ,
դեմքներին կենսուրախ ժպիտներ, սեր ու
խնդություն, դիմում են Ս. Էջմիածնի Մայր
տաճար: Նրանք գալիս են նորոգելու իրենց
ուխտը, գալիս են հաղորդակից լինելու հայ-
րապետական սուրբ պատարագին:

Ժամը 11-ին ուրախ դողանքներով հնչում
են Մայր տաճարի զանգակները: Վեհափառ
Հայրապետը, տոնական հանդիսավորու-
թյամբ, շրջապատված Մայր Աթոռի միաբա-
նությամբ, եկեղեցական թափորով առաջ-
նորդվում է Մայր տաճար՝ մատուցելու զատ-
կական սուրբ պատարագ:

Մայր տաճարի երգչախմբի կատարմամբ
խորխոր և հոգեզմայլ են հնչում «Գովեա Ե-
րուսաղէմ զՏէր» և «Յարեաւ Քրիստոս» տա-
ղերը:

Այս ուրախալի առիթով ս. պատարագին
ներկա էին Գերագույն Հոգևոր Խորհրդի ան-
դամները, ուխտավորաբար Մայր Աթոռում
գտնվող Փարիզի հայոց Կրօնական ընկերակ-
ցության ներկայացուցչական հանձնաժողո-
ւի ատենապետ պրն. Արմեն Բարսեղյանը և
զանձապահ պրն. Կարայի Ջրբաշյանը, Մոն-
րեալի հայոց եկեղեցական վարչության ատե-
նապետ դոկտ. Արշավիր Կյունձյանը, Ֆրան-
սիայի Իսի Լե Մուլինոյի քաղաքագլուխ Ան-
դրե Սանտինին, փոխքաղաքագլուխ Մար-
տիրոս Կարապոյանը, Լիոնի նախկին ռազ-
միկների միության ընդհանուր նախագահ
Միրան Բեհայանը, Մայր Աթոռի բարերար-
ներ Տիգրան Փափապյանը և Սերժ Մանուկ-
յանը, Լիոնի «Սևան» ճամփորդական հաս-
տատության տնօրեն Վարուժան Սարգիսյա-
նը:

Ս. պատարագին հյուրաբար ներկա էին
Պերուից հասարակական գործիչ Ֆերնանդես

Մալդոնադոն և հայր Խուան Ֆլորենսինոն:

«Հայր մեր»-ից առաջ Վեհափառ Հայրա-
պետը, շնորհավորելով համայն հայության
Ձատիկը, բովանդակալից իր քարոզում վեր
է հանում ս. Հարության տոնի հոգևոր և
պատմական նշանակությունը (հայրապետա-
կան սույն քարոզը տես «Էջմիածին» ամսա-
գրի սույն համարում, էջ 3): Վեհափառ Հայ-
րապետի զատկական քարոզը ձայնասփռվում
է Երևանի ռադիոկայանից նույն օրը երեկո-
յան:


Հավարտ ս. պատարագի Վեհափառ Հայ-
րապետն առաջնորդվում է Վեհարան, ուր
ընդունում է շնորհավորանքներ զատկական
տոնի առթիվ:


Ժամը 15-ին Վեհարանի սեղանատանը
տրվում է պաշտոնական ճաշկերույթ, որին
ներկա էին Ս. Սիոն արքեպ. Մանուկյանը, Ս.
Հուսիկ արքեպ. Սանթրոյանը, Ս. Շահե ար-
քեպ. Աճեմյանը, Ս. Ներսես եպս. Պոպապա-
յանը, Ս. Գևորգ եպս. Սերայդարյանը, Մայր
Աթոռ Ս. Էջմիածնի միաբանության, Գերա-
գույն Հոգևոր Խորհրդի, ճարտարապետների
հանձնաժողովի անդամները և մայրավանքի
պաշտոնյաները: Ճաշկերույթին մասնակցող
հրավիրյալների թվում էին Մայր Աթոռում
գտնվող հյուր ուխտավորները:

Ճաշկերույթին ներկա էին նաև ՀՍՍՀ Մի-
նիստրների խորհրդին առընթեր Հայ Եկեղե-
ցու գործերի խորհրդի նախագահ Ռուբեն
Պարսամյանը և տեղակալ Անդրանիկ Հաս-
րայանը:

Ճաշկերույթի ընթացքում ներկաները ջեր-
մորեն շնորհավորում են Վեհափառ Հայրա-
պետին Ս. Հարության տոնի առթիվ և նրան
մաղթում արևշատ օրեր, նորանոր հաջողու-
թյուններ իր ազանվեր և եկեղեցաշեն գոր-
ծունեության մեջ:

Ձատկական ճաշն ավարտվում է Վեհա-
փառ Հոր օրհնությամբ:





ՄԵԾ ԵՂԵՌՆԻ ՏԱՐԵԴԱՐՁԻ ՆՇՈՒՄԸ ՄԱՅՐ ԱԹՈՌՈՒՄ

Ապրիլի 24-ին, կիրակի.—Յիշատակ բիւրաւոր նահատակացն մերոց, որք կատարեցան յընթացս համաշխարհային առաջին պատերազմի.

Ապրիլյան եղեռնի 69-րդ տարելիցն է այսօր:

Ամեն տարի գարնանը, ապրիլի 24-ին, թե՛ Հայաստանում և թե՛ սփյուռքում խոր վշտով ոգեկոչվում է հիշատակը 1915 թ. հայ բյուրավոր նահատակաց: Խաղաղ և աշխատասեր ժողովրդի մեկ ու կես միլիոն զավակներ նահատակվեցին բարբարոս և արյունարբու թշնամու ձեռքով՝ դուրս քշվելով իրենց հայրենի պատմական հողերից, ուր նրանք դարեր շարունակ աշխատել, ապրել և ծնունդ էին տվել մշակութային բազում արժեքների: Աներևակայելի մի փաստ 20-րդ դարի համար, անժխտելի և անմոռանալի մի դեպք, որի տխուր հիշատակը սրբացվեց հայ ժողովրդի և Հայ Եկեղեցու կողմից:

Ապրիլյան այս օրը հայրենիքում և սփյուռքում բազմահազար հայորդիներ իրենց քայլերն են ուղղում դեպի անմահ զոհերի հիշատակը հավերժացնող հուշարձանները՝ գլուխ խոնարհելու և իրենց հարգանքի տուրքը մատուցելու:

Առավոտյան ժամը 10.15-ին, ուխտավորաբար Մայր Աթոռում գտնվող Ս. Շահե արքեպ. Աճեմյանի գլխավորությամբ, Ս. Ներսիս, Ս. Գևորգ սրբապանները, Մայր Աթոռի

միաբան վարդապետները, արքեղաները, ինչպես նաև քահանա հայրերն ու սարկավագները այցելում են Ծիծեռնակաբերդ և ծաղկեպսակ պետեղում Ապրիլյան եղեռնի զոհերի հուշարձանին: Նրանք մի պահ կանգ են առնում հավերժական կրակի առաջ և «Հոգւոց» արտասանում, ապա մեկ րոպե լռությամբ հարգում նահատակների հիշատակը:

Ժամը 10.30-ին Մայր տաճարի Ավագ խորանի վրա ս. պատարագ է մատուցում Արարատյան հայրապետական թեմի առաջնորդական փոխանորդ Ս. Գարեգին եպս. Ներսիսյանը և «Հայր մեր»-ից առաջ ոգեշունչ քարոզ խոսում՝ վեր հանելով բյուրավոր հայ նահատակների հիշատակը:

Ս. պատարագին ներկա էր Վեհափառ Հայրապետը: Արարողությանը ներկա էին նաև Մայր Աթոռի աշխատավորներն ու հավատացյալների մի հոծ բազմություն:


Հավարտ ս. պատարագի Վեհափառ Հայրապետը, ի գլուխ եկեղեցական թափորի, առաջնորդվում է մայրավանքի հյուսիսային կողմում կառուցված նահատակաց հուշարձան և նախագահում հոգեհանգստյան արարողությանը:

Նույն օրը, ժամը 15-ին, հոգևոր ճեմարանի ուսանողությունը ծաղիկներով, տեսչական և դասախոսական կազմի գլխավորությամբ, բարձրանում է Ծիծեռնակաբերդ:





ԾԻԾԵՌՆԱԿԱՐԵՐՈՒ ՀԱՅ ՆԱՀԱՏԱԿԱՅ ՀՈՒԾԱՐՁԱՆԻ ԱՆՄԱՐ ԿՐԱԿԻ ԱՌՋԵՎ (24 ապրիլի 1984 թ.)



ԵԿԵՂԵՑԱԿԱՆ ԲԵՄ. ԼՈՒՐԵՐ

Ապրիլի 1-ին, կիրակի.—Ե կիրակի Քառասնորդական Պահոց (Դատաւորին):

Այսօր Մայր տաճարում, Ավագ խորանի վրա, ս. պատարագ է մատուցում Ս. Հովնան արքեպիսկոպոսը:

«Հայր մեր»-ից առաջ քարոզ է խոսում Ս. Հայկապոն վրդ. Նաջարյանը «Ասաց եւ առակ մի նոցա առ այն թէ պարտ է յամենայն ժամ կալ նոցա յաղօթս եւ մի ձանձրանալ» (Ղուկաս ԺԸ 1) բնաբանով:

Ս. պատարագին ներկա էր Վեհափառ Հայրապետը:

* *

Ապրիլի 5-ին, հինգշաբթի.—Այսօր ուխտավորաբար Մայր Աթոռ Ս. Էջմիածին է այցելում ԵՀԽ-ի նախագահության անդամ, հընդկական Մալաբար Եկեղեցու միտրոպոլիտ Մար Գրեգորիոսը:

Սրբապան հորը Երևանի «Զվարթնոց» օդանավակայանում դիմավորում են Մայր Աթոռի դիվանապետ Ս. Ներսես եպս. Պոպապայանը և Ս. Հովնան արքեպիսկոպոսը:

* *

Նույն օրը, երեկոյան, Վեհարանում տեղի է ունենում միաբանական հերթական հավաքույթ:

Հավաքույթի սկզբում ներկաները մտքեր են փոխանակում Ս. Հայկապոն վրդ. Նաջարյանի ապրիլի 1-ին Մայր տաճարում արտասանած քարոզի շուրջ:

Այնուհետև միաբանական հավաքույթին հրավիրված միտրոպոլիտ Մար Գրեգորիոսը խոսում է աղոթքի, մեղքի և հավիտենականության հարցերի մասին:

Վերջում պատվավոր հյուրը պատասխանում է միաբանների հարցերին:

* *

Ապրիլի 8-ին, կիրակի.—2 կիրակի Քառասնորդական Պահոց (Գալստեան):

Այսօր Մայր տաճարում, Ավագ խորանի վրա, ս. պատարագ է մատուցում Ս. Հայկապոն վրդ. Նաջարյանը:

«Հայր մեր»-ից առաջ քարոզում է Ս. Հով-

նան արեղա Տերտերյանը «Դարձուցիչ մոլորեցոց, դարձո Կիս ի չար սովորութեանց իմոց ի բարի սովորութիւն» (Շնորհալի) բնաբանով:

Ս. պատարագին ներկա էր Վեհափառ Հայրապետը:

Ապրիլի 11-ին, չորեքշաբթի.—Այսօր հոգևոր ճեմարանի ուսանողները, գլխավորությամբ Տ. Եկնիկ քնն. Պետրոսյանի, մեկօրյա պտույտի են մեկնում դեպի Գառնի և Ս. Գեղարդա վանք:

Ապրիլի 12-ին, հինգշաբթի.—Այսօր, առավոտյան, Մայր Աթոռի միաբան Տ. Հովնան արեղա Տերտերյանը հովվական այցելությամբ մեկնում է Իրաքի հայոց թեմ:

Նույն օրը, երեկոյան, Վեհարանի հանդիսությունների դահլիճում, Վեհափառ Հայրապետի նախագահությամբ, տեղի է ունենում միաբանական հավաքույթ:

Ապրիլի 14-ին, շաբաթ.—Այսօր ուխտավորաբար Մայր Աթոռ են այցելում Կանադայի հայոց առաջնորդական տեղապահ Տ. Վալզեն վրդ. Քեշիշյանը, Մոնրեալի հայոց եկեղեցական վարչության ատենապետ դոկտ. Արշավիր Կոնճյանը, Փարիզի հայոց Կրոնական ընկերակցության ներկայացուցչական հանձնաժողովի ատենապետ պրն. Արմեն Բարսեղյանը և գանձապահ պրն. Կարպիս Ջրբաշյանը:

Վեհափառ Հայրապետը ընդունում է հարգելի հյուրերին և ջերմ կրոնց ունենում նրանց հետ:

Ապրիլի 15-ին, կիրակի.—**Ծաղկապարդ.**

Այսօր Մայր տաճարում, Ավագ խորանի վրա, ս. պատարագ է մատուցում Տ. Ներսես եպս. Պոպապայանը և «Հայր մեր»-ից առաջ քարոզում «Ծերքն ուստովք ձիթենեօք եւ տղայքն ուստովք արմաւենեօք եւ երամ երամ դաստքն աղաղակէին՝ ուխտանա օրինեալ եկեալ ի յանունն Տեառն» (շարական) բնաբանով:

Ս. պատարագին ներկա էր Վեհափառ Հայրապետը:

Նույն օրը, Էջմիածին քաղաքի Ս. Աստվածածին եկեղեցում ս. պատարագ է մատուցում Տ. Հակոբ քնն. Գրիկյանը և «Հայր մեր»-ից առաջ քարոզում «Մինչդեռ Կոյսն Կձեպ ունիք՝ հաւատացէք ի Կոյսն Կի որդիք լուսոյ եղիջիք» (Հովհ. ԺԲ 36) բնաբանով:

Ապրիլի 18-ին չորեքշաբթի.—Այսօր ԱՄՆ-ից Մայր Աթոռ է վերադառնում Գերագույն Հոգևոր Խորհրդի ատենապետ Տ. Սիոն արքեպ. Մանուկյանը: Երևանի «Զվարթնոց» օդանավակայանում սրբապան հորը դիմավորում և բարի գալուստ է մաղթում Տ. Հուսիկ արք. Սանթրոսյանը:

Ապրիլի 19-ին, հինգշաբթի.—Այսօր, երեկոյան ժամը 17.30-ին, Մայր տաճարում կատարվում է «Ունալուսայի» կարգը:

Ժամը 19.30-ին սկսվում է Հիսուսի «սուկալի չարչարանաց և խաչելութեան» հիշատակին նվիրված Ավագ ուրբաթի արարողությունը կամ «Խաւարման» կարգը:

«Փառք ի բարձունս»-ից հետո օրվա խորհրդի մասին քարոզ է խոսում Վեհափառ Հայրապետը:

Նույն օրը Երուսաղեմից ուխտավորաբար Մայր Աթոռ է այցելում Տ. Շահե արքեպ. Աճեմյանը:

Ապրիլի 20-ին, ուրբաթ.—Աագ ուրբաթ. Յիշատակ չարչարանաց և խաչելութեան Տեառն մերոյ Յիսուսի Քրիստոսի:

Այսօր, ժամը 12-ին, Մայր տաճարում կատարվում է «Կարգ Խաչելութեան» արարողությունը:

Երեկոյան ժամը 18-ին, «Թաղման կարգ»-ից հետո, Տ. Սիոն արքեպ. Մանուկյանի նախագահությամբ Մայր տաճարի շուրջ կատարվում է եռադարձ «Թափօր թաղմանն» արարողությունը:

Ապրիլի 21-ին, շաբաթ.—Աագ շաբաթ. Ճրագալոյց Զատիկի:

Այսօր, երեկոյան, Մայր տաճարում, Ավագ խորանի վրա, ս. պատարագ է մատուցում Ս. Շահե արքեպ. Աճեմյանը և «Հայր մեր»-ից առաջ քարոզում «Հաւատովք ճանաչել զնա եւ զգործօրն յարութեան նորա» (Փիլիպ. Գ 10) բնաբանով:

Հավարտ ս. պատարագի, Վեհափառ Հայրապետի նախագահությամբ, կատարվում է Ս. Զատիկի նախատոնակի արարողությունը և Մայր տաճարում հնչում է Հարության մեծ ավետիսը՝ «Քրիստոս յարեաւ ի մեռելոց...»:

Ապա վանական սեղանատանը Մայր Աթոռի միաբանները և հոգևոր ճեմարանի ուսանողությունը միասին ճաշակում են Զատիկի նավակատիքի ընթրիքը:

*
*
*

Ապրիլի 23-ին, երկուշաբթի.—Յիշատակ մեռելոց.

Այսօր Մայր տաճարում, Ավագ խորանի վրա, ս. պատարագ է մատուցում Ս. Հովսեփ արքեպ. Հակոբյանը:

Հավարտ ս. պատարագի կատարվում է հոգեհանգստյան պաշտոն «վասն համօրէն նընջեցելոց»:

*
*
*

Ապրիլի 29-ին, կիրակի.—Կրկնապատիկ (Նոր Կիրակէ):

Այսօր Մայր տաճարում, Ավագ խորանի վրա, ս. պատարագ է մատուցում Ս. Թորգոմ արքեպ. Խարապյանը և «Հայր մեր»-ից առաջ քարոզում օրվա խորհրդի մասին:



ՀԻՇԱՏԱԿ ՂԱԶԱՐՈՒ ՀԱՐՈՒԹՅԱՆ

«...Եկեացէ ժամանակ յորում ամենեքին որ ի գերեզմանս կայցեն՝ լուիցեն ձայնի նորա, եւ եկեացեն արտաքս» (Հովհ. Ե 28—29):

«...Ղապարէ, արի եկ արտաքս: Եւ ել մեռեալն...» (Հովհ. ԺԱ 43—44):

Ըստ Հայաստանյայց Առաքելական Եկեղեցւոյ սահմանած կարգ ու կանոնին, Մեծի պահոց ավարտին կսկսի մեր Տիրոջ երկրային կյանքի կարևորագոյն պահը: Մեր Եկեղեցւոյ սրբազան հայրերը Ղապարու հարության դրվագը վետեղելով Մեծի պահոց վերջավորության և Ծաղկապարդի (Հիսուսի հաղթական մուտքը Երուսաղեմ) նախօրյակին, ճշմարիտ նվաճումի գաղափարով պսակեցին Մեծի պահոց հոգեղեն շրջանը և նախերգանքը տվին մոտալուտ մեծահրաշ ու աշխարհաջահ հաղթության՝ Քրիստոսի հրաշափառ Հարության: Այսպիսով՝ Ղապարու հարությունը պատկեր մը հանդիսացավ Քրիստոսի հարության, ինչպես, օրինակ, հարության այլ պատկեր եղավ նաև Հին Ուխտի դրվագներեն՝ Հովնան մարգարեի այլաբանական դեպքը: Մարդկային կյանքի նպատակը, որ դարերու ընթացքին աշխարհիկ պես-պես տեսություններով բացատրված էր, մարդացյալ Աստուծո փրկարար տնօրինությամբ ստացավ հավելյալ և հուսադրիչ հորիզոն ու տարողություն: Այդ հորիզոնին վրա իր առանձնահատուկ ու բովանդակալից տեղը ունեցավ Ղապարու հարության դեպքը:

Այս աշխարհի տեսանկյունէն դիտած՝ մարդկային կյանքը արագընթաց ճանապարհորդություն մըն է՝ դեպի մահ: Նման թեպ մը որդեգրեց հունական իմաստասիրությունը, երբ նույն դպրոցին պատկանող փիլիսոփաներ կհաստատեն, թե ունէ գոյացություն, վերջ ի վերջո, դատապարտված է անգոյու-

թյան. քանզի մահը, որպես կերպար անգոյություն, կարծեք մարդկային կյանքին միակ նպատակակետը եղած ըլլար, որով կյանքը հեռու էր ունէ արժեք ունենալէ և հետևապես պարտուրված էր ուղեկորոյս պարապությամբ մը: Թե՛ մարդիկ և թե՛ ապգոյություններ իրենց մշակութային դիմագիծով կրկված էին շրջապատը իր միավորներով ու իր ծալքերով ոգեպինելու և իմաստավորելու տիրահաստատ վեհ կոչումէն:

Սակայն Աստված այնքան սիրեց իր իսկ պատկերով ու նմանությամբ ստեղծած մարդը, որ իր Միածին Որդին առաքեց, որպեսզի մարդ էակը վերագտնէ իր կյանքին իսկական դիմագիծը և վայն իմաստավորե արժեքներ ստեղծելու և իր շրջապատը ոգեպինելու աստվածադիր կոչման ընդմեջէն: Ահա թե ինչու հարկ էր ունենալ ճարտարապետ մը բարի, որը, որպես մարդացյալ Աստված, աստվածային արարքով մը ձերբապատեր մարդկային կյանքը լոկ աշխարհիկ նկարագիրէ՝ վայն օժտելով նոր խորհուրդով մը, թե կյանքը պարզէն է Աստուծո և ուրեմն ունի յորահատուկ կոչում և նպատակ. կոչում՝ ստեղծագործությունը վերստին Աստուծո սեփականությունը դարձնելու, ու նպատակ՝ մարդը, որպես տերը իր կոչումին, հասցնելու Աստուծո արքայության, ճաշակելու համար, հարության ճանապարհով, անմահության աւկունքէն:

Ահա այս ըմբռնումով պետք է մոտենալ Ղապարու հարության հրաշքի խորհուրդին:

Իսկ Ղապարու հարությունը խորհուրդ մըն է ճիշդ անոր համար, որ, նախ՝ Քրիստոս այդ հրաշքով գործակալի վերածեց իր քարոզչությունը, և երկրորդ՝ մեր Տերը փրկագործությունը պայմանավորեց սիրո գաղափարականով՝ զոհելով իր «Քարի Հովիվ»-ի կյանքը որպես սիրո արտահայտություն և փրկագին բոլոր ժամանակներու ու ամբողջ մարդկության փրկության համար:

Քիչ վերև ակնարկեցինք, թե Ղապարու հարության դեպքով Քրիստոս գործակալի վերածեց, եթե կույեք՝ կյանքի կոչեց ընդհանրապես իր քարոզներուն մեջ արծարծված նյութերը: Այսպես՝ Հովհաննես առաքյալ, ավետարանիչներուն մեջ միակը Ղապարու հարության դեպքը հիշող, կներկայացնե մեր Տիրոջ անձը որպես տվիչը կյանքի, թե կյանքը ընծան է Քրիստոսի և թե Քրիստոսի պարզև մարդոց՝ իր իսկ անձն է, ըստ տիրական առաջադրանքին. «Հացն զոր ես տաց՝ մարմին իմ է, զոր ես տաց վասն կենացն աշխարհի» (Հովհ. 2 52):

Եռամյա առաքելության ընթացքին Քրիստոս հաստատեց, թե ինքը ճշմարտապես տվիչն է կյանքի, այլև աղբյուրը կենաց: Ահա մեր Տիրոջ զուգ վկայությունը այս առնչությամբ. վկայություն, որ շատ շուտով հրաշագործությամբ մը պիտի արտահայտվեր՝ ունենալով որոշակի անդրադարձ իր առաքելության վրա:

Առաջին վկայությունը հետևյալն է. «Ամեն ամեն ասեմ ձեզ, զի որ վբանս իմ լսե եւ հաւատայ այն որ առաքեացն զիս՝ ընդունի զկեանսն յաւիտեանականս. եւ ի դատաստան ոչ մտանէ, այլ փոխեցաւ ի մահուանէ ի կեանս» (Հովհ. 6 24):

Սույն արտահայտությամբ մեր Տերը մահը կվերածե պարագայական վիճակի մը: Իհարկե շեշտը այստեղ Քրիստոսի խոսքին վրա կկեդրոնանա և հավիտեանական կյանքի ժառանգումը պայմանավոր կդառնա տիրական խոսքին ունկնդրումովը, այդ խոսքի բովանդակության հավատք ընծայելով և ըստ այնմ ապրելով: Կարևոր հանգամանքն այն է, որ մարդ էակը նույնիսկ իր կյանքի ընթացքին «անցած կըլլա մահեն դեպի կյանք» Քրիստոսի փրկչական խոսքին ճանապարհով: Եթե մինչև իսկ անհատը մահացած ըլլա, դարձյալ մեր Տիրոջ խոսքին կենարար գործությամբ կյանքի կկոչվի, քանզի Քրիստոս ինքն է հաղթողը մահվան և տվիչը կյանքին:

Ահավասիկ մեր Տիրոջ երկրորդ վկայությունը, երբ մեռելները, լսելով տիրական ձայնը կենսառաք, իրապես հարություն կառնեն, այլ խոսքով՝ կյանքի կու գան: «Ամեն ամեն ասեմ ձեզ, զի գայ ժամանակ եւ արդէն իսկ

է, յորժամ մեռեալք լսիցեն ձայնի Որդոյն Աստուծոյ. եւ որք լսիցեն՝ կեցցեն» (Հովհ. 5 25): Այո, կրկին կշեշտվի Քրիստոսի խոսքին գերուժականությունը, սակայն այս պարագային մահացողները կյանքի կոչելով:

Ակներև է անշուշտ, որ Մարթայի և Մարիամի եղբայրը՝ Ղապարոսը, այն անձը հանդիսացավ, որ կյանքին վերադարձավ՝ լսելով Քրիստոսի ձայնը՝ «Ղապարէ, արի, եկ արտաքս» հրամայականով: Ու Ղապարոս, հարություն առնելով, կյանքի եկավ՝ փաստելով բոլոր ներկաներուն, թե ժամանակը արդեն եկած է, երբ մեռելները, լսելով Աստուծո Որդիին ձայնը, անպայմանորեն պիտի ապրին: Ղապարոս լսեց և վերապրեցավ:

Այստեղ պետք է մատնանշել կարևոր իրողություն մը: Եթե Ղապարոս Քրիստոսի հրամայականին ականջալուր ըլլալով իր կյանքը վերստին ժառանգեց, ապա ուրեմն ինչո՞ւ այդ պարզև իրը չմնաց առհավետ: Սույն հարցին ճշգրիտ պատասխան տալու համար հարկ է ճշդել այն նպատակը, որուն համար Քրիստոս վերստին կյանք շնորհեց Ղապարոսին:

Ղապարոսի քրոջ՝ Մարթայի հետ ունեցած երկխոսության ընթացքին մեր Տերը հայտարարեց, թե «Յարիցէ եղբայրն քո...» (Հովհ. ԺԱ 23): Սակայն Մարթայի պատասխանն կիմանանք, որ մեռյալին քույրը տակավին չէր ըմբռնած մինչ այդ Քրիստոսի ընդգծած ճշմարտությունը, ճշմարտություն՝ զոր մեր Տերը անգամ մը ևս հաստատեց հավելյալ հեղինակությամբ:

Ի պատասխան Քրիստոսի ավետիսին, թե Ղապարոս հարություն պիտի առնե, Մարթա ըսավ. «Գիտեմ զի յարիցէ ի յարութեան՝ յաւուրն յետնում» (Հովհ. ԺԱ 24): Այլ բացատրությամբ՝ Մարթա թերևս չէր հասկցած, թե Քրիստոս է և կմնա հեղինակը կյանքի պարզևատրման բոլոր ժամանակներուն համար, և թե մեր Տերը միայն դատաստանի օրվան հարությամբ չէ, որ կարծանավորե հավատավորները: Ահա մեր Տիրոջ աստվածեղեն խոսքը որպես ելրակացություն վերոհիշյալ ճշմարտության. «Ես իսկ եմ յարություն եւ կեանք. որ հաւատայ յիս, թեպէտ եւ մեռանի, կեցցէ. եւ ամենայն որ կենդանի է եւ հաւատայ յիս՝ մի մեռցի ի յաւիտեան» (Հովհ. ԺԱ 25—26):

Վերոհիշյալ հաստատումով բացահայտ կդառնա մեր Տիրոջ նպատակը՝ Ղապարոսը հարության խորհուրդին արժանի ընելով: Ըստ այսմ՝ Քրիստոս հաճեցավ հաստատել, թե ինք իշխանություն ունի ի վերա մահվան, թե հարության խորհուրդը հակադարձն է մահվան վիճակին և թե կենաց պարզև

հաղթանակն է ընդդեմ մահվան: Ղապարոսի անձը հանդիսացավ այն միջոցը, որով հարության գաղափարը պատմական դեպք դարձավ՝ կիրառվելով որոշակի ժամանակի մը ընթացքին և տվյալ միջոցի մը մեջ, թեպետև այս պարագային Ղապարոս վերադարձավ երկրային կյանքի վիճակին: Շուտով երկրորդ և ավելի մեծահորաջ հարությամբ մարդկային ցեղի պատմությունը պիտի ստանար նոր խորք և իմաստ, նոր ըմբռնում և տարողություն: Քանզի Քրիստոսի հարությամբ համայն տիեզերքը պիտի ենթարկվեր հիմնական վերանորոգման, ու մարդ էակը, Քրիստոսի նմանությամբ և հետևողությամբ, հետ հարության պիտի ժառանգեր անապականություն, պորություն ու փառք, ըստ Պողոս առաքյալի կորնթացիներուն ուղղյալ առաջին նամակի ԺԵ գլուխի հաստատումին:

Այժմ վերադառնանք Ղապարոս հարության խորհուրդին հետ առնչվող այն երկրորդ կետին, թե վերոհիշյալ հրաշքով մեր Տերը պատկեր մը ևս ներկայացուց, ըստ որում փրկագործությունը պայմանավորեց սիրո գաղափարականով: Այլ խոսքով՝ Քրիստոս պատարագի սեղան բարձրացավ և կամովին ողջակեպ եղավ ի սեր համայն մարդկության փրկության:

Ճիշդ է, որ սիրո պգացումը մարդուն հոգեկան աշխարհի վեհագույն արտահայտությունն է, անկայն Քրիստոսի քարոզության արգասիքը ըլլալով, այլև անոր գործած հրաշքներուն խթանը հանդիսանալով՝ սերը ու սիրելու կարողությունը դարձավ օրենքի համապոր ճշմարտություն մը և ճշդող սկզբունք այն հարաբերությանց, որոնք ի գո են Աստուծո և մարդուն միջև և ընդհանրապես մարդ էակին և իր նմանին միջև: Երբ Քրիստոս մարդկության հանդեպ ունեցած իր սիրուն իբրև հետևանք՝ հարության հրաշքին արժանացուց Ղապարոսը, ան իր աստվածային անձին վրա հրավիրեց այս աշխարհի անհանդուրժող չարության ոգին և թշնամանքը, ինչպես կփաստեն Հովհաննես ավետարանիչին կողմէ նշված Ղապարոս հարության դրվագին հաջորդող դեպքերը: Կյանք պարզևող հրաշագործ արարքը շարժառիթ եղավ, որ խավարասեր թշնամին հալածանքի ենթարկեր մեր Տիրոջը և ապա խաչը հաներ պայն՝ անգիտանալով, թե այդ ահարկու արարքին ընդմեջեն արդեն մարդկային ցեղի փրկագործությունը իր ընթացքին մեջ կմտնէր: Իր աստվածեղեն կյանքին իսկ գնով մեր Տերը կյանք շնորհեց Ղապարոսին՝ շեշտելու նպատակով, թե՝ «Մեծ ես քան վայս սեր ոչ ոք ունի, եթե վանձն իր դիցէ ի վերայ բարեկամաց իւրոց» (Հովհ. ԺԵ 13):

Ըստ Հովհաննես ավետարանիչի վկայության, Ղապարոս հարության դեպքն անմիջապես հետո, քահանայապետները ատյան գումարեցին իրենց ընելիքը ճշդելու համար: Այսպիսով՝ Աստվածորդին մահվան դատապարտվեցավ. «Ապա յայն օրէ խորհուրդ արարին զի սպանցեն զնա» (Հովհ. ԺԱ 53):

Ղապարոս հարության ճանապարհով Քրիստոս կերթար իր կյանքը պատարագելու ամբողջ մարդկության փրկության համար: Մեր Տերը իր կյանքը կու տար իր բարեկամի կյանքին փոխարեն: Մերը Քրիստոսի առաքելության առանցքը հանդիսացավ, հավիտենական ու անքակտելի կապը իր և մեր միջև. «Այս է պատուիր իմ, զի սիրեսցիք զմիմեանս, որպէս եւ ես սիրեցի զձեզ» (Հովհ. ԺԵ 12), քանզի «այսմ գիտացեն ամենեւեան եթէ իմ աշակերտք էք, եթէ սիրիցէք զմիմեանս» (Հովհ. ԺԳ 35):

Ահա թե ինչպես «Բարի Հովիվ»-ին առաւել կատանար խորիմաստ արժեք՝ հիմնված պատմական դեպքերու իրողությանց և հաջորդականությանց վրա: Աստուծմէ առաքված Բարի Հովիվը կու գար, որպեսպի մարդ էակը կյանք ունենար: Սակայն այս աստվածառաք ծրագիրը իրագործելու համար Բարի Հովիվը իր կյանքը կպոհեր մարդկության համար. «Ես եմ հովիւն քաջ. հովիւ քաջ վանձն իր դէն ի վերայ ոչխարաց» (Հովհ. Ժ 11):


Ահավասիկ Ղապարոս հարության դեպքի իմաստը փրկագործության համայնապատկերին մեջ: Ղապարոսը կարող էր մեզմէ որևէ մեկը ըլլալ. ավելին՝ ան կներկայացնէ մարդկությունը անհատի մը շոշափելի և տեսանելի կերպարին ներքև: Ինչպես ինք կյանքի եկավ, լսելով Հիսուսի փրկչավանդ ձայնը, մենք ալ հրավիրված ենք նույն ուղիով ընթանալ. լսել մեր Տիրոջ կոչը, թողափել մեղաց քորձը և ընդունիլ հարության հույսը:

Մեր մայր Եկեղեցվո թարգմանիչներու հույլին պատկանող, այլև երգիչը Աստվածաշունչին՝ Կայեցի Ներսես Հայրապետը, այսպես ընդունած էր Ղապարոս հարությունը.

«Ձայնեցեր առ Ղապարոս
Որով ետուր մեռելոց յոյս.
Կենդանութեամբ չորեքօրեայն
Կենդանացան որ յադամայն.
Կենաց ձայնի վերջին փողոյ
Կոչեա զսա յայսմ հողոյ...»¹:

Եկեք ձայնակցինք Շնորհալի Հայրապետին հետ աղոթելով Նորոգողին հնությանց, որպեսպի նորոգե և զվեպ ի խնամս մարդասիրության յուրո: Ամեն:

¹ Ներսես Շնորհալի, Ժամագիրք, էջ 113:



ՊՐՈՖ. ՎԱՐՍՁԴԱՏ ՀԱՐՈՒԹՅՈՒՆՅԱՆ

ՊԱՏՄՈՒԹՅՈՒՆ Ս. ԷԶՄԻԱԾՆԻ ՄԱՅՐ ԱԹՈՌԻ
ՇԻՆԱՐԱՐԱԿԱՆ ԳՈՐԾՈՒՆԵՈՒԹՅԱՆ ԱՄԵՆԱՅՆ
ՀԱՅՈՑ ԿԱԹՈՂԻԿՈՍ ՎԱԶԳԵՆ ԱՌԱՋԻՆԻ
ԳԱՀԱԿԱԼՈՒԹՅԱՆ ՕՐՈՔ (1956—1980)*

ԵՐԵՎԱՆԻ Ս. ՍԱՐԳԻՍ ԵԿԵՂԵՑՈՒ
ՎԵՐԱՆՈՐՈԳՈՒՄ ՈՒ ԲԱՐԵՉԱՐԴՈՒՄ

Հրապարակի կիրճի ձախստիցս վառիթափի գլխին, Երևանի բերդին հանդիման՝ նրա հյուսիսային կողմից, ձորեկոյա տարածության վրա երբեմնի սփռված Չորագյուղի կամ Խնկաձորի (Խնկելոց ձորի) անապատը, որի մասն էր կապում ս. Սարգիս եկեղեցին, թեմական առաջնորդարանի կենտրոնն և կաթողիկոսական իջևանատեղի է եղել: Պարիսպներով շրջապատված նրա ընդարձակ համալիրը պատվով անջատված էր հարավային և հյուսիսային մասերից ու բաղկացած էր երեք եկեղեցիներից (ս. Գևորգ, ս. Հակոբ, ս. Սարգիս), Առաջնորդարանի ու թեմական դպրոցի շենքերից, տնտեսական բնույթի կառուցվածքներից, այգուց, բանջարանոցից և այլն⁶⁰:

Ս. Սարգիս եկեղեցու կառուցման թվականը անհայտ է: Այն ավերվել է Երևանի մեծ երկրաշարժի ժամանակ (1679 թ. հունիսի 4-ին) ու այնուհետև նույն տեղում վերաշինվել է եղեսացի Նահապետ կաթողիկոսի գա-

հակառության տարիներին (1691—1705 թթ.): Թե ինչպիսի՞ն էր այդ եկեղեցին, դժվար է ասել, սակայն ժամանակակցի և թեմի առաջնորդ Հովի. եպիսկոպոս Շահխաթունյանցի վկայությամբ 19-րդ դարի սկզբի դրությամբ այն «յաղագս կարի հնութեանն և վտանգաւոր գոլոյն աղօթատրացն ի նմա ժողովրդոց, ըստ խարխուլ շինուածոյն, յամի 1835 ի ժամանակի պաշտաման մերում հոգեւոր այցելութեամբ տուաք քակել զայն բոլորովին ի հիմանց, հրամանաւ վեհափառ կաթողիկոսին, և նոր ի նորոյ, ի նոյն տեղոջն ընդարձակ ևս հիմնադրութեամբ, տուաք կառուցանել զորմունսն, որոյ շէնք հանդերձ չորս սեամբքն ի տաշածոյ և ի հասարակ քարանց և ի կրոյ հասանի գրեալ թէ ի կատար յայս ամ»⁶¹:

Այս տեղեկության վրա ս. Սարգիս եկեղեցու վերաշինությունը իրականացել է Հովհաննես Կարբեցի կաթողիկոսի հրամանով 1835—1842 թթ.:

Եկեղեցու այդ շենքն էլ պահպանվել է մինչև մեր ժամանակները: Հանդիսանալով Երեմանի գլխավոր և առաջնորդանիստ եկեղեցին՝ Վազգեն Ա կաթողիկոսի օրով այն ենթարկվեց հիմնական վերակառուցման և բարեկարգման: Վերակառուցման նախագիծը պատրաստեց ճարտարապետ Ռ. Իսրայելյանը: 1972 թվականի սկզբին նախագիծը հավանության արժանացավ Վեհափառ Հայրապետի և ճարտարապետների հանձնաժողովի

* Շարունակված «Էջմիածին» ամսագրի 1983 թվականի № 6 ժԱ—ԺԲ-ից և 1984 թվականի № 6 Ա—Գ-ից:

⁶⁰ Տես Կարո Ղաֆադարյան, «Երևանի միջնադարյան հուշարձաններ», Երևան, 1975, էջ 87—90. Ռուբեն Ավագ քահանա Մարտիրոսյան, «Երևանի սուրբ Սարգիս եկեղեցին», «Էջմիածին», 1974, № ԺԲ, էջ 22—27:

⁶¹ Յովհաննես եպիսկոպոս Շահխաթունյանց, Բնասոր, նույն տեղ, էջ 148:

կողմից: Ըստ այդ նախագծի եկեղեցու հին շենքը իր բոլոր կոնստրուկտիվ մասերով (պատերը, մույթերը, ծածկը կրող կամարներն ու թաղերը, ինչպես նաև ավագ խորանն ու զմբեթարդը, ավանդատները իրենց ծածկերի հետ միասին) հիմնականում պահպանվեցին:

Վերնաշենք ունենալու պահանջը թելադրում էր նրա համար հենարանների մի նոր համակարգ ստեղծել, որպեսզի առաջացող ծավալն իր ծանրությամբ չնստի եկեղեցու հին շենքի վրա: Նախագծում այս խնդիրը ստացել է մի այսպիսի նպատակահարմար լուծում, որը, ծառայելով հանդերձ նշված խնդրին, միևնույն ժամանակ հնարավորություն էր ընձեռում հիմնովին բարելավելու եկեղեցու արտաքին ճարտարապետությունը: Համաձայն նախագծի, եկեղեցու արտաքին պարագծով, հին պատերից փոքր-ինչ առաջ դրվելու էր նոր ու տարողունակ (արտաքուստ աներեկոյթ երկաթբետոնյա կմախքով ապահովված) պատերի մի համակարգ, որոնք իրենց վրա պիտի կրեին վերնաշենքի հիմնական ծանրությունը: Դրա հետ մեկտեղ, այդ նոր, սրբատաշ տուֆաքարով երեսապատված պատերը պիտի քողարկեին եկեղեցու հին, ոչ բարետես պատերը՝ սվաղված հարթություններով ու կիսագլանաձև որմնամույթերով: Վերջիններիս փոխարեն, պատերի արտաքին հարթությունները ուղղաօրոշ մշակման են ենթարկվում հռիփսիմեստիպ (հատակագծում առաջնաձևն ու վերևում կամարներով պսակված) խորշերի միջոցով (4-ական երկայնական և 2-ական լայնական պատերին), դրանցով իսկ վերակառուցվող եկեղեցին ավելի հայաշունչ դարձնելու նպատակով:

Նախագծով պահպանված են եկեղեցու երեք (արևմտյան, հարավային և հյուսիսային) մուտքերը, սակայն դրանցից առաջինը՝ որպես գլխավոր մուտք, ճարտարապետորեն ավելի ճոխ և գեղեցիկ է լուծված: Ֆունկցիոնալ (դեպի վերնաշենքը մուտք ունենալու), ինչպես նաև ճարտարապետական (արևելյան ճակատի մշակումը հարստացնելու) նկատառումներով, մի դուռ էլ բացվում է ավագ խորանի հետնամասից՝ արևելյան կողմից: Նրան կից հարթակից պատի հաստության մեջ ամփոփված ոլորտն աստիճաններով կարելի է բարձրանալ հյուսիս-արևելյան ավանդատան վրա տեղավորված սանդղատունը, իսկ այստեղից՝ վերնաշենքի ընդարձակ (18×20,5 մ. չափերի) սրահը: Նույն նպատակին են ծառայում նաև եկեղեցու ներսում, հարավ-արևմտյան կողմում տեղավորված սանդղաղբները: Վերնաշենքի ավելացումով բնականաբար պահանջ առաջացավ հիմնովին քանդել-վերացնել նախկին անշուք թրմ-

բուկն ու զմբեթը, փոխարենը կառուցելով առավել բարձրադիրն ու գեղեցիկը: Վերջինիս հենարան է ծառայում սրահի համարձակորեն իրականացված ծածկի երկաթբետոնյա թաղանթը (հեղինակ՝ ինժեներ Ռ. Մանուկյան), որի կենտրոնից, նախկինի տեղում ու նրանից ավելի բարձր, վեր է խոյանում նոր զմբեթն իր սլացիկ ծավալով:

Վերնաշենքը զմբեթի հետ միասին եկեղեցու շենքին հաղորդում է վերձիգ համաչափություններ և որոշ չափով բարելավում նրա հնչեղությունը:

1971—1976 թթ. ս. Սարգիս եկեղեցում կատարված վերակառուցման աշխատանքներն ընթացան ներսից ու դրսից միաժամանակ: Բոլոր այդ տարիներին եկեղեցին անընդմեջ շարունակեց գործել, և այդ հալածմանը որոշ չափով դժվարացրեց ու դանդաղեցրեց աշխատանքները, մանավանդ՝ ներսում: Եկեղեցու ներսում իրականացվելիք աշխատանքները հիմնականում բարեկարգման բնույթ էին կրում, աշխատանքներ, որոնք անհրաժեշտ դարձրին որոշ փոփոխություններ մտցնել ինտերյերում:

Համաձայն նախագծի եկեղեցու ներսում նախատեսվում էր կատարել հետևյալ աշխատանքները.

ա. Հնարավորին չափ կրճատել եկեղեցու դասի լայնությունը, դրա հաշվին մեծացնել ստյանի չափերը: Վերջինիս և արևմտյան մասի հատակների բարձրության տարբերությունը (մեկ աստիճանով) վերացնել, այսինքն ողջ հատակը բերել մեկ բարձրության և ամբողջապես սալարկել մարմարով:

բ. Վերափոխել մույթերի և որմնամույթերի հատակագծում կոր ձևերը: Դրանց անկյուններում հավելումներ կատարելու միջոցով դարձնել հատակագծում քառակուսի (մույթերը) և քառանկյունի (որմնամույթերը): Մույթերը մինչև խոյակների տակ, իսկ ներքին պատերը 1,40—1,50 մ. բարձրությամբ երեսապատել կարմիր գույնի գրանիտով կամ մարմարով:

գ. Հարավ-արևելյան ավանդատան մակերեսն ընդարձակել ի հաշիվ արևելյան և հարավային պատերի հին շարվածքի վերացման՝ կամարների տակ ամփոփելով առաջացած խորշերը: Փակել ավանդատան արևելյան լուսամուտը և նրա տեղում ստեղծել խորշ՝ մեջը ս. Սարգիս պատկերը տեղավորելու համար: Փոխարենը բացել լուսամուտ ավանդատան հարավային պատում և համապատասխանաբար ձևավորել դրսից ու ներսից:

դ. Եկեղեցու բնական լույսն ավելացնելու նպատակով վերակառուցել հարավային մուտ-

քի վերևի լուսամուտները, մինչև մեկ մետր բարձրացնելով չափերը: Ներսից ձևավորել հարավային և հյուսիսային մուտքերը:

Ե. Վերակառուցել արևմտյան կողմից գոյություն ունեցող փայտաշեն պատշգամբը և իրականացնել այն երկաթբետոնի միջոցով: Բակրիքներն իրականացնել կոփածո երկաթե ճաղերով՝ դրանց ձևերը կապելով դասն ու ատյանը միմյանցից անջատող բակրիքի ձևերին⁶²:

Եկեղեցու պատերի, կամարների ու թաղակապ առաստաղի մշակման միջոցով եկեղեցու ներքնամասին բարեփոխություն հաղորդել հանդիսացավ վերակառուցման առաջնակարգ հարցերից մեկը: Նպատակահարմար համարվեց ծեփից ապատել ու մաքրել կարմրագույն-գորշ տուֆաքարով կանոնավոր շարվածք ունեցող կամարներն ու որմնամույթերը՝ վերստին սկաղելով միայն թաղակապ առաստաղը: Տուֆակերտ մասերի հետ գունային միասնություն ստեղծելու նպատակով, ներքին պատերը 1,57 մ. բարձրությամբ, իսկ մույթերն ու որմնամույթերը մինչև կամարների տակ երեսպատվեցին խտական Կարբարայի մարմարե սալերով:

Եկեղեցու վերակառուցումը դեռ չէր ավարտված, երբ 1973 թ. սեպտեմբերի 8-ին վախճանվեց նախագծի հիմնական հեղինակ՝ մեծատաղանդ արվեստագետ, ՍՍՀՄ ժողովրդական ճարտարապետ ու Պետական մրցանակի դափնեկիր ճարտարապետ Ռաֆայել Իսրայելյանը: Հաջորդ տարվա մայիսի 30-ին, անդրադառնալով նախագծի հարավ-արևելյան խորանի ներքին ձևավորման հարցին՝ հանձնաժողովը անհրաժեշտ գտավ «Անփոփոխ պահել Ռ. Իսրայելյանի կողմից կատարված ս. Սարգիս եկեղեցու հարավ-արևելյան խորանի ձևավորման էսքիզը, փակելով արևելյան լուսամուտը և կենտրոնում նախագրծելով կտր վերջավորություն ունեցող ճարտարապետական էլեմենտ՝ վրան սրբապատկեր նկարելու համար»:

Վերակառուցումից հետո հարավ-արևելյան խորանն իր հյուսիսային պատի կամարակապ փույգ խորշերով, արևելյան պատում խորշի վեջ ամփոփված հեծյալ ս. Սարգիսը պատկերող նկարով ու վերին հարթության վրա տեղավորված վարդյակով ու խաչով և պատերի ներքնամասերը Կարբարայի կարմիր մարմարով երեսապատմամբ ստեղծվեց բավականին արտահայտիչ գունային ներդաշնակություն:

Ճարտարապետական հարդարանքի համա-

պատասխան միջոցներ կիրառվեցին նաև հյուսիս-արևելյան խորանում:

Եկեղեցու ներքին բարեկարգման աշխատանքներում կարևոր հանգամանք հանդիսացավ գմբեթատակ առաջաստները թեմատիկ բարձրաքանդակներով պատելը: Ճարտարապետ Ա. Գալիկյանի առաջարկով չորս առաջաստներում բնական մեծությամբ վերարտադրվեցին պատմական Վայոց ձորի լավագույն կոթողներից մեկի՝ Արենիի եկեղեցու (ճարտարապետ՝ Մումիկ, 1321) առաջաստների քանդակային սիմվոլները: Դրանք հաջողությամբ իրականացրին քանդակագործներ Ս. Դոնդոնյանը և Մ. Հարությունյանը:

Առաջաստների բարձր, գմբեթի թմբուկի հիմքի օղակաձև պատին քանդակվեց «Փառք ի բարձունս Աստուծոյ եւ յերկիր խաղաղութիւն, ի մարդիկ հաճութիւն» արձանագրությունը:

Պատերին փորագրվեցին նաև երկու այլ արձանագրություններ՝ ճարտարապետ Բ. Արսումանյանի մշակած նախագծերով: Հյուսիսային պատի վրա, դուռն ամփոփող կամարից բարձր, շրջանակով երկված ու երկու կողմերից վարդյակներով պարզարված հարթության վրա քանդակագործներ Հ. Համբարձումյանի և Ե. Հովհաննիսյանի կողմից փորագրվեցին հայտնի շարականի խոսքերը. «Առաւօտ լուսոյ, արեգակն արդար, առ իս լոյս ծագեալ»: Մյուս շինարարական արձանագրությունը կատարվեց արևմտյան դռան բարավորի վրա (բովանդակությունը կրելով վերջում):

Ներքին բարեկարգման մաս կապվեց նաև երկաթակուռ ջահը (հեղինակ՝ Վ. Օհանյան): Գմբեթարդից ներքև, մինչև հատակ, աբսիդի կիսաշրջան պատը երեսապատվեց բաց գույնի մարմարյա սալերով ու դրանց ֆոնի վրա առավել պարզորոշ ուրվագծվեց առաջներում շինված սեղանը:

Ներքին բարեկարգման աշխատանքների փուլընթաց, վերակառուցման աշխատանքները էին ընթանում նաև եկեղեցու արտաքին մասում: Այստեղ ավարտվեցին գմբեթի, արևմտյան կողմի փույգ պանգակատների և կտուրի ծածկի շինարարական աշխատանքները: Այս սկսվեց ձևավորման քանդակագործությունը:

Ըստ վերակառուցման նախագծի, քանդակային հորինվածքները առավել հարստությամբ տեղ ալիտի գտնեին եկեղեցու արևմտյան՝ ձորահայաց ձևավորի վրա: Նախատեսվում էր գլխավոր դռան միակտուր քարից իրականացված բարավորի վրա տեղավորել Աստվածամոր, դրանից վերև գտնվող հարթության վրա՝ Գաբրիել և Միքայել հրեշտա-

⁶² Հետագայում նպատակահարմար համարվեց բակրիքներն իրականացնել քարով ու քանդակագործել:

կապետների, վերջիններին միջև՝ խաչապարոյ վարդայանի բարձրաքանդակները, իսկ ճակատի վերնամասում, պոյգ խորշերից բարձր, ճակատի ամբողջ լայնքով փորագրել վարդաքանդակային մի գոտի: Վերոհիշյալ վարդաքանդակների էքսիկները մշակեց քանդակագործ Արտ. Հովսեփյանը (մասամբ օգտագործելով Աղթամարի տաճարի մոտիվները), իսկ դրանք քանդակեց քարագործ վարպետ Արամ Սահակյանը: Նույն Արտ. Հովսեփյանի էքսիկով պատրաստվեց ու տեղադրվեց փայտյա քանդակապարոյ դուռը: Քանդակապարոյվեցին նաև դռան ջուրջը գտնվող պատերի հարթությունները:

Հավարտ ս. Սարգիս եկեղեցու վերակառուցման աշխատանքների, արևմտյան դռան բարավորի ներսի երեսին փորագրվեց հետևյալ արձանագրությունը.

«Ի Հայրապետութեան Տ. Տ. Վազգենի Ա Կաթողիկոսի Հայոց և փոխանորդութեան տ. Կոմիտասի արքեպիսկոպոսի ի հիմանէ վերակառուցաւ և բարեկարգեցաւ սուրբ Սարգիս եկեղեցիս արդեամբ Լոնտոնաբնակ Գեորգի և Յովհաննէսի որդւոցն Սարգսի եւ Աստղիկի Քիրքճեան յամի Տեառն 1976 յամսեանն հոկտեմբերի ի վալետումն հաւատացելոցն քաղաքամայր Երեւանի. ճարտարապետք Ռաֆայել Իսրայէլեան եւ Արծրուն Գալիկեան»:

Վերակառուցված եկեղեցու օծման հանդիսավոր արարողությունը տեղի ունեցավ 1976 թ. նոյեմբերի 3-ին:

Ս. Սարգիս եկեղեցու վերակառուցմամբ, ինչպես նոյն իր քարոզում Վեհափառ Հայրապետը, «քաղաքամայր Երևանն օծովեց մի նոր վարդով, հայկական ճարտարապետության մի նոր կոթողով, աղոթքի սքանչելի նոր սրբավայրով»:

Ս. ԳԱՅԱՆԵՐԻ ՏԱՃԱՐԻ ՎԵՐԱՆՈՐՈԳՈՒՄ ԵՎ ՎԱՆՔԻ ՇՐՋԱՊԱՏԻ ԲԱՐԵԿԱՐԳՈՒՄ

Հետևելով Կոմիտաս կաթողիկոսի օրինակին, նրա հաջորդը՝ Եգր Կաթողիկոսը (630—641), 630 թ. մի նոր եկեղեցի է կառուցում նահատակված մյուս կույսի՝ Գայանեի և իր երկու ընկերոսիների գերեզմանների վրա, ս. Գրիգոր Լուսավորչի կողմից շինված վկայարանի տեղում: Այդ մասին է դարի Սեբեոս պատմիչը հաղորդում է. «Իսկ ապա Հայրապետն Եգր զվկայարան սրբոյ Գայանեայ, զոր երբեմն խրթին և մթին էր վնա շինեալ, քակեալ պայն՝ ևս ընդարձակագոյն և պայծառագոյն վնա շինեաց, կոփածոյ քարամբք և կրով ձուլելով, և արտաքուստ յարդարելը կա-

յանս բնակութեան քահանայական դասուց ի պաշտօն աստուածային խորանին»⁶³:

Թե այնուհետև ինչպիսի վերանորոգությունների է ենթարկվել եկեղեցին, այդ մասին տեղեկությունները վերաբերում են միայն ուշ միջնադարին ու դրանց աղբյուրը նորից Առաքել Դավրիժեցին է: Պատմելով Փիլիպպոս կաթողիկոսի վերաշինական գործունեության մասին՝ նա հայտնում է. «Եւ յետ ամենայն շինուածոցն էջմիածնի, զոր սուրբ Հայրապետն Փիլիպպոս արար, այնուհետև ձեռն ի գործ էարկ, զի և տաճարս սրբուհի կուսանացն Գայանեայ և Հռիփսիմեայ նորոգեցեալ»⁶⁴:

Այդ ջրջանում եկեղեցու վիճակի մասին նույն գրքում կարդում ենք. «...սրբոյ Գայանեայ կուսի տաճարն առաւել աւերեալ էր, զի տակիքն բովանդակ իջեալ էր, միայն ջուրջանակի որմունք և չորեքին սիւնքն կային կանգուն գլուխն ի բաց, և յատակք որմոցն աւառ և անդ ծածկեալ և խրամատեալ, որոց արար նորոգման սկիզբն կաթողիկոս տէր Փիլիպպոս, մեծաիղձ կարօտի և ջանի, և բազում գանձս ծախելով նորոգեաց գեղեցկաշէն, ի հիմանց մինչև պագագթն զմբթին. յորոյ վերայ կառուցին վնշանս տէրունական խաչին»⁶⁵:

Մեկ այլ տեղ, նորից խոսելով երկու վկայարանների վերաշինության մասին, Դավրիժեցին հայտնում է այդ աշխատանքների կատարման ժամանակը. «Եւ սկիզբն և կատարումն երկուց վկայարանացս սրբուհւոցն Գայանեայ, և սրբուհւոյն Հռիփսիմեայ,—գրում է նա,—եղև յամս երիս. ՌՃ թուին սկիզբն արարին նորոգութեան, և ի ՌՃԲ թուին վերծան ի գործելոյ. բազում ծախիւք և յուով աշխատութեամբ շինեալ կատարեցին ի փառս Քրիստոսի և սրբոց վկայից նորա»⁶⁶: Նույնը վկայված է տաճարի դրսի, հարավ-արևմտյան կողմի պատին դրոշմված վիմական արձանագրության մեջ, որտեղ ասված է. «ՌՃԱ թուին նորոգեցաւ եկեղեցիս և շինեցաւ կաթողիկէս»⁶⁷:

Այնուհետև Փիլիպպոս կաթողիկոսը վերաշինական աշխատանքների վերակացու էր նշանակել «աբեղայ ուն Յովհաննէս անուամբ, այր արդիւնատր գործօնեայ, և խորհրդական խորհրդով...», որը նաև պեղում-

⁶³ Պատմութիւն Սեբեոսի եպիսկոպոսի, նույն տեղ, էջ 310:

⁶⁴ Առաքել վարդապետ Դավրիժեցի, նույն տեղ, էջ 226:

⁶⁵ Նույն տեղ, էջ 326:

⁶⁶ Նույն տեղ, էջ 329:

⁶⁷ Յովհ. եպիսկոպոս Ըսեփաթունեանց, Ա հատոր, էջ 274:

ներ է կատարել եկեղեցու հատակում ու հայտնաբերել 3 կույսերի գերեզմանատները⁶⁶:

Գայանեի վանքում շինարարական նոր աշխատանքներ են կատարվում ավելի քան կես դար հետո, 1688 թվականին, Եղիապար կաթողիկոսի գահակալության տարիներին: Տաճարի արևմտյան պատին կից կառուցվում է կամարակապ ու 3 գմբեթներով պսակված գավիթ, որի երկարությունը գերազանցում է եկեղեցու լայնությանը ու այդ պատճառով դուրս է շեջտված եկեղեցու հարավային և հյուսիսային պատերի նկատմամբ: Գավթի երկու ծայրերին կառուցվում են փոքր պանդակատներով պսակված երկու խորաններ, մեկը սուրբ Պետրոս, մյուսը սուրբ Պողոս առաքյալների անուններով: Պարսպապատվում է վանքի շրջապատը, կառուցվում են բնակարաններ հոգևորական դասի համար ու տնտեսական շենքեր⁶⁷:

Այս ժամանակ կատարված վերաշինական աշխատանքների շնորհիվ հիմնովին վերականգնվել է ս. Գայանեի տաճարը ու այն կանգուն է մնացել մինչև մեր օրերը:

Գայանեի վանքում իրականացված շինարարական հետագա աշխատանքները վերաբերում են 19-րդ դարի վերջին: Դրանք տեղի են ունեցել սկսած 1872 թվականից, երբ Վահան վարդապետ Բաստամյանցը՝ ուսումնական և կրթված մի նորընծա հոգևորական (ավարտած Մոսկվայի Լազարյան ձեմարանն ու համալսարանի իրավաբանական ֆակուլտետը, արժանացած թեկնածուի գիտական աստիճանի) նշանակվում է Գայանեի վանքի վանահայր:

1872 թվականին, Վահան վարդապետ Բաստամյանցի վանահայրության օրով և նրա ջանքերով կատարվում են վերաշինական մի շարք աշխատանքներ⁶⁸:

Այնուհետև Վահան վարդապետը կատարում է նաև բարեկարգման բնույթի՝ չգալի աշխատանքներ⁶⁹:

Վազգեն Ա կաթողիկոսի գահակալության շրջանում, 1959 թվականից սկսած, վերանորոգչական աշխատանքներ կատարվեցին ս. Գայանեի տաճարում: Տաճարի արտաքին ձևկառուցներում ծրագրվում էր իրականացնել հետևյալ միջոցառումները. հարավային ճակատում վերաշարել կենտրոնական լուսամուտի շրջակայքի խորխոված շարվածքը, արևելյան ճակատում վերաշարել ճակտոնի

ձախ անկյան շարվածքը, ամբողջապես ամրացնել այս և հարավային կողմի գետնախարիսխը: Բացի այդ, հարավային պատում անհրաժեշտ էր նկատվում կատարել մասնակի ամրացումներ: Արևմտյան ճակատում կարիք էր զգացվում քանդել-վերացնել եզրապատերը՝ իրենց ճաղերով և արևմտյան մուտքի սվաղված երեսակալը, ինչպես նաև վերաշարել կամարակապ գավթի դեպի հյուսիս ուղղված ճակատի կամարի լիցքը:

Տաճարի ներսում նախատեսվում էր ամենուրեք հեռացնել պատերի ծեփը և մաքրել կրաշորով ծածկված մակերեսները, պատերի և հատակի քայքայված քարերը փոխարինել նորերով, նույն կարգի աշխատանքներ կատարել խորանում, նրա սեղանը փոխարինել նորով, փոխել բոլոր պատուհաններն ու դռները:

Բացի վերը թվարկվածից, պետք էր ցանկապատել վանքի շրջապատը ու նորոգել տաճարի պատի մոտ գտնվող աղբյուրը: Նպատակահարմար համարվեց տաճարի հետ կապված աշխատանքները հանձնարարել հուշարձանների գիտավերանորոգման արվեստանոցին, իսկ վանքի շրջապատի ցանկապատումը՝ իրականացնել Մայր Աթոռի ճարտարապետ Ա. Գալիկյանի ղեկավարությամբ:

Ս. Էջմիածնի Մայր Աթոռի ճարտարապետների հանձնաժողովը բազմիցս անդրադարձել է ս. Գայանեի տաճարում կատարվելիք վերաշինական աշխատանքներին:

Ս. Գայանեի վանքի շրջապատի ցանկապատումը կատարվեց տեղական տուֆով: Վանքի շրջապատի հյուսիսային (փողոցի) կողմի և ս. Էջմիածնի վանքի միաբնակության գերեզմանոցի պարսպապատումը իրականացվեց ճաղերի միջոցով, որպեսզի հեռվից դիտելիս ս. Գայանեի տաճարն ու գերեզմանատունը չծածկվեն խոլ պատի ետևում:

Ս. Գայանեի եկեղեցու ներսում ավագ խորանը փոխարինվեց նոր խորանով: Հարմար նկատվեց այստեղ տեղադրել ս. Էջմիածնի Մայր տաճարից հանված իջման սեղանի մարմարյա պոնապարդ գմբեթը: Իսկ խորանի վրա պետեղվեց այս առթիվ մասնավոր կերպով պատվիրված Աստվածամոր նկարը՝ Հիսուս մանուկը գրկին (գործ՝ նկարիչ Հրանդ Ավագյանի):

Տաճարի ներսում աշխատանքներն ընթացան համաձայն ընդունված ծրագրի: Հարավային և հյուսիսային պատերի արևմտյան ստորին հատվածներում ու արևմտյան կողմի գմբեթակիր կույզ մույթերի ներքևի շարքերում քայքայված և կոնստրուկտիվ տեսակետից ոչ պիտանի դարձած բոլոր քարերը փոխարինվեցին նորերով: Ամբողջությամբ

⁶⁶ Նույն տեղ, էջ 275:

⁶⁷ Նույն տեղ, էջ 276:

⁶⁸ Աբել արքեպիսկոպոս Մխիթարեանց, նույն տեղ, էջ 46—47:

⁶⁹ Նույն տեղ, էջ 47:

նորոգվեց հատակի սալածածկը: Այնուհետև տաճարի ներսի (ներառյալ արևելյան աբսիդը, խորաններն ու ս. Գայանեի դամբարանը) պատերն ու հարթությունները ամբողջովին մաքրվեցին ծեփի մնացորդներից և կրաշորի հետքերից:

Այս բոլորից հետո կատարվեց նաև տաճարի կտուրի նորոգությունը: Կտուրի սալածածկի նորոգումը կատարվեց պատշաճ խրամով, կիրառելով ջրի ներթափանցման դեմ պահանջվող միջոցառումներ:

Այնուհետև ս. Գայանեի վանքում կատարվեցին բարեկարգման որոշ աշխատանքներ: Դրանց թվին են պատկանում դարպասի ստեղծումը հյուսիսային ցանկապատում, ուշ միջնադարյան աղբյուրի ջրհորի մաքրումն ու նորոգումը, եկեղեցու հյուսիսային պատին կից վանական գերեզմանոցի բարեկարգումը և որոշ գերեզմանաքարերի փոխարինումը նորերով, հողաշեն կիսավեր շենքերի վերացումը տաճարի արևմտյան կողմի աշխարհիկ շենքերի հյուսիսային ծայրում, նոր աղբյուրի կառուցումը և այլն: Աղբյուրը կառուցվեց ճարտարապետ Ռաֆայել Իսրայելյանի նախագծով: Կառուցման մասին նրա ճակատալին պատին փորագրված է հետևյալ արձանագրությունը.

«Շինեցաւ աղբիւրս այս ի յիշատակ Աննիկի Դերձակեան Սերոբեան ծնեալ ի Կ. Պօլիս յամի Տեառն 1896 և վախճանեալ ի Նիւ-Եորք 1959 ամի արդեամբ քեռ նորա Հրանդի»:

Ս. Գայանեի վանքի բակում կառուցվեց նաև մատաղատուն: Ղապարապատի բակում տարիներ շարունակ օգտագործվող մատաղատունը խիստ մոտ էր գտնվում Մայր տաճարին: Այդ պատճառով էլ ավելի հեռու տեղում մի նոր մատաղատուն ստեղծելու հարցը անհետաձգելի էր դարձել ու ընտրությունն ընկել էր ս. Գայանեի վանքի բակի վրա:

Նոր մատաղատունը գտնվում է վանքի հարավային պարսպին մոտ, արևմտյան կողմի միաբանական շենքի շարունակությունը կապմող հողամասի վրա:

Ս. Գայանեի վանքում իրականացված վերանորոգման, շինարարական և բարեկարգման աշխատանքները հիշատակվածով չէին կարող սահմանափակվել, քանի որ տաճարի հետագա պահպանության շահերը պահանջում էին իրականացնել մի շարք անհետաձգելի միջոցառումներ: Այս կապակցությամբ 1976 թ. մարտի 11-ին մի հանձնաժողով՝ բաղկացած Հայկ. ՍՍՀ Պետշինի հուշարձանների պահպանության վարչության գիտական

խորհրդի և ս. Էջմիածնի Մայր Աթոռի ճարտարապետների հանձնախմբի անդամներից, տեղում հանգամանորեն ծանոթանալով տաճարի վիճակին՝ մշակեց հետագայում կատարվելիք լրացուցիչ աշխատանքների ծրագիր:

Համաձայն այդ ծրագրի, նախատեսվում էր իրագործել հետևյալը.

ա. Եկեղեցու շուրջը, մի շարք տեղերում, հողը փորել-իջեցնել մինչև հատակը, պարզել հին շինության հիմքերի վիճակը, անհրաժեշտության դեպքում ձեռնարկել ամրացման աշխատանքներ:

բ. Իջեցնել եկեղեցին շրջափակող մայթերը հարավային և արևելյան կողմերում երեք, իսկ հյուսիսային կողմում՝ մեկ աստիճանով:

գ. Մայթերի իջեցման աշխատանքներն իրականացնել հատված առ հատված: Միաժամանակ, համապատասխան չափով, նույն տեղերում իջեցնել գոյություն ունեցող տապանաքարերը:

դ. Հեռացնել նախագավթի ներսում (առագաստների ու գմբեթի վրա) գաջի սվաղի մնացորդները:

ե. Մաքրել-ամրացնել նախագավթի որմնաքարերը:

զ. Շարունակել և ավարտել տաճարի բոլոր պատերի մեջ շաղախի ներարկումը:

է. Տաճարի ներսում քանդել-վերաշարել հարավ-արևմտյան կողմի խարխված թաղածածկը, անհրաժեշտ մասերը լրացնել նոր քարերով: Լրացնել պատերի և մույթերի քայքայված ու պակասող քարերը՝ հնարավոր դեպքում կցոններով:


ը. Դրսի կողմից կատարել ծածկերի ամրացումներ, վերանորոգել վեղարի ծածկասալերը:

1976 թվականի երկրորդ կեսի ընթացքում, մինչև տարեվերջը, իրականացվեցին վերը շարադրված ծրագրի ա-ե կետերը:

Առանձնապես բարերար ազդեցություն ունեցավ տաճարի շուրջը եղած մայթերի իջեցումը: Այն ոչ միայն ապահովեց հիմքերը խոնավության ներծծումից, այլև վերականգնեց նախկին համաչափությունները և ավելի բարեկապմ դարձրեց եկեղեցին:

1958 թվականին ս. Գայանեի եկեղեցու վերաշինության սկզբնական աշխատանքների համար ֆրանսահայ գաղութը տրամադրեց կարևոր մի գումար: Այս, 1977—1979 տարիներին տաճարի ամբողջ ծածկը և գմբեթները հիմնովին վերանորոգվեցին նոր քարապատումով լոնդոնահայ Հարություն Մուրաֆյանի նվիրատվությամբ:

(Շարունակելի)



ԽՐԻՄՅԱՆ ՀԱՅՐԻԿ ԱՐԾԻՎ ՎԱՍՊՈՒՐԱԿԱՆԻ

Հայ Եկեղեցու և ժողովրդի պատմության մեջ 19-րդ դարի երկրորդ կեսից սկսած մինչև 20-րդ դարի առաջին տարիները Խրիմյան Հայրիկը՝ հանդիսացավ ամենաականավոր լեմբերից մեկը։ Նա եղավ Վարագա վանքի վանահայր, Կոստանդնուպոլսի հայոց Պատրիարք, Ամենայն Հայոց Կաթողիկոս։ Բացի իր վարած հոգևոր բարձր պաշտոններից, նա մինևույն ժամանակ հասարակական-քաղաքական գործիչ էր, մանկավարժ, գրող և բանաստեղծ, թերթի խմբագիր և գրքի՝ հեղինակ, սովորաբար հիմնադիր, լուսավորության տարածիչ, մեկ խոսքով՝ հայ մշակույթի պաշտպան, գիր ու գրականության քաջալերող և վերջապես ջերմ հայրենասեր, բացառիկ մի անձնավորություն։

Վասպուրականի Արծիվը ծնվել է 1820 թ. ապրիլի 4-ին Արևմտյան Հայաստանի պատմական Վան քաղաքում։ Սովորել է Վասպուրականի Լիմ և Կոտուց վանական դպրոցներում, որտեղ ուսացել է հոգևոր հիմնական կրթություն։ 1842 թ., երիտասարդ հասակում, նա մեկնել է Կ. Պոլիս և զբաղվել ուսուցչությամբ ու գրականությամբ։ 1847 թ. Խրիմյանն այցելել է Պարսկաստան, Անդրկովկաս և Երուսաղեմ՝ ուսումնասիրելով տեղի հայության և եկեղեցիների վիճակը։ 1848—50 թթ. նա ուսուցչություն է արել Խասպուղի ազգային վարժարանում։ 1851 թ. այցելել է Կի-

լիկիա՝ հատուկ նպատակ ունենալով ուսումնասիրել տեղի հայերի վիճակը։ 1854 թ., երեսուներորս տարեկան հասակում, ձեռնադրվել է վարդապետ հայ ժողովրդին ծառայելու բարի նպատակով։ Հաջորդ տարի Օսմանյան կայսրության մայրաքաղաքում, որտեղ հայկական մի մեծ գաղութ կար, նա հիմնադրեց «Արծիվ Վասպուրական» անունով հայրենասիրական պարբերաթերթը, որը հետագայում տեղափոխվեց Վան, դարձավ շաբաթաթերթ և լույս տեսավ մինչև 1864 թ. Խրիմյանի, իսկ 1872—74 թթ. Մանվել Անանյանի խմբագրությամբ։ Այս թերթը Արևմտյան Հայաստանում հանդիսացավ տպագիր առաջին պարբերաթերթը, որ հանդես եկավ լուսավորության վարձացման և կրթության տարածման ի նպաստ բազում հոգվածներով, հայրենասիրական գրություններով և գավառահայության մեջ թուրքական կեղեքումների և ճնշումների դեմ բողոքներով¹։

Մկրտիչ վարդապետ Խրիմյանը 1856 թ. վերադարձել է իր ծննդավայրը և աշխատել օգտակար լինել տեղի իր հայրենակիցներին։ Նա դարձել է Վարագա վանքի միաբան, ապա՝ վանահայր։ Այստեղ ժամանելուց մեկ տարի հետո հիմնադրել է վանքի Ժառանգա-

¹ Հայկական Սովետական Հանրագիտարան, Երեվան, 1976, հատոր 2, էջ 73։

վորաց զիշերօթիկ դպրոցը՝ նպատակ ունենալով Հայ Եկեղեցուն պարզելու ուսյալ հոգևորականներ, իսկ հայ ժողովրդին էլ՝ կրթված ուսուցիչներ: Նա այստեղ շարունակեց հրատարակել Կ. Պոլսում հիմնադրած իր թերթը:

1862 թ. Նրիմյանին վստահվեց Տարոնի հոգևոր առաջնորդի պաշտոնն ու Ս. Կարապետ վանքի վանահայրությունը: Ժողովրդի ցավերով տառապող այն անձն այստեղ ևս հիմնադրեց Ժառանգավորաց մի նոր վարժարան, ինչպես նաև «Արծիվիկ Տարոնո» երկ-շաբաթաթերթը՝ նրա խմբագրությունը հանձնելով Գարեգին վարդապետ Սրվանձտյանին: Այս թերթը գրեթե առաջինի շարունակությունը հանդիսացավ իր կրթական-լուսավորական և հայրենասիրական բովանդակությամբ: Բացի այդ, թերթի հայրենասեր հրատարակիչները դրանով պայքարում էին քրդական և թուրքական հարստահարությունների դեմ, որոնց գլխավոր պոհերն էին լինում խեղճ հայ գյուղացիները:

Մկրտիչ վարդապետը 1868-ին Մայր Աթոռ Ս. Էջմիածնում օծվեց եպիսկոպոս՝ ձեռամբ Գևորգ Դ. Կ. Պոլսեցի Քերեստեճյան Ամենայն Հայոց Կաթողիկոսի և հաջորդ տարի ընտրվեց Կոստանդնուպոլսի հայոց Պատրիարք, պաշտոն, որ վերադեցրեց մինչև 1873 թ.: Նրիմյանը եղավ Կ. Պոլսի հայոց առաջին պատրիարքը, որ իր բողոքի ձայնը բարձրացրեց Օսմանյան կառավարության դաժան քաղաքականության և թուրք ու քուրդ խուժանների կողմից գործադրվող հարստահարությունների դեմ՝ աշխատելով թեթևացնել Թուրքիայի ներքին զավառների հայության քաղաքական-տնտեսական ծանր վիճակը և ստեղծել կյանքի ու ինչքի ապահովություն: Օրվա քաջակրողով պատրիարքի նախաձեռնությամբ հայոց Ազգային Ժողովը 1872 թ. գարնանը Օսմանյան կառավարության ներկայացրեց մի տեղեկագիր-բողոքագիր զավառահայության դեմ շարունակվող հարստահարությունների մասին:

Նրիմյանի այս հանդուգն քայլն անշուշտ մեծ դժգոհություն առաջացրեց թուրք կառավարական շրջանակներում, ինչպես նաև մայրաքաղաքի հայ հարուստների մոտ, որոնք անձնական շահեր ու ակնկալություններ ունեին տիրող դասակարգից և հետադիմական Օսմանյան կառավարությունից, որի պատճառով Նրիմյան պատրիարքը ստիպված եղավ հրաժարվել իր պատասխանատու պաշտոնից:

1878-ին, Բեռլինի վեհաժողովի ժամանակ, որպես Կ. Պոլսի պատրիարք Նրիմյանին հաջորդող Ներսես Վարձապետյանի կարգադրությամբ, Բեռլին մեկնող հայկական պատվիրակության ղեկավար նշանակվեց Նրիմյան

արքեպիսկոպոսը, որ արդեն «Հայրիկ» պատվանունով մեծարվում էր ամբողջ հայ ժողովրդի կողմից, իր ազգանվեր գործունեության և ժողովրդի նկատմամբ ցուցաբերած խիստ հոգատար վերաբերմունքի համար: Նա նախապես էլ եվրոպական «քրիստոնյա» պետությունների դռները բխելով՝ ջանացած էր լուծել հայկական հարցը, գավառահայությունն ազատելու թուրքական և քրդական շարունակվող հալածանքներից ու կեղեքումներից: Սակայն մեծ հոգու ու սրտի տեր Նրիմյան Հայրիկի բոլոր ջանքերն ապարդյուն մնացին, և նա հուսալքված վերադարձավ երկիր:

Վասպուրականի Գավառական ժողովը՝ իր մեծ պավակին 1879 թ. ընտրեց Վանի հայոց առաջնորդ, որտեղ հաջորդ տարի նա հիմնադրեց երկրագործական մի ուսումնարան: Այդ և հետագա տարիներին Նրիմյանն աշակցեց Վանի և Կարինի հայ ազգային-ազատագրական գաղտնի կազմակերպություններին՝ հստակ կերպով տեսնելով, որ դիվանագիտական ճանապարհով այլևս անկարելի է լուծել հայկական հարցը: Այս պատճառով նա գավառից ետ կանչվեց Կ. Պոլիս, որտեղ Ազգային ժողովը 1890 թ., Նրիմյանի նախաձեռնությամբ, երկու տեղեկագիր-բողոքագրեր ուղարկեց թուրքական կառավարության հայկական հարցի վերաբերյալ: Մկրտիչ արքեպիսկոպոսի այս հանդուգն քայլը դուր չեկավ Օսմանյան կայսերական կառավարությանը, որի համար նույն տարում Նրիմյանը Կ. Պոլսից աքսորվեց Երուսաղեմ՝ բնակություն հաստատելով հայոց Սրբոց Հակոբյանց վանքում:

Նրիմյանի անձի շուրջ պտտվող այս բոլոր իրադարձությունները հայ ժողովրդի աչքին այնքան սիրելի դարձրին նրան, որ Մակար Կաթողիկոսի վախճանումից հետո, 1892 թ. մայիսի 5-ին, Ս. Էջմիածնում գումարված համազգային եկեղեցական ժողովը, ձայների մեծամասնությամբ, Ամենայն Հայոց Կաթողիկոս ընտրեց վտարանդիության մեջ գտնվող Վասպուրականի Արծիվին՝ Նրիմյան Հայրիկին, ընտրություն, որ համընդհանուր հավանության արժանացավ:

Նորընտիր կաթողիկոսն ավելի քան 14 միս մնաց Երուսաղեմում՝ սպասելով ցարական կառավարության հաստատման հրամանին, որի ստացումից անմիջապես հետո չորս հոգևորականներից բաղկացած մի պատվիրակություն Մայր Աթոռից ուղևորվեց Երուսաղեմ՝ Նրիմյան Հայրիկին պաշտոնապես և հանդիսավոր կերպով Ս. Էջմիածին հրավիրելու համար: Մկրտիչ Ա. Կաթողիկոսը, ժամանած հրավիրակների հետ, ճամփա ելավ Երուսաղեմից և անցնելով Հոպպե, Ալեքսանդրիա, Կահիրե, Թրիեստ, Վիեննա, Օդեսա,

Սևաստրուպոլ, Բաթումի, Թիֆլիս և Երևան քաղաքներից՝ 1893 թ. սեպտեմբերի 12-ին ժամանեց Ս. Էջմիածին, իր ընտրությունից շուրջ 17 ամիս հետո: Երուսաղեմից Ս. Էջմիածին ճանապարհորդությունը տևեց մոտ երեք ամիս, որի ընթացքում Խրիմյան Հայրիկն արժանացավ հանդիպած և բոլոր միջանկյալ քաղաքների ու բնակավայրերի հայկական գաղութների ջերմ սիրույն և ընդունելությանը: Ճամփին ամենուրեք հայկական եկեղեցիներում մատուցվեցին ս. պատարագներ, տեղի ունեցան գոհաբանական մաղթանքներ, խոսվեցին քարոզներ և կապմակերպվեցին ընդունելություններ նորընտիր Հայրապետի պատվին:

1893 թ. սեպտեմբերի 26-ին Մայր Աթոռում մեծավայելույց կերպով կատարվեց Մկրտիչ Ա Խրիմյան Ամենայն Հայոց Կաթողիկոսի օծման արարողությունը նրա ընտրությունից շուրջ 17 ամիս հետո: Այդ հանդիսավոր արարողությունն առաջին անգամ լինելով կատարվեց բացօթյա, Մայր տաճարի գլխավոր մուտքի առջև հատկապես պատրաստված բարձր պատվամոլային վրա, որպեսզի ներկա բազմահազար ժողովուրդն ականատես լինի օծման այդ հոգեպարար արարողությանը:

Այնուհետև 1893 թվականից մինչև իր վախճանումը, որ տեղի ունեցավ 1907 թ. հոկտեմբերի 29-ին, Խրիմյան Հայրիկը, Կաթողիկոսական գահին բազմած մնաց ավելի քան 14 տարի և կառավարեց Հայոց Եկեղեցին ամենայն խղճմտությամբ և ձեռնհասությամբ, հակառակ հայ ժողովրդի ծանր վիճակին ու կրած մեծ կորուստներին, հատկապես Արևմտյան Հայաստանում: 1895—1896 թթ. Արևմտյան Հայաստանի գավառահայության մեծ կորուստները, ապա Արևելյան Հայաստանի հայկական դպրոցների ու դպրոցական նավածքների կառավարական հսկողության տակ անցնելը, իսկ հետո դրանց գրավման որոշումը, ինչպես նաև Հայ Եկեղեցու ներքին ու արտաքին բազմաթիվ ցավերը մեծապես խոցեցին հայրենասեր և ժողովրդասեր հայրապետի սիրտն ու հոգին:

Խրիմյան Հայրիկը վախճանվեց 88 տարեկան ծերունավարդ հասակում: Նա թեպետև անկարող եղավ այդ բոլոր դժվարությունները հաղթահարելու, սակայն իր ամբողջ կարելին արեց հայ ժողովրդին փրկելու իր ծանր վիճակից:

Խրիմյան Հայրիկի մահվան հիսնամյակի առթիվ, 1957 թ. նոյեմբերի 17-ին, Ս. Էջմիածնի Մայր տաճարում կատարված հայրապետական հանդիսավոր Ս. Պատարագին, Ն. Ս. Օ. Տ. Տ. Վազգեն Ա Ամենայն Հայոց Կաթողիկոսն իր արտասանած քարոզում առաջ.

«Ո՛վ պաշտելի Հայրիկ մեր անմահ, տե՛ս, խաղաղ է երկիրդ քու սուրբ և հայրենի հողը բերրի իր կտրծքը կբա՛նա քու թոռնիկներուդ աշխատանքով արդար, քու երապած ճարտար հնարքներովը արդի գիտության, պտուղներ տալով մեկի տեղ երեսուն, մեկի տեղ վաթսուհի, մեկի տեղ հարյուր: Եվ կլեցվին ամբարները հայ շինականներու, առատ կիտսի ոսկեվազ գինին Արարատյան դաշտի և կբարձրանան քաղաքներն ու գյուղերը մեր ջեն և համայն ժողովուրդը մեր, սուրբ տենդով պեղուն, կապրի շինելով, կշինե երգով, լոյսով, երապով...»²:

1893 թ. աշնանը լրացավ Հայոց Հայրիկի՝ Մայր Աթոռ ս. Էջմիածնում կատարված Կաթողիկոսական հանդիսավոր օծման իննսունամյակը: 1893 թ., երբ Խրիմյան Հայրիկն Երուսաղեմից ճանապարհորդեց դեպի Ս. Էջմիածին, Ճամփին, ապա և հետագա օրերին Մայր Աթոռում նա արժանացավ հայ ժողովրդի բոլոր խավերի ջերմ սերտությանը: Հայրենիքի բոլոր կողմերից հատուկ պատվիրակություններ եկան ներկա լինելու նրա օծման արարողությանը: Բազմաթիվ անհատներ, ազգային-հասարակական գործիչներ, մտավորականներ, եկեղեցական կազմակերպություններ, միություններ և այլն իրենց հեռագրերով, նամակներով և հատուկ ուղերձներով շնորհավորում էին Մկրտիչ Ա Խրիմյան Հայրիկի բազմելը Ս. Գրիգոր Լուսավորչի 16-դարյա պատմական գահի վրա՝ լավագույն մաղթանքներ անելով նորընտիր հայրապետին: Ճիշտ է, որ Ս. Էջմիածնի բոլոր Կաթողիկոսները միշտ արժանացել են հանուր հայ ժողովրդի սիրույն ու ջերմ գնահատանքին, ինչպես այսօրվա Գահակալը՝ Ն. Ս. Օ. Տ. Տ. Վազգեն Ա Հայրապետը, սակայն 1893 թ., ավելի քան հինգ հարյուր տարի իր ազատությունը կորցրած հայ ժողովուրդը մեծ ակնկալիքներ ուներ Վասպուրականի Արծիվից իր հայրենիքի ապատության և նրա ժողովրդի բարօրության համար:

Ստորև հրատարակում ենք մի շարք ուղերձներ՝ գրված 1893 թ. և ուղղված Խրիմյան Հայրիկին պանապան անհատներից և ազգային-եկեղեցական կազմակերպություններից, ցույց տալու համար նախ ժողովրդի մեծ սերը նորընտիր հայրապետի նկատմամբ, ապա նաև, թե ի՛նչ էր սպասում ամբողջ հայությունը Վասպուրականի Արծիվից:

Մայր Աթոռ Ս. Էջմիածնի ձեռագրատանը առևտրանված են այդ ուղերձներից որոշ թվով ձեռագիր գրվածքներ, որոնք հրատարակվում են այսօր առաջին անգամ:

² «Էջմիածին» ամսագիր, 1957, ԺԱ, էջ 46:

1. Ձեռագիր № 653, Գողթան գավառ (Նախիջևան), 20 օգոստոսի 1893 թ. Գողթան գավառի հայ հասարակության կողմից:

Պաշտելի Հայրիկ,

Անսահման է ազգի ուրախությունը:

Այն օրը, երբ Քո մեծ անունը հնչվեց, կենդրոնաձիգ պոռության նման դեպի ինքը քաշեց ամբողջ ազգի սիրտն ու հոգին. ազգի ընտրած պատգամավորները միաձայն Քեզ ձանաչեցին արժանավոր հաջորդ Լուսավորչի Գահին:

Շատ օրեր ու ամիսներ ենք անհամբեր սպասել Քո անձկալի գալստյանը, և ահա՛ այսօր միայն մեր իղձը կատարված ենք տեսնում ու անչափ բախտավոր ենք: Հին Երուսաղեմից նոր Երուսաղեմ մտնելը ոչ թե ձի-թնայաց ճյուղերով ենք ողջունում, այլ որդիական սիրո բուռն պագսմունքով:

Քո դյուրեց անձնավորությունը արդեն գրավական է մեզ համար, որ ազգի իղձերը իրագործվելու են: Միայն Դու ես, Հայրիկ, այն հսկայական պոռության ներկայացուցիչը, որ ընդունակ է Տաճկահայ, Ռուսահայ և Պարսկահայ որդիներից մի հոգի ներշնչել և մի ազգի ընտանիք կապել:

«Ազգույիսում միայն մեկ խաչ բավական է հավատացյալների աղոթքի համար, մնացյալ խաչերը թող ծառայեն ցիտության ու դաստիարակության» ասացիր մեզ 1861 թվին, և ահա այսօր մեր բոլոր խաչերն ու եկեղեցիները հուսով, հավատով ու սիրով Քեզ են սպասում:

Ամենակարող Աստվածը Քո անձնվեր խնամքներին է հանձնում մեր ամենիս սիրտն ու հոգին, որ ուսման, դաստիարակության ու տնտեսության ջավիղներով ապագայում Դու տնենաս «Դրախտի ընտանիք» ու նրա «Հայրիկը» լինիս:

Հայրական սուրբ օրհնությանդ կարոտ Գողթն գավառի, Վերին ու Ներքին Ազուլիս, Ցղնա, Տանակերտ, Հանդամեջ և Քաղաքիկ գյուղերի զոկ համայնքը:

1893 թիվ օգոստոսի 20, Գողթն գավառ:

Վերին Ազուլեցի (78 ստորագրություն)

Տանակերտցի (9 »)

Հանդամեջցի (4 »)

Ցղնայեցի (17 »)

Քաղաքիկեցի (6 »)

Ներքին Ազուլեցի (57 »):

2. Ձեռագիր № 655, Ռուսաճուր (Բուլղարիա), 7 օգոստոսի 1893 թ. Ռուսաճուրի Թաղական խորհրդի կողմից:

Վեհափառ

S. S. Մկրտիչ Ա. Սր. Կաթողիկոս

Աստվածաբալ Հայրապետ

Ամենայն Հայոց.

Հայրապետդ մեր անպուգական,

Ձերդ Վեհափառությունը՝ եթե ներողամիտ ակնարկ մը մեզ ի խոնարհ նվիրեր, բարեբառտ պիտի համարեինք զմեզ նվիրական պարտավորություն մը կատարել. ցնծությամբ զեղուն և շնորհապարտությամբ թաթախուն սրտերու թարգման հանդիսանալ որդիական ամենախոնարհ ակնածությամբ:

Սակայն ո՛վ կարող է արդյոք առանց Ձեր հայրապետական ներողամտությունն հայցելու՝ բանիվ և տկար գրչով՝ ինչպես հանուր Հայկյան վարմիս՝ նույնպես Ռուսաճուրի մեղալենից երախտապարտ սրտից անհուն գոհունակության, շնորհավորության և հափըշտակության հավաստիքն նկարագրելու համարձակիլ՝ նկատմամբ Վեհափառությանդ երկնաձիգ բարեմանությանը և ազգասիրական անթերի արարքներուն՝ զոր ազգն լիովի վայելած է և պիտի վայելե ընդ հար:

Վեհափառ Տեր, մեզ համար չկա անուն մը՝ որ այնքան հուպե ու վառե մեր սրտերն ու լուրջներն՝ որքան Հայրիկ անունն. սույն պաշտելի անունդ այնպիսի դյուրեց պոռություն մ'ունի, որ ամենեն ավելի սառնուցյալ սրտերն անգամ հայրենասիրությամբ կբորբոքե և անհնարին կընե այլևս լուել ու չգործել:

Արի ու բարի հովիվդ Ամենայն Հայոց Հովվապետ ընտրվելու լուրը հրատարակված օրեն՝ անհամբեր սպասյալ կմայինք օրհնությունաբեր ուղևորությանդ դեպի Մայր Աթոռը Առաքելական. ահա փա՛ռք Նախախնամության, կհասնինք այսօր մեր բաղձանաց լըրման. այսօր երկինք հաշտ ակամբ ծագեց հայոցս պայծառ արև մի, փարատեց այն սևաթուր ամպն, որ օր ըստ օրե ստվարանալով կպառնար յուր խավարակոտ մթնոլորտին մեջ խեղդել Հայաստան աշխարհի մեր որբացալ:

Երկնապարզն արեգիդ կենսավետ ճաճանչներն մեր սրտից այնքան խոր թափանցեց ու բորբոքեց՝ որ կհամարձակինք ըսել թե՛ Վեհափառությունդ ոչ միայն ազգիս դարավոր վերքերն ամոքելու, այլ և զայնս իսպառ բուժելու համար ամեն խոչընդոտ առաթուր կոխելով անմահ դյուցազն մի պիտի հանդիսանա. ի մի բան Ձեզմով պիտի դադրի Հայ ազգին աղի հեղեղներն արտասվաց:

Արդ՝ Հայրապետդ մեր չնաջխարհիկ,

Ռուսաճուրի ազգայինքս մեր մատաղերամ մանկանց օրհնությանց ջերմաջերմ մրմունջներն հար և Ձեր թանկագին կենաց՝ տարածելով զԱթոռն Անմահին, որո ամենակարող աջաջալանությունը հովանի կմաղթենք Ձեր մեկ գլխուն, թող Ինքն վարձատրե Վեհափառիդ ազգակեցույց ձեռնարկություններն և պորավիզ լինի ի գործս, և զՁեզ սիրելի Հայրիկ, աշխարհային խորշակներե վերծ կացուցանելով՝ փայլեցուցե իբրև ջախ մշտավառ ի փա-

քառ ազգիս և ի մխիթարություն մեր ամենեցուն:

Իրդիական ամենախոնարհ ակնածանոք՝ կմատչիմք ի համբույր հայրապետական Ս. Աջույդ և Չեր առաքելական օրհնությունն մեր և մերայնոց վերա հովանի կենսատու հայցելով՝

1893 օգոստոս 7

Ռուսճուք

Ե ս ք

Վեհափառ Հայրապետիդ ընդ միջոտ ամենախոնարհ և հնազանդ որդիք

Հայ Գաղթականություն Ռուսճուքի ի դիմաց Թաղ. Խորհրդո

Ատենադպիր Ատենապետ

Ն. Գ. Քեռդանյան Հկբ. Ա. Սարիփնյան:

3. Չեռագիր № 656, Սիվեն (Բուլղարիա), 9 հուլիսի 1893 թ. Սիվենի հայոց օժանդակ ընկերության կողմից:

Դիվան

Օժանդակ Ընկերության Հայոց

Սիվեն

Թիվ 44

Սիվեն, 27/9 հուլիս 1893

Նորին Ամենաբերանյալ Վեհափառություն

Ս. Ս. Մկրտիչ Ս. Կաթողիկոս

Խրիմյան Ածընտիր պաշտոնյա Լուսավորչականդ Կաթողիկեին

Ս. Էջմիածնա և Ածարյալ Հայրիկն բազմաչարչար հայությանս:

Ի Վիեննա.

Սրբազնակատար Հայրիկ.

Ի բազում ժամանակաց հետե օսմ (անյան) փարավոններու բռնություններն Ս. Փրկչին հայրենիքն ապավինող, հայուն «Հայրենյաց Հայրիկ»-ը այսօր Գողգոթայեն զԱյրարատ և Տարայան ժայռե ի Կապիտոլ բարձրացած լինելով, ամեն հայու սիրտ երանության խնծիղներով և ամեն հայ աչեր հակքիսի (?) արտաւութով կարտոսրին, և հայ եկեղեցական պատմությունն յուր հսկա և արյունաներկ էջերն մեծ ակնածանոք կբանա, այս դյուցազնական պաշտելի անձնավորության, զոր հայ ազգն «Հայրիկ» հորջորջմամբ սիրեց միշտ կոչել:

Սուրբաններու բռնությանց դարավոր լուծին տակ հեծող հայն, կարծես յուր ցավոց թեթեւացում մը կզգա այսօր, անողոքելի ճակատագիրն կանխանվեր ք(ե)րտնաց (?) գերի. բեռնակիր Վանցին ու Մշեցին վերակենդանության նոր ոգով մը կկցվին. որքն ու այրին, թշվառն ու չվառն, գերին ու սովյալն, նոթին ու քաղցածն, տնանկն ու գոյավորն, վիրավորն ու մահամերձն, ծերն ու երախայն, հակիրճ ճամբան թորգոմական սերունդն հաղթական կամարի մը տակեն. նոր կենաց ասպարիսի և նոր պատմության մը դարագրելո մեջ թևակոխելով, վերածնության ջրջանի

մը մեջ կմտնեն և երկինք, գոգցես գթալիր առ մեզ, «երջանիկ» մակդիրով կդրոջմե այսօր հայուն աննկուն լայն ճակատն, և հայությունն յուր ներկա քաղաքական անհանդուրժելի կացության մեջ, Չեր Վեհափառությունը, Ածատուր Գահույիցդ վերա բազմած տեսնելով, նվաղկոտ այլ հուսալից աչքերով, ակնապիջ և անքթիթ առ քե՛ւ, առ քե՛ւ միայն կհայի, Ո՛ր Հայրիկդ Հայրենյաց:

Վերնախնամ տեսողությունն, Ասքանազյան Ազնն թրքական փարավոններու մահաստվեր բռնություններն ապատելու, և վամենեսյանս Այրարատյան Ածաճեմ դրախտավայրն փոխադրելու համար, Քրիստոսաճեմ սրբավայրի մը խորեն, Հիսուսական ձայնիլ ի պաշտոն կոչելով զձեր Վեհափառության լուսավորչակոտ Գավազանավդ, ըստ օրինակի երջանկահիշատակ նախորդիդ «Ներսեսի» Ե. Սջտարակեցվո, զմեզ փորձության և հեղափոխության օվկյանեն առ հայրենին մեր վերադարձնել պատվիրելով, մեր վշտաց ու կակիծներու մխիթարիչ հայր կկոչեն զքեզ:

Բա՛ւ է, Հայրիկ, բա՛ւ է, իպուր մեր աղեխարշ կականներովն ջանացինք ի գութ շարժել զԵվրոպան. ի նանիր մեր հոգեմաշ լալիսներովն խլացուցինք անգութ թրքին պոփոցնական երկաթակոտ ականջներն, վայրապար մեր հանապազօրյա աչերանաց ավաղներովն բաղխեցինք երկնից՝ գթության Այ դրունքն և ի վրեպ հուսադիր եղանք մեր ժողովրդանենգ եկեղեցականաց ոմանց, որք յուրյանց անձնական շահուն խեթ զոհեցին ազգիս և եկեղեցվո շահերն: Հոս ցավ, հոս վիշտ. աստ մահ, անդ լաց:

«Առ ո՞ր ուղղեմք զանհուն աղետս Հայ Ազգին. ցե՛րք հուսալիրկ դիմենք առ Էն ի հերկին.»
«Չի՛ Հայրիկ, զի՛ ի քեզ, ի քեզ հուսամք մենք. զքեզ միայն պաշտենք, զքեզ միշտ սիրենք.»

«Մենք հարապատ որդիք քո ենք հավիտյան. մեզ հայրենիք պիտի կամ մահ, Խրիմյա՛ն.»
«Հերիք մեր լացն, մեր կոծն, ալ բա՛ւ է, հերիք. մեր հայրենիքն ի քն խնդրեմք, ո՛ր Հայրիկ:»

Ահա այս են մեր և հանուր հայության իղձըն ու ականկալությունն, մեր գաղափարաց կեդրոնացումը, մեր ջանքերն, մեր վկայումներն, մեր կյանքն ու գոյությունն, մեր պաշտելի Հայրենիքն է միայն, Հայրիկդ հայրենյաց. և այսու մեծ իրավամբ հայկական եկեղեցական համաստեղության մեջ ձեր Վեհափառությունը միայն ճանչնալով մեր կենսասուր Արուսյակն, մեր Մովսեսն, առ քե՛ւ այս, առ քե՛ւ միայն կուղղեմք մեր ցավերն և վրջտերն, մեր խնդիրքն ու հույսն, մեր լացն ու

կոծն. և որդիական ակնածանոք հանուն Իս-
խիմեայու հայ գաղթականության և հանուն
Թորգոմական տան, Ռուսիո մեծապանծ
կայսրության ամենաողորմած ցարին մոտ ձեր
Վեհափառության աջակցությունը խնդրելով,
Նորին Կայսերական Վեհափառության գթու-
թյան աղոտ նշույն կհայցենք այն ազգին
համար, որ յուր աշխարհահոջակ և նշանա-
վոր պաշտոնյաներովն դափնեպսակ անմա-
հացուց Ռուսիո մեծավոր կայսրության քա-
ղաքական պատմությունն ու կայսերաց փառ-
քըն, որոց արևշատության աղոթարկու է միշտ
հայն առ հաստիչն տիեզերաց, առ Ածն հա-
վիտենից:

Որդիական ամենախորին ակնածանոք՝
կարոտակեզ ջրթանց կրկնակի համբուրիվ,
մատչելով ի համբուր Ածօրհնյալ հայրական
աշույղ:

Եմք ամենախոնարհ որդիքդ
ի դիմաց

Օժանդակ Ընկերության Հայոց Իսխիմեայու
Ատենադպիր Ատենապետ
Խաչիկ Հ. Թռաքչլուան Նապարեթ Պողոսյան
անդամք՝

Սիմեոն Պ. Ունճույան
Արտաշես Կարապետյանց
Հայկ Թորգոմյանց:

4. **Ձեռագիր № 659, Լայպցիգ (Գերմա-
նիա), 29 հուլիսի 1893 թ. Լայպցիգի հայ ձե-
մարանական ընկերության կողմից:**

Աստվածարյալ Ս. Ս. Մկրտիչ նորընտիր
Հայրապետ Ամենայն Հայոց և Ծայրագույն
Պատրիարք Մայր Աթոռ-Կաթողիկե Ս. Էջ-
միածնի:

Վեհափառ Տեր,

Լցան ավուրք սգո Կաթողիկե Մայր Աթո-
ռոյն. ցնծալից բերկրին այսօր հայորդյանքն.
զի աջն Հոր Ամենակալի, որ անշարժ պահե
վԱթոռ Հայկապնայց, զորավիզն Հորդ լյալ
Հայաստանյայց՝ տա ստանալ ի գահն հայ-
րապետական:

Անդ ակնկառույց դասք կրոնավորաց Հա-
յաստանյայց Առաքելական ս. Եկեղեցվո կան
և ման Վեհափառ Հայրապետին յուրյանց,
անդ աղածրի մանկտին ըղձալի մերոց հայ-
րենյաց ման սրտաբաղխ հորն յուրյանց վե-
հագունի. անդ և հոտն քրիստոսայան ազգն
հայոց ողջույն լիաշուրթն օրհնությամբ ակն
ունին ակնապիշ ավետավոր ժամանման Հով-
վապետին Հայաստանյայց, զի լրումն ազգի
ազգի խնդրոց ի Վեհեն ակնկալեն յուրյանց
ի Պետեն: Եկեղեցին զուրն ցանկա ի Պետեն
յուրմե առնուլ պեաժին. դպրոցն զյուրն զմասն
խնդրե. իսկ ազգն ողջույն, որ ի սփյուռս
Մայր հայրենյաց՝ զյուրն հայցե լնուլ վկարո-
տություն:

Սակայն ձայնն բազմաց՝ ձայն համորեն

Հոտին, որ կոչեն վՀայրիկն յուրյանց ի գահ
ս. Լուսավորչին, կա ի սպասու միշտ Վեհիդ
առ ի լնուլ զպետս կարյաց բազմակարոտ
ազգին. սերն սրբանվեր որդիական, որով
լցալ են սիրտք համայն հարապատ որդվոցդ,
զորացուցանե զՁեզ մեծավոր զորությամբ.
աջն Միածնին առաջնորդ Ձեզ եղիցի. և հո-
գիք սրբապատարք նախորդացն Ձերոց կան
ի թիկունս արժանընտիր Հաջորդին յուր-
յանց: Այո՛, Վեհափառ Տեր, այսոքիկ, որք
անցուցին վՀայրիկն հայոց ընդ հուր և ընդ
ջուր, այլ և ասեմք և ընդ սուր և ամբարձին
ի գահ Ծայրագույն Պատրիարքի, այսոքիկ և
հայսմիտե զորավիզն Ձեզ լիցին համենայնի:

Արդ և մեք, Վեհափառ Տեր, տարաշխարհ
և հարսպատ որդիք Մորն Լուսո Կաթողիկե
Ս. Էջմիածնի, որ ի սփյուռս Գերմանիո, հայ-
սլմ նվիրական ավուր մատչիմք ի համբուր
աշույղ սրբապան՝ և ամենեքին ընդ մի բե-
րան մաղթանս վերառաքեմք առ Բարձրալի
վասն երկարության կենաց Սրբությանդ՝ խո-
նարհաբար խնդրելով զօրհնություն աստվա-
ծարյալ Հայրապետիդ:

Համին 1893

ի 29 Հուլիս ամսո

ի Լայպցիգ:

Ի դիմաց հայ-ձեմարանական

Ընկերության որ ի Լայպցիգ:

Նախագահ Վարչության՝ Ա. Խանչատրյան
Ատենադպիր՝ Լևոն Բաբայան:

5. **Ձեռագիր № 660, Փարիզ (Ֆրանսիա),
(1893 թ.) Փարիզի հայ ուսանողության կող-
մից:**

Նորին Վեհափառության

Տյառն Տյառն Մկրտչի Առաջնո

Սրբապետատար Կաթողիկոսի և

Ծայրագույն Պատրիարքի Ամենայն Հայոց.
Վեհափառ Տեր,

Այսօր երբ ի սփյուռս աշխարհաց վտարյալ՝
համայն հայության սիրտ ի խինդ բերկրյալ
ցնծա հընտրություն Վեհիդ ի Գահ Առաքե-
լանման Սրբո Հորն Մերո Գրիգորի Լուսա-
վորչին, քանի՛նն ապա և մեզ հրճվի, որդ-
վոցդ օտարաբնակ, որք ի մանկութենե անտի
սնյալ ի վարդապետություն հայրենախոս
Երզնիդ «Հրավիրակին Այրարատա» ընդ օ-
տար աստեղոք, ոգի ի բռին, աչք հերեր առ
Հայրենիս, դուն ի գործ արկանել բերել վնմա-
նություն որդվո արժանվո Հորդ անպուգականի:

Անհուն է բերկրություն մեր, զի թե՛ Ձեռք
վերացալ սուգ Եկեղեցվո Անդրանկան, Ձե-
ռք վերազգի և աղջամուղջ տգիտության
հերկրեն Վեհագունից, Ձեռք լցուցին իղձ
փափագանաց Ազին Թորգոմյան:

Արդ՝ առաջի առնելով Ձերումդ Վեհափա-
ռության զընկերակիցն մեր Հակովբ Մելիք-
Բախտամյան, որպես թարգման սրտից մե-

բոց, կոչեմք բարձրաձայն. Կեցցե՛ հավետ Վեհափառ Տերն Մեր Խրիստն, Կեցցե՛ հավերժ Հայրիկն Հայրենյաց:

Մնամք հայցողք Երկնածիր օրհնությանդ ուսանողք Փարիզու:

(12 ստորագրություններ)

Եվ մեք, գտանելով հոստանն Գաղղիո, կցորդեմք պարտաբուխն ցնծությունս մեր ընդ ուսանողս վասն ընտրություն Վեհիդ ի գահ Ս. Հորն Մերո Լուսավորչի՝

Ուսուցչապետ՝ Գ. Ղամբարյան
Նախկին ուսանողուհի՝ Օլ. Ջեմյան:

6. **Ձեռագիր № 661, Վառնա (Բուլղարիա), 5 օգոստոսի 1893 թ. Վառնայի թաղական խորհրդի կողմից:**

Սորին Վեհափառություն
Տ. Տ. Մկրտիչ Ա. Սրբազնագույն
Կաթողիկոս և Գահակալ վեհապանծ
Աթոռույն Սրբո Էջմիածին.

Վեհափառ Տեր,

Արարատի վայրավատին ու հալածական ժողովուրդը չէր կրնար ասկից ավելի մխիթարություն ունենալ, բայց եթե տեսնել, որ Արարատյան Հրավիրակը ժողովրդյան միահամուռ փափաքանոք կուգար բազմիլ Իջման տեղվո առաքելական և պատմական փառապանծ Գահուն վերա:

Հայ ժողովուրդն երկու սրբազնագույն պաշտոններ ունի, մին՝ կրոնական և մյուսն՝ ազգային. կրոնական պաշտոնը կսկեռի դեպի Ավետյաց երկիր և ազգային պաշտոնը՝ դեպի Արարատ: Եվ արդ՝ Վեհափառ Տեր, Սրբազնագույն Գահակալդ, մեկ ձեռքով հայ ժողովուրդն Ավետյաց երկիր և մյուսով Արարատյան երկիր առաջնորդելու համար կրկնակի հրավիրակներով մեր սիրտն ու հոգին դեպի այդ երկիցս սուրբ երկիրները մագնիսելն վկնի, ամենայն ռուսաց ողորմած թագավորկայսեր հավանությանը կմեկնիք երկնավոր թագավորչին չարչարանաց վայրեն երթալ բազմելու հայոց սրտին կեդրոնն ի Սուրբ Էջմիածին:

Անխելահաս վարչություն մը չի կրցավ կամ չուզեց քննել և խելամտիլ Վեհափառ Տյառնդ Էրիկամունքը, ընդվկյալ կարծեց այն անպուգական և պատվական անձն, որ հայտնի համարձակ իբր գլուխ բազմաչարչար, բայց գնահատելի ժողովրդյան, երկրին վիճակը, ազգին պետքը մատնանիջ ցույց կուտար և դարմանը կպահանջեր՝ շեջտելով, ո՛ր պետք էր վտարել այս չարչարյալ ազգին Պետն—ի Գողգոթա,—և ահա տիեզերական համայն հայոց սիրույն միակ առարկային՝ Վեհափառ Տյառնդ վիճակյալ է փոխանակ Վոսփորեն անսայթաք Պաթում և անտի Տփղիս ուղևորելու, Հուպսենն Աղեքսանդրիա, Թրիեստե, Վիեննա, Օդեսա և անտի Պաթում ուղևորիլ:

Հայության կարևոր կեդրոնը՝ Պոլիս, ամենամեծ անձկությամբ կսպասեր յուր սիրեցյալ Կաթողիկոսին շնորհաբեր գալուստն ողջունելու, բայց շատ բաներ վազված այս ազգին և յուր սիրելի Վեհապետին, վայս ևս վրացան և չներեցին նեղուցներեն անցնիլ, ինչպես որ չպիտի ներենն ահարկու տերության մը նափատորմիղին անցանիլ, բայց այսու միջոց ընձեռեցին արդեն ցալալ ժողովրդյան ցատումն ավելցնելն պատ, դաշնադիր վեց տերությանց միույն մայրաքաղաքին մեջ լռիկ, բայց խորհրդավոր ցույց մը ըլլալուն հանդեպ յուր սիրեցյալ Կաթողիկոսին:

Եվ այս ինքնաբուխ հանդիսադրության տրույա որդեկացս կողմանե ամենախոնարհ թարգման մը կալցուցանելու փափաքով, այս անգամ տեղվոյս կղերականներեն Արժանապատիվ Տեր Օհան Մանդակունին միահամուռ որոշմամբ և հավանությամբ կհամարձակիմք հուղարկել հոսս սրբազնասուրբ և հրեշտակատիպ Վեհափառ Տյառնդ, մեր խնադկցություններն, բարեմաղթություններն, ինչպես նաև մեր որդիական ակնածու պաշտոնները մատուցանելու:

Քաղցր է մեկ ակնկալել, Վեհափառ Տեր, որ Աստված բարեգութ՝ երկար կյանք պարգևելով նոր ուն Ջորաբաբել պիտի հարուցանե հանձին Սրբազնագույն Հայրապետիդ, այս բազմաչարչար ժողովուրդն՝ որ անցավ ընդ հուր, ընդ ջուր և ընդ սուր, ի նավահանգիստ խաղաղության հասցնելու համար առ ոտն Արարատա, տառապանաց ջրհեղեղեն սուպտելով պայն:

Մատչելով ի համբույր սրբազնասուրբ և խնկարույր Աջույդ՝

Եմք և մնամք Վեհափառ Տյառնդ ամենախոնարհ ծառայք և որդիք:

5 օգոստոս 1893

Վառնա

Ի Դիմաց Թաղական Խորհրդո Ատենադպիր՝ Ատենապետ՝

Մատաթյա Սյուքյայան Պ. Փափապյան

7. **Ձեռագիր № 662, Թիֆլիս (Վրաստան), (1893 թ.) Թիֆլիսի հայ ուսուցչուհիների և ուսուցիչների կողմից:**

Ազգընտիր Հայրապետ.

Ամբողջ կես դար Հայաստանի ավերակները ողբալով, հայ աստանդական ժողովրդի ցավերը հոգալով, հավատի ու մամուլի պենքով՝ խաչով ու գրչով հայ աշխարհից տգիտության խավարն ու բռնությունը հալածելով, հայ զուղացու, հայ աշխատավոր, բայց անպաշտպան դասակարգի ուրախությանը խնդակցելով ու նրա ցավերով տանջվելով, նրա արդարացի դատը օսմանյան գահույքից ըսկըսած՝ մինչ Բեռլինի վեհաժողովը պաշտպանելով և ամեն պրկանքների ու խոչընդոտնե-

րի հաղթելով, վերին Տեսչության տնօրինությանը և սիրելի ազգիդ միահամուռ ընտրությանը այսօր զայիս ես բազմաշարքար Գրիգորի, Հայաստանայցյա հավատո հոր՝ Ս. Լուսավորչի Գահը բազմելու.— Գալուստդ բարի:

Հայ ժողովուրդը Ձերդ Վեհափառության հաստատվելու և մանավանդ Երուսաղեմից դեպի Լուսավորչի Գահը, դեպի Արարաի ծոցը մեկնելու օրից անսահման բերկրությանը մի համայն ազգային տոնախմբության մեջ է: Հայրիկին հավատում է ամեն մի հայ անչափ նվիրականությանը, Հայրիկին սիրում է յուրաքանչյուրը մեզանից անհուն սիրով, Հայրիկին պատրաստ է հրճվանքով հպատակվելու ամեն մի հայ: Հայրիկի մեջ հայ ժողովուրդը ամփոփված է տեսնում յուր գաղափարները, յուր իղձերն ու տենչանքները: Այդ բավական չէ. Հայրիկն է միակ հսկան, միակ անպարտելի բարոյական ուժը, միակ դյուքական բազուկը, որը կարող է իրագործել նրա նվիրական ցանկությունները. Այդ անպուգական հեղինակությունն է, այդ կենդանի մարմնացյալ սրբությունն է, որը, այո՛, այսօր մի փոթորկալից շարժումով ամբողջ հայությունը խմբել, միացրել է ի մի համերաշխ ընտանիք, ի մի բախտավոր տուն և լարել է այդ ընտանիքի, այդ տան ուշադրությունը դեպի յուր կառավար Նահապետի ճանապարհը: Դա մի հրաշալի պատմական րոպե է մեր ցիր ու ցան և անհատական բնագոյմներով խմորված հայության մեջ. մի րոպե, որի նմանը գուցե կապի միայն Ղեկնող Երեցի հիշատակի արժանի ժամանակների հետ: Ի՛նչ կտա այդ րոպեն՝ դա ապագայի գաղտնիք է, սակայն ներկայիս համար րոպեն կենդանաբար է, ազդեցիկ է, բարեբեր է և շատ ու շատ բեղմնավոր յուր հետեւանքներով: Կեցցե՛ հայության. Հայրիկը. կեցցե՛ նա, որ ստեղծող է մի նշանավոր պատմական վայրկենի, կեցցե՛ Վասպուրականի Արծիվը, որ այժմ Արարատի Արծիվ պետք է դառնա:

Այս հանդիսավոր րոպեին, այս անմոռանալի օրը, որ հայ ազգի ու Եկեղեցու պատմության մեջ փայլուն էջեր պետք է գրավեն, Հայ Եկեղեցու ու ժողովրդի ցնծության ձայներին միացնում է յուր անկեղծ բերկրանքը հայ մանկավարժականության մշակ, հայ վարժուհիների ու վարժապետների համեստ գերդաստանը.— փառաբանելով Արարչին; որ հայ մտքի անդաստանի բարձրագույն խնամքըն ու հովանավորությունը հանձնել է այն վեհ Դիտապետին, այն մեծ Ուսուցչին, որի հանճարն այնքան բազմաթիվ ու անմոռանալի ծառայություններ է մատուցել ժողովրդի կրթական գործին: Հայրիկի հետ այլևս դժվարություններ չկան ուսուցիչներին առաջ.

Հայրիկի հետ մենք բաղդավոր կլինինք ամենածանր պայմաններում: Ասա՛, պահաճի՛ր, գո՛րծ առը, հրամայի՛ր, մենք պատրաստ ենք:

Հաճի՛ր, Վեհափառ Հայրապետ, թույլ տալ մեզ մատչելու Սուրբ Աջիդ և հայրական օրհնությունդ ստանալու:

(Ուղերձի ներքևում կա 77 ուսուցիչ-ուսուցչուհիների ստորագրությունը):

8. Տպագիր, Թավրիզ (Պարսկաստան), 17 սեպտեմբերի 1893 թ. Թավրիզի Արամյան և Ս. Աննայի երկսեռ դպրոցաց ուսուցիչների և ուսուցչուհիների կողմից:

«Այժմ ծանեաք, զի կեցոյց Տեր Վժեռալ իւր».

ՈՒՂԵՐԶ

Ի դիմաց ուսուցչական խմբի Արամյան և Ս. Աննայի երկսեռ դպրոցաց, որ ի Դավրեժ:

Աստվածընտիր Հայրապետ,

Անբալ են բերկրանք և անպատում հորճվանք սրտից որդվոցս Թորգոմա ընդ գալուստ Վեհիդ Մեծի ի Նոր Սիոն և ի սերկյան ավուր քանի երանի՛ առն, որ ի տաճարիս մատչի ի համբոյր Սրբո Աջոյդ և ողջոյն Մեծի Հորդ սա ի համբառնալ ի Գահ, որ բազմեցանն Ս. Գրիգոր, Մեծն Ներսես և Ս. Սահակ:

Խարիսխ ալգութայնս ապաքեն, Վեհափառ Տեր, Առաքելականս է Ս. Եկեղեցի. Սա է լաստ, որ ի հանգրվանն ուղղե անքոյթ՝ վնավաբեկյալս: Ընդ ժամս ժամս մարդկայինս տկարություն հեցյալ ի թուր վարկածս՝ վառնի ընդմիտս զհաստատութեն Սորին, այլ Որո հիմունք եղան ի ձեռն Միածնի, Ոյր շահալ եղև քրտամբ և արյամբ Հարց սրբոց և Հայրապետաց, Դա և ի պատեհի հարուցանե վՀայրիկդ Հայրենյաց: Չարդիս տարակո՛յս ինչ իցե, եթե անդրդվելի է խորանդ հավատո և զի դրունք դժոխոց ոչ իշխեսցեն հաղթաւարել զԴա:

Այլ ուր կայա՛նդ լուստ, ուր նսեն գիշերո, և զի պատճառ առաջնույդ ի կյանս՝ ուսումն և գիտություն, վասն որո և հաղերս անկանիմք իեղոյ ի վերա մեր պշնորհատու օրհնությունդ, զի սատար կայալ մերում ջանից փոյթ կալցուք ճախրել հետ ընդ հետ հաղջամղջե տգիտության ի կատարյալ պսակ Վեհիդ, հիմունք բազում ինչ ակնկալե որբացյալ ժողովուրդ Հայոց, որ ի Պարսս, և հանապապորդյալ մեր հաղոթս ընդ մանկավոյս երկոցունց սեռից, «որոց է արքայությունն երկնից», վերառաքենք անդրեն առ Բարձրալն խունկս մաղթանաց առ ի հերկարել զթել կենաց Արծվոյդ Վասպուրականի ի փառս Եկեղեցվո և ի բարգավաճումն ազգիս:

Տեսուչ՝ Տիրոսն Նիկողայոսյան Գալֆայանց

(ապա ներքևում կա երկու դպրոցների 11 ուսուցիչ-ուսուցչուհիների տպագիր ստորագրությունը):

17 Սեպտեմբերի 1893.

Դավրիժ:

9. **Ձեռագիր № 652, Մանչեստր (Անգլիա), 1878 թ. Մանչեստրի հունաց առաջնորդ Մորու Իկոնոմու արքեպիսկոպոսի կողմից:**

(Սույն ձեռագիրը գրված է հունարեն և տրված Մորու արքեպ. Իկոնոմուի կողմից Մկրտիչ արքեպիսկոպոս Խրիսյանին, երբ նա 1878 թ. հունիս և հուլիս ամիսներին Բեռլինի վեհաժողովին ներկայանալու համար ճանապարհին այցելում է Վիեննա, Փարիզ և Լոնդոն: Խրիսյան Հայրիկն այն ստացել է Լոնդոնում կամ Մանչեստրում: Թեպետև այն կապ չունի Վասպուրականի Արծիվի Կաթողիկոս օծման հետ, սակայն իր սլատմական արժեքի համար թարգմանաբար տպագրվում է այստեղ):

Չերդ Գերաշնորհություն Հայոց Պատրիարք Տեր Տեր Մկրտիչ Խրիսյանին:

Ազգային հպարտությամբ, որպես հույներ և քրիստոնյաներ, ողջունում ենք Չերդ Սըրբությանը, տեղի հույն համայնքի և համայն

հունական Եկեղեցու անունից, որպես ցավակից եղբայր քրիստոնյա Չեր հոտին հասած պատուհասների, գիտակցում ենք այն անտանելի լուծը և ծանր հալածանքները, որոնց մեր զույգ ժողովուրդներն ենթարկվել են երկար դարերի ընթացքում:

Հղում ենք նաև Չերդ Սրբությանը մեր սըրտաբուխ մաղթանքը, որ Դուք Չեր կոչումի բարձր գիտակցությամբ, Չեր ազգային իրավունքները հետապնդելով՝ դրանք իրականացած տեսնեք:

Որպես հույներ և եղբայրներ հայ ազգի, որի հետ մեզ կապում են քրիստոնեական մեր առաքելական ավանդություններն ու բազում տառապանքներ, գալիս ենք արտահայտելու մեր ուրախությունը Չերդ Սրբության ժամանման նպատակի առնչությամբ և հայտնում մեր անկեղծ մաղթանքները Չեր սուրբ նպատակի իրականացման համար:

Տրված Չերդ Սրբության ցավակից Չեր խոնարհ ծառայի կողմից:

Մանչեստր, 17/29 ապրիլի 1878.

+ Մորու արքեպիսկոպոս Իկոնոմու:

Ն. ՏԵՐ ՄԻՔԱՅԵԼՅԱՆ



Տ. ՍԻՈՆ ԱՐՔԵՊԻՍԿՈՊՈՍ ՄԱՆՈՒԿՅԱՆԻ ԱՅՑԵԼՈՒԹՅՈՒՆԸ ԱՎԱՏՐԱԼԻԱՅԻ ՀԱՅՈՑ ԹԵՄ

Շուրջ երեք ամիս Տ. Սիոն արքեպիսկոպոս Մանուկյանը հյուրը եղավ թեմիս բարեխնամ առաջնորդ Տ. Աղան եպիսկոպոս Պալիոպյանի ու թեմական խորհրդի և եկեղեցականի իր բարձր հանգամանքով ու բարի կամեցողությամբ, իր քարոզներով և վանական առիթներով ունեցած ելույթներով հորդորեց հայ հավատացյալներին մնալ հավատարիմ վավակները Մայր Եկեղեցու և Հայաստան աշխարհի:

Սրբազան հայրը Սիդնեյ ժամանեց 1983 թ. նոյեմբերի 17-ին և օդանավակայանից ուղիղ առաջնորդվեց հայոց եկեղեցի, ուր մուտք գործեց «Հրաշափառ»-ով, ապա հաղորդեց Վեհափառ Հայրապետի օրհնություններն ու բարեմաղթությունները և խրախուսիչ խոսքերով թելադրեց ներկաներին աչքի լույսի պես պահել ու պահպանել հայ հավատքը և մշակույթը:

Հաջորդ կիրակի, թեմիս առաջնորդ Տ. Աղան եպիսկոպոս Պալիոպյանը պաշտոնապես իր և թեմի անունից բարի գալուստ մաղթեց սրբազան հորը և նրան հրավիրեց իր պատգամը տալու ներկա հավատացյալներին: Բարձրաստիճան սրբազան հյուրը Ավստրալիայում իր կեցության օրերին, լինի Սիդնեյի Ս. Հարություն կամ Մելբուռնի Ս. Աստվածածին եկեղեցիներում, «Բանին կենաց» քարույրությամբ միսիոնարեց բարեպաշտ հայ հավատացյալների հոգիները: Եղան բազմաթիվ առիթներ, երբ Տ. Սիոն արքեպիսկոպոսը ականատեսի վկայությամբ պատմեց Վեհափառ Հայրապետի բազմարդյուն գործունեության և այն շինարար աշխատանքների մասին, որոնք կատարվում են Մայր Աթոռի ներքին թեմերում: Սրբազան հայրը նաև ասաց, որ հինգ տարիներից ի վեր բնակվում է Սուրբ Էջմիածնի վանքում և մոտիկից ծանոթ է Հայաստանի վերջին տարիների հսկայաքայլ վերելքին ու նվաճումներին: Հայրենի երկիրը արագ աճում է և բարգավաճում:


Տ. Սիոն արքեպիսկոպոսի այցելության առթիվ ավստրալահայ համայնքում, ի պատիվ նրան, տրվեցին ճաշկերույթներ, տեղի ունեցան մի շարք հավաքույթներ և պաշտոնական հանդիպումներ, որոնց ընթացքում սրբազան հայրը կրկին ու կրկին հորդորում էր բարձր պահել հայ անունը և հայ լեզուն այս հեռավոր ցամաքամասում և առավել ամրապնդել կապը Մայր Աթոռ Սուրբ Էջմիածնի հետ, որովհետև, ինչպես նշեց սրբազան հայրը, «Մայր Աթոռը, ինչպես և հնում, նույնպես և այսօր Հայ Եկեղեցվո կենտրոնն է. և ինչպես անցյալին, այսօր ալ նախախնամական դեր կկատարե սփյուռքի հայության գոյության և պահպանության համար»: Այնուհետև սրբազան հայրը, խոսելով Հայաստանի նվաճումների մասին, ասաց, որ «Հայրենիքի մշակույթի և արվեստի կապը շատ կորավոր է սփյուռքի հայության հետ: Հայաստանի արվեստագետները՝ արվեստի, գրականության, երաժշտության, երգի ու պարի վարպետները, նոր շունչ ու ոգի կներշնչեն հայ գաղութներուն և կամրապնդեն անոր հայրենասիրության կապը Մայր Հայրենիքի հետ»:

Մեկնելուց առաջ, հրաժեշտի իր ելույթի մեջ նա մասնավորապես նշեց, որ ավստրալահայ գաղութը պետք ունի նոր ու հայկական ճարտարապետական ոճով կառուցված մի մեծ եկեղեցու ու նույնպես շատ կարևոր հայկական ամենօրյա դպրոցների:

Շուրջ երկու և կես ամսվա արդյունավետ այցելությունից հետո, սույն թվականի փետրվարի 1-ին Տ. Սիոն արքեպիսկոպոսը օդանավով մեկնեց Ամերիկա՝ վստահաբար լավագույն հիշատակներով ու տպավորություններով:

ՄՐԱՄԱՅԻՍ ԱՎԱԳ ՔԱՀԱՆԱ ՄԻՐԶԱՅԱՆ

Հոգևոր հովիվ Մելբուռնի հայոց եկեղեցու



ԹԵՄԱԿԱՆ ԿՅԱՆՔ

ԼՈՒՐԵՐ ԲՈՒԼՂԱՐԱՀԱՅ ԹԵՄԻՑ

Սույն թվականի փետրվարի 20-ին թեմական-վարչական գործով Բուխարեստից Սոֆիա է ժամանել Ռումինիայի և Բուլղարիայի հայոց թեմի առաջնորդ Ս. Տիրայր արքեպ. Մարտիրոսյանը:

Փետրվարի 26-ին, կիրակի օրը, թեմակալ առաջնորդի կարգադրությամբ, Բուլղարիայի հայոց բոլոր եկեղեցիներում կատարվել են հոգեհանգստյան մասնավոր պաշտոններ հանգուցյալ Ս. Սերովբե արքեպ. Մանուկյանի հիշատակին: Սույն օրը Սոֆիայի հայոց Մայր եկեղեցում, հավարտ ս. պատարագի, Ս. Տիրայր արքեպիսկոպոսը նախագահել է օրվա հոգեհանգստյան արարողությանը և խոսել հանգուցյալ Սերովբե արքեպ. Մանուկյանի կյանքի և եկեղեցանվեր գործունեության մասին՝ վեր հանելով հոգևոր վարչական ասպարեկում նրա երկարամյա ծառայությունը ի նպաստ Հայաստանյայց եկեղեցու, մասնավորապես Արևմտյան Եվրոպայի հայոց եկեղեցիների բարեկարգման ու ծաղկման, ի մխիթարություն հայ հավատացյալ ժողովրդի:

Հետևյալ օրը, փետրվարի 27-ին, Սոֆիայի հայոց առաջնորդարանում, առաջնորդ սրբապանի հրավերով և նախագահությամբ տեղի է ունեցել քահանայական հավաք, որին ներկա են եղել բուլղարահայ թեմի բոլոր հոգևոր հովիվները, ինչպես նաև թեմական խորհրդի նախագահը: Քահանայական սույն հավաքույթն անցել է քրիստոնեական ջերմ ու սրտագին մթնոլորտում: Ս. Տիրայր արքեպիսկոպոսը խոսել է քահանայական բարձր

կոչման մասին՝ տալով իր խրատներն ու հորդորները: Նա նշել է, որ Հայ եկեղեցու սպասավորները պետք է քաջ գիտակցեն կարևորությունն ու պատասխանատվությունը այն բարձր առաքելության, որին կոչված են ներանք, ի մասնավորի սփյուռքահայ պայմաններում, որտեղ բարոյական ու հոգևոր արժեքների պահպանմանը պոզընթաց այժմ առաջնահերթ նշանակություն է ստացել նաև ազգապահպանման հարցը: Առաջնորդ սրբապանը նաև ներկաներին պատմել է վերջերս դեպի Երուսաղեմ կատարած իր ճանապարհորդությունից ստացած տպավորությունների մասին և հաղորդել պատմական տեղեկություններ սուրբ քաղաքի վերաբերյալ:

Այնուհետև Ս. Տիրայր արքեպիսկոպոսի առաջարկով ժողովը ընդհանուր քարտուղար է ընտրել Սոֆիայի հայոց հոգևոր հովիվ Ս. Մեսրոպ ավագ քահանա Պենյանին: Որոշվել է տարին մեկ կամ երկու անգամ կազմակերպել նման հավաքույթներ՝ ի շինություն և ի ծաղկումն բուլղարահայ եկեղեցիների:

Մարտի 1-ին, հինգշաբթի օրը, Սրբոց Վարդանանց տոնի և Ամենայն Հայոց Հայրապետ Ս. Տ. Վազգեն Ա-ի անվանակոչության առթիվ Սոֆիայի հայոց եկեղեցում տեղի է ունեցել սուրբ պատարագ: Օրվա տոնակատարությանը նախագահել է թեմակալ առաջնորդը և Վարդանանց հերոսամարտի խորհրդի մասին արտասանել ոգեշունչ մի քարոզ՝ վեր հանելով և դրվատելով Ղևոնդյանց և Վարդանանց լուսաբերությունը վասն Հիսուսի և վասն հայրենյաց: Պատարագի ա-

վարտին առաջնորդ սրբապանը ներկաներին հրավիրել է իրենց աղոթքները մատուցել առ Աստված՝ ազգիս սիրեցյալ Հայրապետի կյանքի արևշատության և քաջառողջության համար:

Նույն օրը թեմական խորհուրդը Սոֆիայի «Բալկան» հյուրանոցի ճաշասրահում Վարդանանց մեծ տոնի հիշատակին կապմակերպել է պաշտոնական ճաշկերույթ, որին ներկա են եղել Բուլղարիայի Ժողովրդական Հանրապետության արտաքին գործերի մինիստրի տեղակալ և Կրոնական գործերի կուրիտեի նախագահ Լուբեն Պոպովը, կոմիտեի այլ պատասխանատու աշխատակիցներ, բուլղարական քույր Եկեղեցու Ս. Սինոդի գլխավոր քարտուղար Կելասի եպիսկոպոսը, Սոֆիայի բուլղար պատրիարքարանից՝ Դոմիտիան եպիսկոպոսը, Ռումին Եկեղեցու ներկայացուցիչ Մունտիանու ավագ քահանան, ռուսաց Եկեղեցու Մոսկվայի պատրիարքա-

րանի ներկայացուցիչ Նիկիտա վարդապետը, բուլղարահայ «Երևան» մշակութային կապմակերպության նախագահ Տիրան Բարիքյանը և բուլղարահայ թեմական խորհրդի լրիվ կազմը՝ գլխավորությամբ Ս. Տիրայր արքեպիսկոպոսի:

Ճաշկերույթն անցել է եղբայրական ջերմ ու խանդավառ մթնոլորտում, որի ընթացքում փոխանակվել են բաժակաճառեր և կատարվել երգեր հայերեն ու բուլղարերեն լեզուներով:

Ս. Տիրայր արքեպիսկոպոսը Պլովդիվի հայոց եկեղեցական համայնքից հրավեր ստացած լինելով՝ ժարտի 4-ին Սոֆիայից մեկնել է Պլովդիվ՝ տեղի հայոց եկեղեցում պատարագելու և քարոզելու Վարդանանց տոնի առթիվ:

Մարտի 9-ին թեմակալ առաջնորդ սրբապանը վերադարձել է իր աթոռանիստը՝ Բուխարեստ:

ԼՈՒՐԵՐ ԻՐԱՔԻ ՀԱՅՈՑ ԹԵՄԻՑ

Իրաքի հայոց թեմի բարեջան առաջնորդ Ս. Ավագ եպս. Ասատուրյանի առաջնորդական պաշտոնի ժամանակաշրջանն ավարտված լինելով՝ իրաքահայ թեմի Ազգային Կենտրոնական Վարչության հրավերով 1984 թվականի հունվար ամսի վերջերին Բաղդադ են ժամանել Բասրայի, Մուսուլի, Քերքուկի և Չախոյի հայոց թեմական խորհուրդների անդամները լրիվ կազմով՝ մասնակցելու առաջնորդի ընտրությանը:

Ընտրությունը տեղի է ունեցել հունվարի 26-ին: Ազգային Կենտրոնական Վարչության հրավերով գումարված պատգամավորական ժողովում ընթերցվել է վարչության տեղեկագիրը Ս. Ավագ եպիսկոպոսի անցնող չորս տարիների առաջնորդական գործունեության մասին: Ժողովականները հաստատել են, որ առաջնորդ սրբապանը թե՛ հոգեվոր և թե՛ ազգային-մշակութային իմաստով թեմից ներս կատարել է գնահատելի և օգտակար աշխատանք՝ միաժամանակ իբրև թեմակալ առաջնորդ ցուցաբերելով վարչական ու կապմակերպական ակնհայտ կարողություն:

Վերոհիշյալ հանգամանքները նկատի ունենալով, ինչպես նաև ըստ արժանվույն գնահատելով Ս. Ավագ եպիսկոպոսի անձնա-


կան արժանիքներն ու նրա նվիրումը իր աշխատանքին՝ ժողովը միաձայնությամբ նրան վերընտրել է Իրաքի հայոց թեմի առաջնորդ առաջիկա չորս տարիների համար:

Այնուհետև ժողովի նախագահ Ս. Գեղամ ավագ քահանա Փաշայանի և ատենապետ դոկտ. Հասրաթ Միքայելյանի ուղեկցությամբ Ս. Ավագ եպիսկոպոսն առաջնորդվել է առաջնորդարանի դահլիճ և ընդունվել պատգամավորների կողմից ջերմ ծափահարությամբ: Այստեղ առաջնորդ սրբապանը շնորհակալության ջերմ խոսք է ասել ժողովականներին՝ իր նկատմամբ ցուցաբերված վրձտահության համար, ապա, իբրև միաբան Մայր Աթոռ Ս. Էջմիածնի, իր հավատարմությունն է հայտնել Ամենայն Հայոց Վեհափառ Հայրապետի և Մայր Աթոռի հանդեպ՝ միաժամանակ խոստանալով մնալ հավատարիմ զավակը Իրաքի ասպնջական հողի և պետության:

Հավարտ պատգամավորական ժողովի տեղի է ունեցել պաշտոնական ճաշկերույթ:

Վերընտրված առաջնորդ սրբապանն իր ուխտը կատարել է Բաղդադի հայոց Ս. Գրիգոր Լուսավորիչ առաջնորդանիստ եկեղեցում, ապրիլի 22-ին:





ԽԱՂԱՂՈՒԹՅԱՆ ՄԻՋԱԶԳԱՅԻՆ ԿՈՆՖԵՐԱՆՍ

Սույն թվականի ապրիլի 2-ից 4-ը Մոսկվայում տեղի է ունեցել «Տիեզերքն առանց վեճի» թեմայով խաղաղությանը նվիրված միջազգային կոնֆերանս, որին իրենց մասնակցությունն են բերել աշխարհի 26 երկրներից ժամանած տարբեր կրոնների ներկայացուցիչներ՝ քրիստոնյաներ, մահմեդականներ, մոլիսականներ, հինդու կրոնի ներկայացուցիչներ, բուդդայականներ և այլն, ընդամենը շուրջ 60 հոգի: Մասնակիցների թվում եղել են հայտնի գիտնականներ, տիեզերագետներ և բազմաթիվ հյուրեր:

Հայ Առաքելական Եկեղեցու կողմից, Ամենայն Հայոց Վեհափառ Հայրապետի բարեհաճ կարգադրությամբ, սույն կոնֆերանսին, որպես հյուր, մասնակցել է նաև Աղբբեջանի հայոց թեմի առաջնորդ Ս. Անանիա եպիսկոպոս Արաբաջյանը, որը կոնֆերանսի նախագահ, Մինսկի և Բելոռուսիայի միտրոպոլիտ Ֆիլարետին փոխանցել է Նորին Սուրբ Օծույթուն Ս. Տ. Վազգեն Ա Ամենայն Հայոց Կաթողիկոսի՝ ժողովին ուղղված բարի մաղթանքներն ու ցանկությունները:


Ապրիլի 3-ին «Ուկրաինա» հյուրանոցի

դահլիճում կոնֆերանսի մասնակիցներին ընդունել և ողջունել է Մոսկվայի և Համայն Ռուսիո Պատրիարք Նորին Սրբություն Պիմենը: Իր ողջույնի խոսքի մեջ Ռուս Եկեղեցու պետը անդրադարձել է ներկա միջազգային լարված դրությանը և այն մեծ դերին, որ այսօր ի վիճակի են կատարելու տարբեր հավատի և դավանության տեր մարդիկ, հոգեվորական թե աշխարհական, աշխարհի խաղաղության պահպանման պատասխանատու և դժվարին գործում: Իր խոսքի վերջում նա հաջողություններ է ցանկացել կոնֆերանսի աշխատանքներին:

Հաջորդ երկու օրերին ժողովի մասնակիցները լսել են մի շարք Վեկուցումներ տիեզերքի և նրա սպառապիմման վտանգավոր հետևանքների վերաբերալ: Ձեկուցել են տարբեր երկրներից հրավիրված ականավոր գիտնականներ:

Ապրիլի 4-ին, հավարտ կոնֆերանսի, կազմվել և ժողովականների կողմից միաձայն հաստատվել է խաղաղության պահպանման «գտին մի հաղորդագրություն» ուղղված պետությունների ղեկավարներին:





ՊԱՐԳԵՎ ՀԱՀԱԶՅԱՆ

ԵՂԻՎԱՐԴԻ ՆՈՐ ԳԻՐՔԸ

Սփյուռքահայ գրականությունը հարստացավ մի նոր չափածո ստեղծագործությամբ: Վերջերս Երուսաղեմի հայոց Սրբոց Հակոբյանց վանքի տպարանից լույս տեսավ ըսփյուռքահայ անվանի բանաստեղծ Եղիվարդի (Եղիշե արքեպիսկոպոս Տերտերյան) նոր գիրքը «Հայրենականք, Տոհմականք» խորագրով: Ներկա հատորը, անտարակույս, գալիս է իր ինքնուրույն տեղը գրավելու հեղինակի գրական ընդհանուր ժառանգության մեջ:

Գիրքը բաղկացած է երկու բաժնից. առաջին բաժնում, որն ունի «Հայրենականք» վերնագիրը, տեղ է գտել հայրենասիրական երկարաշունչ մի քերթված, ուր հեղինակը անհագ կարոտով ոգեկոչում է իր ծննդավայրը, իր կորցրած հայրենիքը, նրա բնության առինքնող գեղեցկություններն ու հրապույրները: Այս բաժնի իրարահաջորդ հատվածներում ընթերցողի աչքերի առաջ մեկը մյուսից գրավիչ պատկերներով տողանցում է հեղինակի մանկության հուշերի շարանը: Բանաստեղծի հիշողության պաստառի վրա, տարիներ անց, աղոտ ստվերագծերի մեջ վերհառնում են հայրենական հին գյուղակը լեռան փեշին, նրա նեղ ու «կույր» փողոցները, նախիրների բարձրացրած փոշին, սայլերի «հեծքը» դաշտի ճանապարհին, մանկության լուրջ աղբյուրը, որի հավերժական ծա-

րավով է տոչորվում իր սիրտը, հետո՝ շերտությունը հայրական սուրբ օջախի, գորովակաթ բարի դեմքը իր մոր, որ թթի ծառի տակ իր «աղեկատն» է մանում, և ապա... ապա անծայր քարավանը հեք տարագիրների «Եղեռնի սև ճամփաներուն», ինքը մենակ, մոր փեշից բռնած, քայլում է ու քայլում՝ հոգում անկոր ցատում ու բողոք: Ժամանակի հեռուներից հեղինակը մտքի աչքերով տեսնում է Վանա ծովն ու Աղթամարը, Սիփանն ու Նեմրոսը, այնուհետև արյունով պղտորված Եփրատը, մայր Արաքսը, որ սիրտը մրմուռ՝ գնում է դեպի օտար ափեր:

Հին հիշողություններից հառնող այս պատկերներին լուրջաբար, որոնք պարուրված են աշնանային թախծոտ գույներով, հեղինակը տալիս է նաև իր նոր հայրենիքի՝ ապրող, շնչող, արևային Հայաստանի լուսաշող պատկերը. ահա բերք ու բարիքով լիառատ հայրենական դաշտերը, որտեղից վերադառնում են հոգնաբեկ մշակները նոր գյուղի, «ուր կիյուսի ոսկի հեքիաթը նոր օրերուն»: Ահա հայ հավատքի վեմ Մայր տաճարը Ս. Էջմիածնի, շքեղ համալիրը հերոսական Սարգարապատի, ժայռակերտ Գեղարդա վանքը, Սյունիքն ու Չանգեպուր՝ իր հռչակավոր Տաթևով, Ջերմուկը՝ իր բուժարաններով, Վայոց ձորը, կապուտաչյա Սևանը, նրանից սկիզբ առնող «կենդանի շող» Չանգուն՝ իր

«ջրանցքներով երկաթաձայն», իր էլեկտրական կայաններով, ապա մեր հայրենիքի նոր ուստանը՝ Երևանը, որ մարմին է առել «ավերներեն մեր անցյալին»: Եվ այսպես՝ հեղինակի ընկալման մեջ համադրվում, կուգակցվում և միաձուլվում են հինն ու նորը, անցյալն ու ներկան, խավարն ու լուսավորը, հին այգին ու նոր այգին, ավերված խրճիթներն ու նորաստեղծ պալատները նորոգ հայրենիքի: Ի տես օրավոր ծաղկող ու բարգավաճող իր հայրենի երկրի, բանաստեղծի սրտի խորքից բարձրանում է ապագա խաղաղ կյանքի մաղթերը:

«Թող չբուսնի տատասկ դժնիկ
Հողերուս քու, այգին իմ նոր,
Ու վրայեղ թևը չանցնի
Թռչունին սև...»:

Հեղինակն ուզում է իր նոր տունը կառուցել «Արագածի անքույթ խորքին, վերթ համեցող կարոտի ժայթք», նման իր երբեմնի այն երազ տան, որի շեմքին հոսել է իր հոր արյունը կաթիլ-կաթիլ:

Ամբողջ քերթվածը շնչում է հայրենասիրական անկեղծ ոգով՝ դրսևորելով բանաստեղծի հոգեկան աշխարհն ալեկոծող զգացմունքների ու ապրումների ելեջները: Քերթվածի առանցքն է կապում հայրենիքի գաղափարի նվիրականությունը, որ միակ անսուտ սրբությունն է, միակ ճշմարտությունը:

Հատորի երկրորդ բաժինն ունի «Տոհմականք» ընդհանուր վերնագիրը: Այս բաժնում ընդգրկված են փոքր ծավալի չորս պոեմներ՝ «Աժդահակն ու Տիգրանը», «Չորափորեցին», «Վահան Գողթնացին» և «Տարիներ հետո (Ս. Սահակ)»: Հիմնվելով ազգային ավանդապատումների, վկայաբանությունների և մեր հին մատենագիրների հաղորդած պատմական տվյալների վրա՝ հեղինակը գեղարվեստական մարմնավորում է տվել հայ ժողովրդի հեռավոր անցյալի որոշ դեպքերին ու դեմքերին: Ուշագրավ է հատկապես «Չորափորեցին» պոեմը, որ սեղմ, բայց տպավորիչ գծերի մեջ վեր է հանված պայծառ կերպարը Սահակ Գ Չորափորեցի հայրենա-

սեր կաթողիկոսի, որը աքսորական կյանքի դառնությունները ճաշակած, հյուծված ու վատառողջ, ծերունական հասակում հանձն է առնում երկար ու դժվարին ճանապարհորդության տաժանքը՝ հանդիպելու համար հայոց աշխարհի վրա արշավելու ելած արաբ արյունարբու ոստիկանին, աղերսալից խոսքերով մեղմելու նրա վայրույթը և այդպիսով փրկելու իր հայրենիքն ու իր անպաշտպան ժողովրդին անխուսափելի սպանդից և ավերածություններից: Հուզիչ և ազդու է պոեմի վերջին հատվածը, որ պատկերված է հայոց վշտակիր Հայրապետը՝ դազադում պառկած, ցավի ստվերը դեմքին, անկենդան ձեռքում պինդ սեղմած մերձիմահ գրված իր նամակը՝ ուղղված դաժան բռնակալին, որպես խաղաղության և հաշտության պատգամագիր: Պոեմն ավարտվում է պատմի էական գաղափարն ամփոփող հետևյալ խորիմաստ և թելադրական տողերով:

«Մահ կենսանորոգ և մահ սրբարար,
Որ երիթամած հոգիներուն մեջ
Կբանաս հաճախ վարդերդ ճերմակ,
Զեռքովն Աստուծո կարծես հոն ցանված»:

Գեղեցիկ են մշակված նաև հատորի մյուս պոեմները, որոնք բոլորն էլ հազեցած են գեղարվեստական խոսքի ինքնատիպ, ճոխ տարրերով:

Եղիվարդի չափածոն, որ գերազանցապես անհատական դրոշմ ունի, այս հատորում նույնպես պահպանել է իր հիմնական հատկանիշները՝ սահուն երաժշտականությունը, թեթևությունը, պարզությունը: Նրա մտածողությունը խիստ պատկերավոր է: Բանաստեղծը իր մտքերն ու զգացումները դրսևորում է պատկերների ամբողջական շարքերով, խոսքի գյուտերով, ցայտուն ու ներգործուն արտահայտչամիջոցներով, որոնք արդյունք են նրա ստեղծագործ երևակայության:

Եղիվարդի ներկա հատորը ուշագրավ երկվոյթ է սփյուռքահայ արդի բանաստեղծության մեջ:

Ստորև արտատպում ենք առանձին հատվածներ հեղինակի վերոհիշյալ գրքի «Հայրենականք» բաժնից:

«Ո՛վ հայրենիք, հաղթող ես դուն,
Ստեղծիչը հպորագույն հոգիներուն:
Ժամանակի շանթերուն տակ,
Կխորտակվին փառք, մեծություն,
Կմնաս դուն
Իբրև դափնյա ճյուղ մը դալար,
Շիրմին վերև
Քեզի համար մեռնողներուն»:

Կքալեի աշնան մեջեն
Իմ հայրենի,
Գլխուս վերև երկինք անհուն
Վրան լարված,
Հովի թևով կծավալեր
Երգն աշունին,
Վեր բարձրացող ճպոտին տակ
Մասիս սարին:

Աչքերուս դեմ գյուղեր ահա,
Մեր աշխարհին հապարամյա,
Նստած խաղաղ մեր լեռներու
Գահավանդին,
Կամ ուժասպառ ինկած տապաստ
Խորն հովիտին:
Փողոցներն անոնց փողոտ
Ու խորտուբորտ,
Կանցնին ծերեր,
Գավազանին հետ հաշտված,
Կիներ փայլատ հագած արև:
Դուռներուն դեմ հյուղակներուն,
Լաճեր բոկոտ,
Աչվըներով ջինջ, բայց թախծոտ:

Վանք ու մատուռ, վկայարան,
Կերպարանքներ մեր հողին,
Մեր լեռներու երակներեն
Քար քար հանված,
Աստվածապգյաց իշխաններեն
Մեր հինավուրց,
Որոնք իրենց մարմնեն անդին
Գիտցան անցնիլ,
Ու բուսցուցին ոգին անմահ
Եվ աղանանդ,
Դարերու դեմ միշտ անվկանդ:

Դաշտավայրը Արարատյան,
Սուրբ Գրքի էջ մըն է կարծես,
Որուն վրա լեռն հայրենի՝
Նետած նայվածքն իր խորամուխ,
Կուպե հեգել,
Խորհուրդն անլույծ մեր պատմության:

Ու կթվի ինծի լսել
Չայնեը կրակ
Արնաշաղախ մեր անցյալին,
Հերոսներուն և սուրբերուն,
Խոսքի նստած Աստուծո հետ:

Անոնք բոլոր,
Նետած պատանք, հագած մարմին,
Իբրև իշխան, կղերական
Ու ջինական,
Մեր հողերեն կանցնին նորեն,
Վերքերով խոր ու տարադեմ:

Խուժումն անծայր հուշերու բորբ
Կբարձրանան սիրտըս ի վեր:
Աչքերուս դեմ տունը մեր հին,
Մայրս թույթի ծառին ներքև,
Կմանե դեռ աղեկատն իր:
Ու կհիշեմ լացս առաջին,
Ժայռն ինկած ջուրի հանգույն:

Երկնքին տակ կբարձրանար
Յաթաղան մը արյունաներկ,
Որ հայ մայրեր չծնին ալ,
Եվ մանուկներ չգան աշխարհ:

Ես դեռ մանուկ մորս փեշին՝
Եղեռնի սև ճամփաներեն
Քալեցի շատ,
Ոտքերուս՝ ցավ և սիրտիս՝ վերք,
Եվ այդ ցավին կհյուսվեր լուռ
Ցասում մ'անկող, բողոք մ'անհուն,
Որ կմնա մինչև այսօր
Իբրև կտակ արյունագիր
Իմ որբության:

Հեռո՛ւն, հեռո՛ւն,
Միտքիս աչքով կտեսնեմ դեռ,
Ծովը Վանա,
Մատյան անհուն անցելահուշ
Հրաջքներուն:
Մնդուս կտավ մինչև երեկ,
Այժմ սուգի մեծ վարշամակ,
Արցունք աչքին՝ որ կնայի
Բյուր վերքերուն Աղթամարի:

Վերեն ինկած վերթ դազաղներ
Կղպներն են ջուրին վերև,
Անվերադարձ մեծ փառքերու
Իբրև դիրք ծփծփուն:

Սիփան, Նեմրութ, մոզերու պես
Հագած կնգուղ,
Դեռ կխոսին Աստուծո հետ:

Եփրատն անդին, պղտոր, քենոտ,
Վիշապի մը նման նոթի,
Հովիտներեն ու դաշտերեն
Կգալարվի,
Ավերակներն իսկ լիվելու
Ա՛լ անկարող,
Իր ջուրերուն՝ ալ չեն ցոլար,
Բյուր գմբեթներն տաճարներու:

Հո՛ղ հայրենի,
Անհուն կարոտ և կարմիր ձայն,
Գեղեցկություն անշամանդաղ,
Ոսկի երազ,
Գաղափարի կարմիր դրոշ:
Քանի դար է ալ չեմ հիշեր
Մեր արևին նման այրող,
Մեր ջուրերուն պես պաղպաջուն
Երազ էր խոր,
Ժողովուրդին մեր դարավոր,
Ունենալ լոկ իր սեփական
Կտոր մը հող:

Ունի՛նք այսօր:

Այդ բաբախուն բարիքն հպոր,
Որուն ծոցին՝ կծոցվորին
Միտքի, սիրտի ծիւեր աղվոր,
Ողողելու խորշերն ամեն
Սեր գերության խոր նկուղին,
Եվ ընելու զմեզ գիտակ
Իրավունքին մեր դարավոր:

Կքալեի ափերն ի վեր
Օձապտույտ Հրապրանին,
Հոգիս լեցուն
Ցնորքներով աներկրային:

Չանգո՛ւ, Չանգո՛ւ,
Աղջկն աղվոր մեր լեռներուն,
Մապերդ հովին,
Հովտն հովիտ ու ժայռն ժայռ
Քանի՛ դար է կվապես դուն:
Սափորն ուսած ջուր կտանիս
Այգիներուն մեղրառողկույզ,
Լույս կտանիս,
Գյուղակներուն և սիրտերուն,
Նորափթիթ և նորապարդ:

Ու կպատմես հին օրերու
Հեքիաթն ոսկի,
Ջրանցքներուն երկաթաձայն,
Կայաններուն էլեկտրական,
Պատրույզն որոնց
Երակներեդ կհագնի բոց:

Աջնան մեջեն ես կքալեմ
Ու կնայիմ լեռներուն սուրբ,
Որունք բռնած ափսեն կապույտ
Սևան լիճին,
Վեր կհանեն երկնքին դեմ:

Լի՛ճ հայրենի, երապն հալած,
Ժողովուրդիս բազմահալած,
Որու ծոցին կզվին աղվոր,
Կուրծքին առած մատուռներ զույգ,
Որունք կարծես կունկնդրեն դեռ
Չայնը Անոր՝
Որուն օր մը բացինք մեր սիրտն
Ու մեր հոգին:

Սևա՛ն, Սևա՛ն, ափսե ակատ,
Արյունին մեջ վերջալույսին,
Եվ Հրապրան քեզմե բխող
Կենդանի շող,
Մեր սիրտերուն վերև բացվող:

Դուն սրտաձև,
Սիրտն ես իրավ Հայ աշխարհին,
Որ դարերով տրոփեր է,

Շուրջդ կախարդված
Լեռներու ծոց:

Ափիդ կեցած,
Թարթիչներու՝ օտարության
Դեղին փոշին,
Եվ ոտքերու՝ հալած կապար,
Բայց աչքերու՝ երապ մը վառ
Քեզ կդիտեմ ազահաբար:

Օտար երկնի լույսին ներքև,
Պատկերդ աղվոր,
Պիտի մնա հոգիիս խորն
Մարգրիտն ինչպես սաղափաշող
Մռայլ ծոցին մեջ ոստրեին:

Աջնան մեջեն ես կքալեմ
Փողոցներեն նորակառույց
Երևանին:
Կոթողներու շարանն աղվոր,
Ոստանին նոր,
Կղզիներու պես հրեղեն
Կբարձրանան
Ժամանակի անհուն ծովեն,
Հորինելու մանյակ մը նոր
Հրապրանի պարանոցին:

Քաղաքն է այս,
Ժողովուրդին իմ նորավառ
Տուն տաղավար,
Չավակներուն իր ծոցածին,
Դրախտ մը նոր,
Փոխան կորաված դրախտներուն,
Մարմին առած
Ավերներեն մեր անցյալին:

Հրաշապան իմ Երևան,
Գիրկ մայրական, վերջին կայան
Չավակներուդ հեռու, մոտիկ:
Ոչ ոք գիրկեդ կլինա հեռու,
Երբ կբերե արյուն ու դին
Դարե ի դար մինչ մեր օրեր:
Դուն բոլորին
Եվ մենք ամբողջ քու մեջ միայն:

Հաշտության ձեռք իմ Երևան,
Սերդ օրենք մեռելներուն և ողջերուն:
Անցյալ, ներկան ու ապագան,
Քու սիրույդ մեջ թող իրար գան,
Հացդ ընելու մեզի նշխար,
Ջուրդ ընելու մեզի գինի
Հաղորդության,
Մեզ լվացող, մեզ կրակող
Թմբիրներեն տարագրության,
Հանդերձելու փառքըդ պայծառ,
Չոր ըղձացինք ու դեռ կըղձանք.
Հապար ամեն մինչ հապար ամ:

Աչքերուս դեմ այգին է նոր,
Այն միտսին այնքա՛ն նման,
Որ ալ չկա:

Ներս կմտնեմ երկաթ դուռնեն,
Առավոտը ոտքերուս տակ
Չույլ մարմարիոն:

Աղջիկն ինչպես կտավին դեմ
Իր երապին կարմիր, կապույտ,
Կքաղցրանա այգիիս դեմ
Տարիներու սիրտն իմ ծարավ:

Խաղաղություն. և օրհնություն
Մշակներուն և արտերուն,
Որոնք բարիքն հանդերձեցին
Մառաններուն և սիրտերուս:
Օրո՛ր ոսկի տերևներուն,
Մերկ հողերուն,
Կմախք դարձած անտառներուն,
Անոնք բոլոր,
Թուխս են նստեր վաղվան հույսով:

Թող չբռնակի տատաակ, դժնիկ
Հողերուդ քու, այգին իմ նոր,
Ու վրայեդ թևը չանցնի
Թռչունին սև,
Եվ վաղը երբ մեկ հնձանին
Մեջ ձմվին
Բարիքն անուշ մեր արևին
Եվ հողերուն, փրփուր փրփուր,
Բացվի պիտի երգն աղամանդ,
Այգիներեն խրճիթներու,
Խրճիթներեն պալատներու:

Հոս ես ահա, այգին իմ նոր,
Ավերին դեմ հավարամյա
Մեր աշխարհին,
Եվ իմ քաղցրիկ մամի փոխան,
Որ ալ չկա,
Աղջիկ մըն է քաղցրատեսիլ,
Կեցած վմրուխտ օրերուն դեմ,
Անցորդներուն արդ կբաշխե
Բարիքն առատ,
Խնկանման հատիկներով:

Էջմիածի՛ն,
Երկնի վրա ձևված հրաշք,
Չույլ տապանակ, պյուն հրեղեն,

Որուն լույսին նայեցան միշտ
Աչքերն ուրախ, աչքեր տրտում
Սերունդներու,
Որուն շունչեն ու կրակեն
Առավ մարմին
Մեր դարերու հրաշքը սուրբ,
Աստվածաշունչ,
Մագաղաթ, երգ ու շարական,
Կանթեղին տակ Լուսավորչին:


Սարդարապա՛տ, հաղթության պատ,
Հողասկիի մը սրբապան,
Մարմին հայուն, նշխար ընտիր,
Արյուն գինի,
Պատարագին պլատոնության:

Դարեր կանցնին,
Բայց կմնա հուշարձանն այն,
Անպարագիծ և անսահման,
Կերտված քար քար
Ոսկորներեն հերոսներուն,
Հավատքեն սուրբ մեր մայրերուն,
Ճերմակ հույսեն՝
Պարմաններուն և կույսերուն,
Շիրիմին պես Օջականի
Աննիջ Սուրբին,
Էջմիածնի քարի հանգույն,
Արարատի պես անսասան:

Գեղարդն ահա,
Լուսավորչի սուրբ ձեռակերտ,
Որ խավարին դեմ հեթանոս
Վառեց ճրագն քրիստոնյա,
Եվ Գեղարդովն արյունավառ
Փորեց, կոփեց կուրծքը ժայռին,
Կերտեց տաճարն այս արտակարգ,
Իբրև քանդակ ու կաղապար
Մեր հոգիին:

Չանգակներու անձրևին մեջ:
Դրած անտես թագն Աստուծո,
Վանքը կախարդ դեռ կբախե
Գավազանովն աղամանդե,
Երկինքներու կապույտ դրան,
Աղերսելու խաղաղություն
Ու բարություն,
Վրան արյան հեղեղներուն
Մոթ սիրտերուն,
Վրան համայն Հայոց երկրին:





«ՍՈՒՐԲ ԳՐԻԳՈՐԻ ՎԱՐԴԱՊԵՏՈՒԹՅԱՆ» ԱՐՁԱԳԱՆՔԸ (¹)
ԽԱՉՔԱՐԱՅԻՆ ԱՐՎԵՍՏԻ ԽՈՐՀՐԴԱՊԱՇՏՈՒԹՅԱՆ ՄԵՋ

«Սուրբ Գրիգորի վարդապետությունը» հայ եկեղեցական մատենագրության հնագույն և ամենաարժեքավոր աստվածաբանական երկասիրությունն է, որում հստակորեն արտացոլված է հայոց դավանաբանական դիրքորոշումը՝ խարսխված առաքելական ավանդության և Ընդհանրական եկեղեցու գաղափարայնության վրա: «Վարդապետությունը» կապվում է Ագաթանգեղոսի «Պատմության» երկրորդ գիրքը², Վենետիկում առաջին («Վարք և պատմություն սրբոյն Գրիգորի») և երրորդ («Դարձ փրկութեան աշխարհիս Հայաստան») գրքերի միջև: Հետազոտողների կարծիքները համեմատաբար միասնական են «Վարդապետության» ստեղծման ժամանակի հարցում. հուշարձանի գոյությունը Եդարի կենտրին, ոչ մի կասկած չի հարուցում:

«Վարդապետությունը» ընդգրկում է Հին և Նոր Կտակարանների ողջ բովանդակությունը՝ սկսած արարչագործությունից մինչև առաքելական քարոզությունը: Սակայն այդ հսկայական նյութը ներկայացված է ոչ թե հանգամանալից փոխադրությամբ, այլ միայն հիմնական դրվագներով, որոնց ներհյուսված են հեղինակի գաղափարներն ու դատողությունները աստվածաբանական այս կամ այն հարցի վերաբերյալ: Համեմատաբար հանգամանորեն են արծարծված Երրորդության, ա-

րարչագործության, մարդեղության, առաքելական քարոզության և մեռյալների հարության թեմաները³: Կենտրոնական տեղն զբաղեցնում է մարդեղության խորհրդի լուսաբանությունը (§§ 363—611): Երկասիրության մեջ, սակայն, ներկայացված են Քրիստոսի երկրային տնօրինության ոչ բոլոր կողմերը: Հեղինակի հատուկ ուշադրությանն են արժանացել միայն մկրտության և խաչելության դրվագները:

Խաչելության դրվագի լուսաբանման խընդրում հեղինակին կարծես հետաքրքրում է ոչ այնքան Քրիստոսի չարչարանքի բուն էության, որքան խաչի խորհրդանշական իմաստի բացահայտումը: Խաչը այդ առումով նախ և առաջ հակադրվում է Բաբելոնի աշտարակին: Եթե վերջինս հանդիսանում է մարդկության բաժանման, լեզուների խառնակության խորհրդանիշը, ապա խաչի միջոցով, ընդհակառակն, բաժանված ազգերն ու լեզուները միավորվում են ճշմարիտ Աստծու ճանաչողությամբ: «Ձի յառաջին աշտարակէն ցրումն եղև, իսկ ի խաչէս՝ ժողով»,—գրում է հեղինակը (§ 629), կամ «Արդ՝ փոխանակ բարձ-

¹ Տե՛ս «Ագաթանգեղայ Պատմություն Հայոց, աշխատությամբ Գ. Տեր-Մկրտչեան եւ Ստ. Կանայեանց, Տփլիս, 1909», § § 259—715:

² «Վարդապետության» հանգամանալից վերլուծությունը տե՛ս Բ. Սարգսյան, Ագաթանգեղոս և իւր բազմադարեան գաղտնիքն, Վենետիկ, 1890, էջ 359—408. R. W. Thomson, The Teaching of Saint Gregory. An Early Armenian Catechism. Translation and Commentary. Cambridge, Massachusetts, 1970, Introduction, p. 1—38.

րաբերձ և վաղաժեռ աշտարակին՝ խաչն ճըմարտութեան կանգնեցաւ, որոյ պօրութիւնն սշտնջենական է, և փառք նորա Աստուած» (§ 581): Բաբելոնի աշտարակաշինությունից հետո մարդկությունը բաժանվեց 72 ազգերի՝ առաջնորդվելով նույնքան թվով նահապետների կողմից. «Եթեանասուն և երկու նահապետք լեզուաց կացեալ՝ բաժանեցան ընդ երկիր, հաստատեալք յիրաքանչիւր սահմանս» (§ 579): Իսկ խաչելությունից հետո մարդկությունը միավորվեց 72 առաքյալների գործունեության շնորհիվ. «Որ և ըստ առաջին լեզուացն բաժանելոց ամենայն ազգաց, երեւոցեալ եթեանասուն և երկուս, որպէս յա-

ռաջագոյն քան վայս ասացաք. զի նոքօք ի միաբանութիւն վառաջին պատառումս ապացն և լեզուացն ժողովեացե» (§ 612):

Բաբելոնի աշտարակի՝ որպէս մարդկության բաժանման և խաչի՝ որպէս համախըմքման խորհրդանշական բացատրությունը «Սուրբ Գրիգորի վարդապետության» հեղինակը, ամենայն հավանականությամբ, քաղել է «Վարդապետություն առաքելոց» անվավեր գրվածքից, որը հայերեն է թարգմանվել ասորերենից Ե դարի առաջին կեսին: Կարելի է մատնանշել նույնիսկ բնագրերի կապը հաստատող բառացի ընդհանրության մի դեպք.

Վարդապետություն առաքելոց

որպէս յաշտարակէն ցրումն նոյնպէս ի խաչէն ժողովումն³.

Վարդապետություն Ս. Գրիգորի

զի յառաջին աշտարակէն ցրումն եղև, իսկ ի խաչէս՝ ժողով (§ 629)

Բացի նշված բովանդակությունից, խաչը, ըստ «Սուրբ Գրիգորի վարդապետության» հեղինակի, խորհրդանշում է նաև սուրբ սեղանի չորս անկյունները, որոնցից յուրաքանչյուրը ցույց է տալիս երկրի չորս ծագերից մեկը: Մյուս կողմից, երկրի վրա կանգնեցված խաչի ստորին կողմը խորհրդանշում է Տիրոջ ոտնակոխության տեղը, այսինքն՝ Եկեղեցու հիմքի հաստատությունը: Խաչի վերին կատարը ցույց է տալիս աստվածային բնությունը՝ մարմնավորված Քրիստոսի գլխի պատկերում: Աջ թևը խորհրդանշում է աջ բազկի պորությունը, որն ուրախություն է պարգևում արուարներին, իսկ ձախը մատնանշում է մեղավորների տանջանքները: Այս մտքերը բնագրում շարադրված են հետևյալ հաջորդականությամբ.

«§ 488. Երթայ այնուհետև Քրիստոս ընդ երեկս ատուրն միաշաբաթուն՝ երևել աշակերտացն դոքն փակելովք, ասէ տետարանագիրն. և տուեալ վկենդանարար ողջոյնն, և լապում ուրախութիւն աշակերտացն արարեալ: Անդ կատարէր նուագ սաղմոսարանին, թէ «Տէր Աստուած մեր երևեցաւ մեզ. արարէ՛ք տօնս ուրախութեան կանխաւ մինչև յանկինս սեղանոյ»: Եւ զի՛նչ իցեն անկինք սեղանոյն՝ եթէ ոչ զխաչն նշանակէ, որ և անկինս իսկ ցուցանէ խաչին չորս:

§ 489. Մինն ընդ երկիր ցցեալ, զի յայտնեացէ ղնել զՏեան գարշապարսն յերկրի. զի ի վերայ վիմին հաստատութեան շինեացէ

դիցէ պարճութիւն հիմանց եկեղեցոյ. որպէս և մարգարէն գուշակեաց, թէ «Ի վերայ վիմին կացոյց զիս Տէր, զի անշարժ առնիցէ»: Իսկ զբուն անկինն՝ վկատարն ի վեր ուղղեալ, զի այն անկինն (որ ի վեր կոյս ուղղեալ է իբրև վկշռումս սահմանի, զբնութիւն այնորիկ, որ ի նորայն ի վերայ բազմեցաւ՝ ի վեր կոյս հատանիցէ և անդր հայեցուցեալ զտեսողսն, ի Հայրն ի գլուխն Քրիստոսի, և զբնութիւնն ցուցանիցէ: Իսկ աշ անկինն՝ ցուցանէ զպօրութիւն աշոյ բազկի. աշովն զուրախութիւն արդարոցն զուրախութեան՝ պարգևացն պատրաստելոց պսակացն զարդուն ցուցանէ: Իսկ ահեակ անկինն՝ զտանջանսն նշմարեցուցանէ զմեղաւորացն:

§ 490. Վասն զի ունի սեղանն չորս անկինս, որ է խաչն. և յիրաւի սեղան, զի եղև վերընկալ տերունական մարմնոյն ճշմարիտ պատարագին որ մատեաւ Հօր: Յիրաւի և չորս անկինս ասէ, զի ուղղեցի ընդ չորս անկինս ամենայն երկրի, և զամենայն տիեզերս ուրախ արացս յայսմ սեղանոյ, զերկնաւորս և զերկրաւորս, և զսանդարամետականսն, և զհիմնացեալսն, որ են առաքեալքն և մարգարէքն: Եւ զերկնաւորսն՝ զիրեշտակս, զպօրսն հոգեղէնս. որոց կարի իսկ ուրախութիւն եղև և յինի ընդ անկարծակամ դարձ կենացն: Եւ մարդիկ իսկ երկրաւորք՝ որ կեցին և դարձան առ Տէր. և դուք արդ կամիք կեալ այցելութեամբն Քրիստոսի: Եւ սանդարամետականքն ննջեցեալքն, զորս փրկեաց զալստեամբն իւրով: Քանզի խաչն, որ կանգնականն՝ պաղթականն ցուցանէ, վերնանկինն պաղթութիւնն ցուցանէ»:

³ Տե՛ս «Կանոնագիրք Հայոց», հատ. Ա, աշխատասիրությամբ Վազգեն Հակոբյանի, Երևան, 1964, էջ 63:

Թարգմանություն⁴.

«§ 488. Այնուհետև գնում է Քրիստոսը միաշաբաթ (կիրակի) օրվա երեկոյան և երեւում աշակերտներին փակ դռներից ներս, ինչպես ասում է ավետարանագիրը: Եվ տվեց նա կենդանարար ողջույնը և աշակերտներին բազում ուրախություն պատճառեց: Ապա կատարեց Սաղմոսարանի նվազը (երգը), թե «մեր Տեր Աստվածն երևաց մեզ, ուրախության տոն արեք շատ կանուխ մինչև սեղանի (խորանի) անկյունները»: Եվ ի՞նչ են սեղանի (խորանի) անկյունները, եթե ոչ այն, որ դա նշանակում է խաչը, որը չորս անկյուններ է ցույց տալիս:

§ 489. [Անկյուններից] մեկը ցցեց երկրի վրա, որպեսզի ցույց տա Տիրոջ զարջապարը երկրի վրա դնելը, որպեսզի հաստատուն վեմի վրա շինի ու դնի եկեղեցու հիմքերի բարձրությունը: Ինչպես և մարգարեն է գուշակել, թե «Տերն ինձ կանգնեցրեց վեմի վրա, որպեսզի անշարժ դարձնի»: Ապա բուն անկյունը՝ կատարը վեր ուղղեց, որպեսզի այդ վեր ուղղված անկյունը որպես հավասարակշռություն, դեպի վեր բարձրացնի ներանց բնությունը, որոնք նրա վրա հենվեցին, և այսպիսով տեսնողները տեսնեն Հորը, Քրիստոսի գլուխը և ցույց տան նրա բնությունը: Իսկ աջ անկյունը ցույց է տալիս աջ բազկի պորությունը, աջով ցույց է տալիս արդարների վվարթության ուրախությունը, պատրաստված պարզաները, պսակների վարդաբանքը: Իսկ ձախ անկյունը ցույց է տալիս մեղավորների տանջանքները:

§ 490. Քանզի սեղանը (խորանը) չորս անկյուն ունի, որը հենց խաչն է, և դա իրոք սեղան է, քանզի նա ստացավ տերունական մարմնի ճշմարիտ պատարագը, որը Հորն էր մատուցված: Հիրավի նա չորս անկյուն է հիշում, որպեսզի ամբողջ երկրի չորս անկյուններին ուղղի և ուրախանա այս սեղանից ամենայն տիեզերքը՝ երկնավորները և երկրավորները, սանդարամետականները և հիմնացյալները, որոնք առաքյալներն են ու մարգարեները: Երկնավորները հրեշտակներն են, հոգեղեն վորքը, որը շատ ուրախություն է ունեցել և ունենում է կյանքի անկասկած վերադարձին: Իսկ մարդիկ են երկրավորները, որոնք ապրում էին և դարձան Տիրոջը և դուք արդ կամենում եք ապրել Քրիստոսի այցելությամբ: Սանդարամետականները ննջեցյալներն են, որոնց փրկեց իր գալստյամբ: Քանզի խաչը, որը կանգնեցված

է, ցույց է տալիս հաղթականին, իսկ վերնանկյունը ցույց է տալիս հաղթությունը»:

Ինչպես տեսնում ենք, «Սուրբ Գրիգորի վարդապետությունը» մեզ է ներկայացնում խաչի միջնադարյան խորհրդանշական ըմ-



Եղեգնաձոր, Աղավնաձոր. 1009 թ.

Լ. Ագարյան, Հայկական խաչքարեր (ալբոմ), նկ. 18

բըռնման մի հետաքրքիր նմուշ, որի ուսումնասիրումը թերևս կարող է որոշ նպաստ բերել խաչքարային արվեստի հետ կապված առանձին հարցերի պարզաբանման գործին: Խնդրի գիտական քննությունը թողնելով մասնագետ արվեստաբաններին՝ մենք ուզում ենք ուշադրություն հրավիրել միայն մեկ փաստի վրա: Հետաքրքիր է մասնավորապես այն հարցը, թե այսքան մշակված խորհրդանշական ըմբռնումը, որ ներկայացված է հայ մատենագրության հնագույն և ամենահեղինակավոր հուշարձաններից մեկում, արդյոք որևէ կերպ չի՞ արտացոլվել խաչքարային արվեստում: Այս առումով արժանի է ուշադրության հատկապես «Վարդապետության» ընդգծված հատվածը, որը պատկերագրա-

⁴ Թարգմանությունը տալիս ենք ըստ հետևյալ հրատարակության. Ագաթանգեղոս, Հայոց պատմություն, աշխարհաբար թարգմանությունը և ծանոթագրությունները Արամ Տեր-Ղևոնդյանի, Երևան, 1983:



Ծաղկաձոր, Կեչառիս. 13-րդ դ.

Լ. Ագարյան, Հայկական խաչքարեր (ալբոմ), նկ. 64

կան լայն հնարավորություններ է պարունակում:

Խաչի վերին կատարը Քրիստոսի գլխով խորհրդանշելու հանգամանքը, իհարկե, որևէ խնդիր չի հարուցում և անհրաժեշտություն էլ չկա այն բխեցնելու «Վարդապետությունից», քանի որ խաչի այդ մասը ինքնըստինքյան համապատասխանում է խաչյալի գլխի գրաված դիրքին: Խաչի աջ և ձախ թևերին հատկացված խորհրդանշական բովանդակության մասին նույնպես, փաստերի ներկա դրությամբ, առանձին ասելիք դժվար է գտնել: Իսկ ինչ վերաբերում է խաչի ստորոտի՝ որ-

պես Եկեղեցու հաստատության խորհրդանշի բացատրությանը, ապա այդ գաղափարն, ահա, մեր կարծիքով, դրսևորում է գտել Եղեգնաձորի շրջանի Աղավնաձոր գյուղում կանգնեցված մի հնագույն խաչքարում, որը թվագրված է 1009 թվականով⁵: Դժվար չէ նկատել, որ այդ խաչքարում, որի լուսա-

⁵ Արձանագրությունը՝ ՀԱ[ՅՈՑ] ԹՈՒԱԿԱՆՍ :ՆԾԸ: ՍԱՐԳԻՍ ԵՐԵՑ/ ԿԱՆԳՆԵՑԻ ՍՈՒՐԲ ՆՇԱՆՍ/ ՍՈՒՐԲ ԱԾԱԾԻՆ. տե՛ս «Դիվան հայ վիմագրության», պրակ III, կազմեց Ս. Գ. Բարխուդարյան, Երևան, 1967, էջ 34:

նկարը բերվում է ստորև⁶, խաչը հենված է եկեղեցու, այն էլ հայկական կենտրոնագրմբեյե եկեղեցու ուրվագծի վրա: Պատահական, թե՞ օրինաչափ է այս համապատասխանությունը՝ կպարզվի մասնագիտական ուսումնասիրություններից: Համենայն դեպս համարյա նույն գծագրումը նկատելի է նաև Աղավնաձորի մի այլ խաչքարում⁷ և Ցաղաց Քարի մի խաչքարում⁸:

Թերևս կարելի է խաչքարային արվեստում

զուգահեռ գտնել նաև Բաբելոնի աշտարակի և խաչի խորհրդանշական հակադրության առումով: Նման ենթադրության համար հիմք է տալիս այն հանգամանքը, որ հայկական խաչքարերում լայն տարածում գտած խաչի աստիճանաձև պատվանդանը⁹ ինչ-որ չափով հիշեցնում է Բաբելոնի աշտարակը¹⁰: Ըստ այդմ, կարելի է մտածել, որ այդ տիպի խաչքարերում պատկերված է խաչի հաղթանակը Բաբելոնի աշտարակի նկատմամբ:


⁶ Նկարը պատճենված է Լ. Ազարյանի «Հայկական խաչքարեր» ալբոմից (Մայր Աթոռ Ս. Էջմիածին, 1973 թ.), նկ. 18:


⁷ Նույն տեղում, նկ. 19:

⁸ Նույն տեղում, նկ. 15:

⁹ Հմմտ. Նույն տեղում, նկ. 17, 25, 64, 80—82, 138 և այլն:

¹⁰ Այս միտքը մեզ է հուշել Մաշտոցյան Մատենադարանի աշխատակից, բանասեր-արևելագետ Ն. Գեվորգյանը:





Ս. ԷԶՄԻԱԾՆԻ ԴԵՐԸ ՀԱՅ ՀՆԱՏԻՊ ԳՐՔԻ ՏՊԱԳՐՈՒԹՅԱՆ ԳՈՐԾՈՒՄ

Հայաստանյայց Առաքելական ս. Եկեղեցին իր Մայր Աթոռով, հիմնադրության օրից եղավ ոչ միայն հայ ժողովրդի հոգևոր դաստիարակը, այլև պատմական դժխեմ ճակատագրի լերումով դարձավ նաև հայ գրավոր մշակույթի ստեղծողն ու պահպանողը: Պատահական չէր, որ հինգերորդ դարի լուսաբացին Հայ Եկեղեցին երկնեց հայ գրի երկու երախտավորներին՝ ս. Սահակ հայրապետին և ս. Մեսրոպ մեծ վարդապետին, որոնք նախախընամության կամքով եղան ազգային գրականության և ազգային դպրոցի հիմնադիրները մեր աշխարհում: Նրանց անմահ գյուտի շնորհիվ ազգայնացավ մեր Եկեղեցին, որով վերջնականապես ու մեկընդմիջտ նախագրծվեց Հայոց Առաքելական ս. Եկեղեցու ընթանալիք ճանապարհը: Հայոց Մայր Աթոռ ս. Էջմիածինը, որպես գլուխը համայն հայ եկեղեցիների, եռամեծ իր վարդապետների միջոցով ոչ միայն ստեղծել ու պահպանել է անցյալի հայեցի մեր ողջ մշակույթը, այլև առաջին օրից իր վավակներին ներշնչել է նաև պաշտամունք, հատկապես մայրենի լեզվի, գրի և գրքի նկատմամբ: Մեսրոպատառ գրի և գրքի նկատմամբ պաշտամունքը միջտ էլ եղել ու մնացել է համոզմունք հայ վանականության և ժողովրդի համար: Աշխարհի և մեր ժողովրդի համար բացվեց ԺԵ դարի վարագույրը: Իտալական վերածննդի շրջանում եղան բազմաթիվ գյուտեր ու աշխարհագրական հայտնագործություններ, այդ թվում նաև տպագրության գյուտը, որը տեղի ունեցավ 1440 թվականին Գերմանիայի Մայնց քաղաքում ապրող Յոհան Գուտենբերգի ձեռամբ: Շնորհիվ Եվրոպայի տարբեր երկրներում

րում հաստատված հայ համայնքների, ինչպես նաև այդ երկրների թեմերն այցելող հայրապետական նվիրակների, Մայր Աթոռը մըշտապես շփման մեջ էր Եվրոպայի հետ: Հայոց հայրապետները, մեծապես գնահատելով տպագիր գրքի դրական դերը իր ակնհայտ արժանիքներով, սրտի ցավով հաստատում էին, որ Մայր Հայրենիքում այդ շրջանում տպագրական գործով պթաղվելը անհնարին գործ է: Հենց այս տխուր պարագան հաշվի առնելով՝ ս. Էջմիածինը օրինեց և ողջունեց ԺՁ դարի լուսաբացին, 1512 թվականին, Հայ Եկեղեցու սպասավորներից Հակոբ Մեղապարտի ձեռամբ հեռավոր Վենետիկում տըղված մեսրոպատառ առաջին գրքերը, որոնք պիտի լուսավորեին խավարի մեջ խարխափող մեր երկիրը: Հայ Եկեղեցու պայծառ այս սպասավորի՝ Հակոբ Մեղապարտի կողմից հրատարակած գրքերի շարքը դասավորվում է հետևյալ կերպ.

- 1.—Ուրբաթագիրք
- 2.—Պատարագամատույց
- 3.—Աղթարք
- 4.—Պարզատումար
- 5.—Տաղարան

Դժվար է գերազնահատել հայ գրքատպության գործի բացառիկ նշանակությունը մեր մշակույթի հետագա բուռն զարգացման համար: Սխալված չեմ լինի, եթե ինչ-որ չափով այն համեմատեմ ս. Մեսրոպի անմահ գործի հետ: Ե դարի առաջին քառորդում, երբ մենք դժբախտությունն ունեցանք կորցնելու քաղաքական իշխանությունը, մեր հայրենիքը բաժանվեց հույների ու պարսիկների միջև: Ս. Մեսրոպի հանձարով ստեղծված հայերեն

տառերը ծանրագույն այդ օրերին ազգայնացրին մեր ս. Եկեղեցին՝ նոր շունչ ու կենսունակություն տալով նրան: Բացի այդ, ճակատագրական այդ դարում, բաժանված Հայաստանի տարածքով մեկ բացվեցին բազմաթիվ ազգային դպրոցներ, որոնք մեր սուրբ Եկեղեցու հետ միասին կոչված էին պահելու և ամրապնդելու քաղաքական ու կրոնական տարբեր հայացքներ ու ձգտումներ ունեցող պետությունների գերիջխանության տակ զբոսնելով հայ ժողովրդի միասնությունը: Ժիշտ նույն քաղաքական դժբախտ վիճակի մեջ էր գտնվում մեր ժողովուրդը ԺՁ դարում: Երկբարստն պատերազմներից հետո Հայաստանը ամայացել ու բաժանվել էր մահմեդական էրկու պետությունների՝ շահական Պարսկաստանի և օսմանյան Թուրքիայի միջև: Մայր Աթոռ ս. Էջմիածնի և նրա սրբապան գահակալների ուսերին ծանրանում էր ազգի, Եկեղեցու և հայ դպրոցի ազգային ոգու, միասնության պահպանման ծանր հոգսը: Նվիրական այդ գործերը հաջողությամբ իրականացնելու համար հարկավոր էր վարկ տալ գրքատպության գործին, ավելի շատ մետրոպոլիտան գրքեր ունենալ: Դժբախտաբար Հակոբ Մեղապարտի տպարանը չէր կարող բավարարել հսկայական այն պահանջը, որ պահանջվում էր հայրենիքում, մանավանդ որ այդ տպարանը գոյատևեց ընդամենը մեկ-երկու տարի, որից հետո հայկական տպագրությունը կենդանի դադար ունեցավ:

Երկրորդ հայ տպագրիչը Աբգար Դպիր Թոխատեցին էր, որը իր մասին գրել է «Կղերական եմ և դպիր»¹: 1562 թվականին Աբգար Դպիրը Միքայել Սեբաստացի կաթողիկոսի (կաթողիկոս Ստեփանոս Սալմաստեցի կաթողիկոսին 1547 թվականից) հանձնարարականով երեք հոգուց բաղկացած պատգամավորության գլուխ անցած՝ մեկնում է Եվրոպա Հայաստանի ապատագրության գործով: Դժբախտաբար այդ ուղղությամբ Աբգար Դպիրը որևէ դրական արդյունքի չի հասնում: Հասնելով Վենետիկ՝ նա մոտավորապես մեկ տարի մնում է այնտեղ և ամենայն հավանականությամբ ուսումնասիրում տպագրության գործը: ԺՁ դարի 60-ական թվականներին Վենետիկում գործում էին մոտավորապես 200—250 տպարաններ: Աբգար Դպիրը Վենետիկում մեծ ջրկանքների ու համառ աշխատանքի ջնդիրով ձեռք է բերում տպագրական մեքենաներ ու հայերեն տառեր և կաթոլիկ Եկեղեցու ծայրահեղ խիստ հսկողության տակ, հավատաքնության ու գրաքնն-

ության ներկայացուցիչների աչքի առջև 1565—1566 թթ. հրատարակում է մի տոմարացույց, որը գիտությանը ավելի հայտնի է «Նառնափնթոր տոմար» վերնագրով և մի «Սաղմոսարան»: Այդ ժամանակ կաթոլիկ Եկեղեցու կողմից հալածվում էին ոչ կաթոլիկ բոլոր հրատարակիչները, որոնք պարտավոր էին դրականապես պատասխանել հռոմեական Եկեղեցու հավատաքնության բոլոր հարցերին: Հեռու մնալու համար հավատաքննչական մարմինների սադրանքներից ու հետապնդումից՝ Աբգար Դպիրը տպագրական մեքենաները հետը առած տեղափոխվում է Կ. Պոլիս: Որպես հրատարակիչ, Աբգար Դպիրը առաջինն էր, որ պզգահ հայատառ տպարանը հայկական միջավայր փոխադրելու անհրաժեշտությունը: Ստանալով Լուստանդնուպոլսի հայոց Հակոբ պատրիարքի արտոնությունը՝ նա իր տպարանը հաստատում է ս. Նիկողիանոս Եկեղեցուն կից ջենքերից մեկում: Այսպիսով՝ Աբգար Դպիր միջոցով կատարվեց ևս խոշոր մի քայլ հայատառ տպարանը հայրենիքին էլ ավելի մոտեցնելու գործում: Հնարամիտ, ազնիվ, ազգային մշակույթի նկատմամբ նախանձախնդիր այս մշակը, դժվարին այդ տարիներին, Կ. Պոլսում տպագրում է յոթ-ութ անուն գիրք: Ահա այդ հրատարակությունների ցանկը.

1.—Փոքր քերականություն, 1567—68 թթ.

2.—Տոնացույց, 1568 թ.

3.—Պարզատոմար, 1568 թ.

4.—Աղոթամատույց (Ժամագրքի և Պատարագամատույցի հետ), 1568 թ.

5.—Տաղարան, 1568 թ.

6.—Մաշտոց, հավանական է 1568 թ.²

Փաստորեն Աբգար Դպիր Թոխատեցու տպագրական գործունեությունը լայնորեն կապվում է Մայր Աթոռ ս. Էջմիածնի հետ:

ԺԷ դարի հայկական տպագրության պատմության մեջ անվիճելիորեն իր պատվավոր տեղն ունի եռանդաշատ Մովսես Տաթևացի կաթողիկոսը (1629—1632 թթ.): Լինելով ժամանակի ամենապարզացած եկեղեցականներից մեկը՝ նա հնարավոր բոլոր միջոցներն օգտագործեց ոչ միայն հայ մանուկների համար ամենուրեք դպրոցներ բացելով, այլև գերլարված ջանքեր թափելով լուսավորական աշխատանքը հայ գրքատպության գործին կապելու համար: «Յամենայն տեղիս դասատուն եմ դպրոցս կարգեաց եմ լուսաորեաց պապս Հայոց: Յարածամ ցանկայր տպագրութիւնս, քի առատութենէ գրոց ամենեքեան դիւրաւ վարժէին, սակայն չեղել ձեռ-

¹ Այս մասին տես Հանդես ամսօրեայ, 1912, էջ 387 և Ռ. Իշխանյան, Հայ գրքի պատմ., Եր., 1977, էջ 185:

² Ռ. Իշխանյան, Հայ գրքի պատմ., Եր., 1977, էջ 221:

նահասս Կի փոխեցաւ աստի յանանց կեանս»³։ Հայոց Հայրապետին հայրենասիրական ու լուսավորական իր ծրագրերի իրականացման ճանապարհին գործակից պիտի լինէր ս. Էջմիածնի միաբանությունը, որը Մովսէս Կաթողիկոսի, մանավանդ նրան հաջորդող Փիլիպպոս Աղբակեցի Կաթողիկոսի ժամանակ (1633—1655 թթ.) քանակապես և որակապես շատ բարձր էր։ 1634 թվականին գրված ձեռագրերից մեկի հիշատակարանում կարդում ենք, որ ս. Էջմիածնում այդ շրջանում կար «հարիւր սպասատու գրոց» վարժաւերս եւ հանձարատենչս ի կիրթս հրահանգից դաստիարակեալք եւ տեառն վիճակեալք»⁴։ Հայոց հայրապետի վերահաս մահը և մեր երկրի քաղաքական դաժան պայմանները խանգարեցին հայոց Կաթողիկոսին՝ իրականացնելու Մայր Աթոռում տպարան ունենալու ծրագիրը։ Բարեբախտաբար Մովսէս Կաթողիկոսը միջոցներ գտավ օտար ավերում տպվող հայատառ գրքերը առատապես հայրենիք բերելու՝ դրանով իսկ մեծապես օգնելով Մայր Աթոռի «գրոց սպասավորներին» խորանալու կրօնական, դավանաբանական և փիլիսոփայական գրականության մեջ։ Մովսէս Կաթողիկոսի անկատար մնացած երապը 1638 թվականին իրականացրեց իր շնչով ու հոգով դաստիարակված Մայր Աթոռի մեկ ուրիշ միաբան՝ Խաչատուր վրդ. Կեսարացին։ Եռամեծ այս վարդապետը 1620 թվականին, Նշանակվելով Նոր Զուղայի առաջնորդ, իր մի քանի աշակերտների հետ միասին Ամենափրկչյան վանքում ծավալում է հսկայական աշխատանք։ Նոր Զուղայում Կեսարացի վարդապետի ջանքերով բացվում է հոգևոր դըպրոց, որը հաճախ հիշվում է նաև որպես համալսարան։ 1638 թվականին նա գլուխ է բերում նաև մի այնպիսի գործ, որը, ինչպես ասումքս Լեոն է ասում, «ավելի հրաշքի էր նման»։ Չգալու համար «հրաշքին» համապարհ նրա հիմնադրած տպարանի արժեքը, պետք է պատկերացնել ԺԷ դարի հետամնաց ավատատիրական Պարսկաստանը։ Հաշվի չառնելով ոչ մի դժվարություն, առանց Եվրոպան և Գոտենմբերգի տպագրական մեքենաները տեսնելու, մեղմաշան աշխատանքի ջնորհիվ Խաչատուր վրդ. Կեսարացին և իր գործակիցները Ամենափրկչյան վանքի իրենց խուցերում փորագրում են հայերեն տառեր, շինում մամուլներ և երկար նախապատրաս-

տական աշխատանքից հետո 1638 թվականի մի գեղեցիկ առավոտ լույս աշխարհ են բերում իրենց ինքնաշեն տպարանի երախայրիքը՝ «Սաղմոսարան»-ը։ Այդ մասին Խաչատուր վրդ. Կեսարացին, մեծարելով իր ուսուցչին՝ Մովսէս Տաթևացի հայրապետին, գրում է. «...Եւ յաջորդեաց պաթոս նորա Տէր Փիլիպպոս ձեռնասուն աշակերտ իւր։ Եւ յաւուրս սորա եղև տպագրութիւնս ի քաղաքս Շոշ յանապատն Զուղայոյ, ի թոխն ՌԶԵԱ 1638 ձեռամբ նուաստ Խաչատուր վարդապետի Կեսարացոյ, որ տարի մի է եւ հինգ ամիս, որ Վցայգ եւ Վցերեկ անդադար աշխատիմք հանդերձ միաբան ուխտիւ, Կի ոչ էմք տեսեալ ի վարպետէ եւ ոչ ունիմք ուսուցիչ, բայց միայն Վճոգին սուրբ եւ Վիդա եւ Վլենդանի աղօթս հոգեւոր հօրն մերոյ գնացեալ առ Տէր»⁵։ Ճիշտ է, Նոր Զուղայի տպարանի մամուլիչների տակից դուրս եկած առաջին գիրքը անսահման ուրախության հետ նրա հրատարակիչներին մեծ մտահոգություն էլ բերեց, քանզի ինքնաշեն այդ տպարանի անդրանիկ հրատարակությունը ուներ տպագրական բավական թերություններ։ Անկեղծ ոգևորությամբ սկսված հրատարակչական գործը կատարյալ դարձնելու նպատակով Խաչատուր վրդ. Կեսարացին Եվրոպա է ուղարկում իր աշակերտներից Հովհաննես վրդ. Զուղայեցուն։ Ինքը չսպասելով Հովհաննես վարդապետին՝ նույն ջանասիրությամբ շարունակում է գրքեր տպելու գործը։ 1638 թվականից մինչև 1647 թվականը Նոր Զուղայում տպվում են՝

- 1.—Սաղմոսարան, 1638 թ.
- 2.—Հարանց վարք, 1641 թ.
- 3.—Խորհրդատետր, 1641 թ.
- 4.—Առենի ժամագիրք, 1642 թ.

Թեև այս հրատարակությունները պոլիգրաֆիական տեսակետից շատ պարզունակ էին և ոչ կատարյալ, բայց մեզ համար շատ թանկ են նրանք, որովհետև գալիս են հաստատելու հրատարակիչների ինքնամոռաց և անմտացորդ սերն ու պաշտամունքը հայ մշակույթի և այն ստեղծող բազմաբազմաբար ու բազմաչափ մեր ժողովրդի նկատմամբ։ Խաչատուր վրդ. Կեսարացին և իր աշակերտները, առանց վախենալու անհաղթահարելի թվացող դժվարություններից, ձեռք են վարում Աստվածաշունչ մատյանի նման մի բարդ ու դժվարին հրատարակություն գլուխ բերելու գործին։ Մայր Աթոռը ուշի-ուշով հետևում էր Նոր Զուղայի տպարանի գործունեությանը։ Դժբախտաբար նրա հրատարակություն-

³ Տես Խաչատուր վրդ. Կեսարացու հրատարակած Սաղմոսարանի ինքնատպագրվող, Նոր Զուղա, 1638 թ.։

⁴ ՀՍՍՀ Մատենադարան, ձեռագիր 3480, էջ 262բ։ Այս մասին տես նաև Ա. Հովհաննիսյան, Դավազներ հայ տպագրական մոդի պատմության, հտ. Բ, Եր., 1959, էջ 167։

⁵ Տես Խաչատուր վրդ. Կեսարացու հրատարակած «Սաղմոսարանը», Նոր Զուղա, 1638 թ., Հիշատակարան։

ները իրենց որակով և քանակով չէին կարող բավարարել հայ գրքի նկատմամբ աճող այն պահանջը, որ նկատվում էր Հայաստանում: 1655 թվականին ս. Էջմիածնի հայրապետական գահին «նստալ Յակոբ Ջուղայեցին, այր սուրբ եւ ընտրեալ յար եւ նման մեծին Մովսէսի եւ Փիլիպպոսի»⁶: Հակոբ Ջուղայեցի կաթողիկոսը ժամանակակիցների կողմից ճանաչված էր որպես անապատական շարժման ընդերքից ելած եկեղեցական ամենակարևոր դեմքերից մեկը, որոնց գործունեությունը Հայոց եկեղեցու դավանաբանության անաղարտությունը պահպանելուց զատ կոչված էր գլխավորելու կրթական, գրահրատարակչական և լուսավորական գործը: Հակոբ Ջուղայեցի կաթողիկոսը Մայր Աթոռում ուներ երևելի եկեղեցականների մի մեծ խումբ, որոնց Ստեփանոս Լեհացի վարդապետը հենակա կերպ է բնորոշում: «Երևելի վարդապետք քաջաբանք բանաստեղծք աստուածային գրոց, քաջ գիտունք եւ հմուտք,—որոնց թվում էր մեծահամբավ պատմաբան Առաքել վրդ. Դավրիժեցին,—քաջ ռաբունի եւ վիպասան, որ ժամանակագրությունս հայրապետաց եւ թագաւորաց գեղեցկայարմար բանիւք դրոշմեաց»⁷: ԺԷ դարի ժամանակագիրներից Դավիթ Բաղիշեցու բնորոշմամբ՝ Հակոբ Ջուղայեցու ժամանակ Մայր Աթոռի միաբանության անդամներից շատերը «...սինք եկելեցոյ եւ անօթք Հոգւոյն սրբոյ, անյաղթ փիլիսոփայք»⁸ էին ճանաչված: Հայոց Հայրապետը ընտրության լայն հնարավորություն ուներ այդքան հեղինակավոր միաբանության անդամներից մեկին Եվրոպա ուղարկելու՝ հայ գրքատպության գործով պաշտպանելու համար: 1656 թվականին որոշակի հրատարակչական ծրագրով Եվրոպա է մեկնում Մայր Աթոռի միաբաններից Մատթեոս սրկ. Ծարեցին, որը Փիլիպպոս կաթողիկոսի կոնդակագիրն էր: Մատթեոս սարկավագը մեծ դժվարությունների գնով կարողանում է գլուխ բերել Հայոց կաթողիկոսի հանձնարարությունը՝ Ամստերդամում կազմակերպելով ժամանակակից հրատարակչական պահանջները բավարարող մի տպարան: Սակայն նա մահանում է առանց տեսնելու իր տպարանի երախտիրքը⁹: Բազմաթիվ պատճառներ սպառնում են տպարանի դիմաց գրավել տպարանը: Երջա-

նիկ պատահականությամբ այդ օրերին Ամստերդամում էր գտնվում ոմն հայ առևտրական, Ավետիս Դճենցը, որը Ոսկան վրդ. Երևանցու եղբայրն էր: Տպարանի հետ կապված բոլոր պարտքերը վճարելով՝ Ավետիս Դճենցը տպարանը կոչում է ս. Էջմիածնի և Ուշի գյուղի ս. Սարգիս վանքի անունով, որտեղ այդ ժամանակ վանահայր էր իր եղբայրը՝ Ոսկան վրդ. Երևանցին: Այսպես, պատահականորեն փրկվեց հսկայական դժվարությունների ու տառապանքի գնով ստեղծված ս. Էջմիածնի անունով առաջին տպարանը, որին վիճակված էր այնքան ծավալուն և դրական դեր կատարելու մեսրոպատառ գրքերի բազմացման գործում: Մայր Աթոռի միաբան և Հայոց Հայրապետի ներկայացուցիչ Մատթեոս սրկ. Ծարեցու ձեռքով Ամստերդամում հիմնադրված տպարանը փաստորեն, Մայր Աթոռի և Հայաստանի առաջին տպարանն էր օտար հողում: Ս. Էջմիածնի և Ս. Սարգսի տպարանում 1660—1686 թթ.-ին, շուրջ քսանվեց տարվա ընթացքում, լույս են տեսնում քառասուն անուն հայերեն գրքեր: Մատթեոս սրկ. Ծարեցու մահից հետո Հակոբ Դ Ջուղայեցի կաթողիկոսը տարակուսում է, թե ո՞վ սիսի Ամստերդամում փոխարինի Մատթեոս սարկավագին: Հենց այդ օրերին հայոց Հայրապետը ստանում է Ավետիս Երևանցի Դժենցի նամակը Ոսկան վրդ. Երևանցուն Ամստերդամ ուղարկելու մասին: Առանց երկմտելու կաթողիկոսը համաձայնվում է Ոսկան վարդապետի թեկնածությանը, մանավանդ որ այդ եկեղեցականն ուներ համապատասխան պատրաստություն Ամստերդամում շարունակելու այնքան լավ սկսված տպագրության գործը: «Իսկ վկին Ոսկան վարդապետն՝ որ եւ սա մի իսկ էր ի յիմաստնայեց աշակերտաց տեառն Խաչատրոյ մեծի վարդապետին. ի ժամանակս Յակոբայ Հայրապետի՝ որոյ հրամանաւ գնաց ի յԱմստերդամ... Ուր գնացեալ սա, երջանկափայլ վարդապետն Ոսկան, այնպէս վարմանալի եւ գեղեցկագոյն գիր յօրինեաց, ըստ որում եւ հաւաստեալ յայտնի իսկ է արդինք ի յՈսկան վարդապետի տպեալ Աստուածաշնչոյն, որ գրեթէ ոչ Վանանդեցոյնն, ոչ Մխիթարայ աբբային եւ ոչ Թուրջաճու եւ կամ թէ այլոց գրեանքն կարեն լինել աղախնեայք»¹⁰: Ոսկան վարդապետը մինչև Ամստերդամ մեկնելը նախապես պատրաստում էր Աստվածաշնչի համեմատական բնագիրը՝ Եվրոպայում տպելու համար: Ոսկան Երևանցի վարդապետը ս. Էջմիածնից մեկնեց 1662 թվականին: 1666 թ. իր հրատարակած Աստվածաշնչի

⁶ Դիան հայոց պատմության, գիրք Ժ, Թիֆլիս, 1912, էջ 52:

⁷ Աշ. Հովհաննիսյան, Դրվագներ հայ ազատագր. մղելի պատմ., գիրք Բ., Եր., 1959, էջ 164:

⁸ Դիան հայոց պատմության, գիրք Ժ, Թիֆլիս, 1912, էջ 52:

⁹ Տես Գարեգին Առնյան, Հայ գիրքը և տպագրության արվեստը, Եր., 1958, էջ 99:

¹⁰ Խաչատուր Աբեղայի Ջուղայեցու, Պատմ. Պարսից, Վաղարշապատ, 1905, էջ 121—122:

հիշատակարանում այդ առթիվ գրում է. «Ելեալ յերկրէ եւ յագգէ իմմէ, դիմեցի ի կողմանս Երուսիոյ յաղագս տպման մատենիս այսորիկ»: Ոսկան վարդապետը Ամստերդամ մեկնելու ճանապարհին հասցրեց բանակցել մի քանի հայ վաճառականների հետ, որոնք խոստացան իրենց նյութական օժանդակությունը, եթե տպագրությունից ստացված օգուտները տրամադրվեն Մայր Աթոռին, Երուսաղեմի հայոց պատրիարքարանին և ս. Սարգիս վանքին: Ոսկան վարդապետը, Ամստերդամ հասնելով, իր գործընկերների հետ մի քանի հայերեն գրքեր ևս տպեց (Շարակնոց, 1664—65 թթ., իր հեղինակած Քերականությունը, 1666 թ.), որոնք մի տեսակ փորձնական հրատարակություններ էին՝ նախապատրաստվելու համար Աստվածաշունչ մատյանի չքնադ աշխատարկությունը, որը տպագրական տեսակետից աննախադեպ մի երևույթ էր հայ իրականության մեջ: Ս. Էջմիածնի տպարանը Ոսկան վարդապետը Ամստերդամում պահեց մինչև 1669 թվականը: Աստվածաշունչի հրատարակությունից հետո Ամստերդամում երեք տարվա ընթացքում հրատարակիչ վարդապետը հասցնում է հրատարակել 11 անուն գրքեր ևս: Դրանք են՝ Գիրք աղօթից (1667 թ.), Աղօթամատուց (1667 թ.), Գիրք ս. Մաշտոցայ վրդ.-ի, Մաշտոց (1667 թ.), Վարդապետութիւն քրիստոնէական (1667 թ.), Նոր Կտակարան (1668 թ.), Տօմարաց գիրք (1668 թ.), Աղուեսագիրք (1668 թ.), Առաքել վրդ. Դավրիժեցի (1669 թ.), Տօնացոյց՝ երկու հրատարակություն (1669 թ.):

Այնուհետև սկսվում է Ոսկան Երևանցու տպարանի ողյսականը: Այն փոխադրվում է Լիվոնո, այնուհետև՝ Մարսել:

Դժվար է գերազնահատել ս. Էջմիածնի անունը կրող տպարանի կատարած դրական ծառայությունները հայ տպագրության գործին: Ամփոփելով՝ ասենք, որ Ոսկան վարդապետը իր նվիրյալ գործունեությամբ մի նոր բարձունքի հասցրեց հայ տպագրության գործը: Ս. Էջմիածնի տպարանը Ոսկան վարդապետի ջանքերով առաջին հայ տպարանն էր փաստորեն, որ անընդմեջ գործեց շուրջ քառորդ դար՝ տալով շուրջ քառասուն անուն շատ կարևոր հրատարակություններ: Հետագա մեր տպագրիչների համար այս տպարանի հրատարակությունները դարձան ուղեցույց, որից սովորեցին հայ գիրքը գեղեցիկ տառերով և լավ ձևավորված վիճակում ժողովրդին հասցնելը: Ոսկան վարդապետն էր, որ գրքերի տպաքանակը 500-ից բարձրացրեց 3000-ի: Այս տպարանն էր, որ հրատարակեց ժամանակակից հեղինակների գործերը, որով ընթերցողները ավելի մոտ էին կանգնում ժա-

մանակակից հասարակական կյանքին: Վերջապես, այս տպարանն էր, որ առաջինը անփորձարձավ գրքերը նոր գրական հայերենով լույս ընծայելու կարևոր գործին:

Ոսկան վարդապետի մահից հետո ս. Էջմիածնի տպարանը Մարսելում դադարեցրեց իր գործունեությունը: Նրա աշակերտներից Մկրտիչը 1676 թվականին Չմյուռնիայում հիմնադրեց մի տպարան, որը նույնպես կոչվում էր ս. Էջմիածնի և ս. Սարգիս անուններով: Մատթեոս Վանանդեցին, որը Ոսկան վարդապետի աշակերտներից էր, իր մի քանի ազգականների հետ 1685 թվականին Ամստերդամում հիմնադրեց արդիական մի տպարան: Փաստորեն ս. Էջմիածնի տպարանից ձյուղավորվեցին երկու տպարաններ, որոնցից հատկապես Վանանդեցիներինը հսկայական հրատարակչական գործունեություն ծավալեց: Վանանդեցիները կատարելագործելով հրատարակչական գործը՝ այն բարձրացրին մի աստիճանով ևս: Նրանք էին, որ 1695 թվականին հրատարակեցին «Աշխարհացոյցը»: Վանանդեցիների տպարանը Ամստերդամում գոյատևում է մինչև 1717 թվականը, որից հետո պարտատերերը բռնագրավում են այն:

ԺԸ դարի սկզբից հայ տպագրիչների մոտ նկատվում է հայրենիքին էլ ավելի մոտենալու ձգտում: Հայ տպագրիչները հատկապես հաստատվում են Պոլսում, որտեղ, մինչև 1800 թվականը, տարբեր տպարաններում հրատարակվում են շուրջ 300 անուն հայերեն գրքեր¹¹: Հայ տպագրությունը հրատարակված գրքերի այս քանակով արձանագրում էր իր հերթական հաղթանակը՝ նպաստելով նաև հայ մշակույթի գանձարանում ձեռագիր վիճակում պահվող ազգային ու համաշխարհային արժեքները լույս աշխարհի հանելուն: Տպագրված հայերեն գրքերը պիտի օգնեին Մայր Աթոռին աշխարհասփյուռ մեր ժողովրդի հատվածներին էլ ավելի ամուր կապելու իր բուն արմատներին, ներարկելու նրա մեջ ազգային կենսարան այն ավիշը, որն ընդունակ էր ապահովելու բացառապես միայն մեքրոպատառ գիրքը:

Ժամանակագրական կարգով՝ հերթը Մայր Աթոռի տպարանին է: Խախտելով ավանդական կարգը, մի քանի խոսքով ներկայացնենք Ռուսաստանի հայ գաղթօջախում ԺԸ դարի այն տպարանները, որոնց հիմնադրումը և ողջ գործունեությունը կապված է Մայր Աթոռ ս. Էջմիածնի հետ: Ռուսաստանում առաջին հայկական տպարանը հիմնադրել է Նոր Զուղայեցի Գրիգոր Խալդարյանը, որը

¹¹ Տես Բ. Կորկոտյանի «Հայ տպագիր գիրքը Կ. Պոլսում, 1567—1850 թթ.», Եր., 1964:

առևտրական գրասենյակ ուներ Լոնդոնում: Նա իր խնայողությունների հաջմին Լոնդոնում հիմնում է հայկական տպարան: Առաջին գիրքը՝ «Դասանություն հալատոյ Հայաստանայց» հրատարակելուց հետո, 1780 թվականին, ստանալով Ռուսաստանի հայոց բազմաթիվ առաջնորդ Հովսեփ արքեպիսկոպոս Արղությանի սիրալիր հրավերը, 1781 թվականին տեղափոխվում է Պետերբուրգ՝ դառնալով Ռուսաստանում հայկական առաջին տպարանի հիմնադիր: Բոլորովին չնսեմացնելով Գրիգոր Խալաթյանի կատարած գործի մեծ կարևորությունը Ռուսաստանում հայկական առաջին տպարանի հիմնադրության գործում, սխալված չենք լինի, եթե հիմնադրի պատիվը տանք նաև Սիմեոն կաթողիկոսի աջակցությամբ Հովսեփ արքեպիսկոպոս Արղությանին, որը, օգտագործելով իր հսկայական հեղինակությունը, առաջին օրից բալոյապես և նյութապես պորավիզ կանգնեց Խալաթյան գրահրատարակչին: Այս տպարանը Պետերբուրգում իր գոյությունը պահեց ընդամենը ութ տարի, բայց այդ կարճ ժամանակամիջոցում Հովսեփ արքեպիսկոպոսի հրամանով, բացի կրոնական, թարգմանական գրականությունից, հասցրեց հրատարակել նաև մեր հին և միջնադարյան հեղինակների՝ Եղիշեի, Ներսես Շնորհալու և այլոց գործերը: Դժբախտաբար, ինչպես հայկական մյուս տպարանները, Խալաթյանի տպարանը նույնպես շուտով հսկայական պարտքերի տակ ընկավ: Տպարանը հայկական համայնքը պիտի կորցներ, եթե չլիներ ռուսահայոց հոգևոր առաջնորդի նյութական մեծ օժանդակությունը: Աստրախանի հայոց նյութական օգնությամբ Հովսեփ արքեպիսկոպոսը տպարանը փրկեց պարտատերերից և Գր. Խալաթյանին առաջարկեց վերջնականապես այն փոխադրել Նոր Նախիջևան: Մինչ վերջինս պատրաստվում էր կատարելու իր մեծ բարերարի ցանկությունը, Պետերբուրգում հիվանդացավ և մահացավ: Հիմնադրի մահից քիչ անց Պետերբուրգից տպարանը փոխադրվեց Նոր Նախիջևանի ու Խաչ վանքը: Հովսեփ արքեպիսկոպոսը, լինելով իր ժամանակի ամենաազդեցիկ կրոնական ու քաղաքական գործիչներից մեկը, չէր կարող աչքաթող անել լուսավորության ու մշակույթի տարածման այդ մեծագույն գործունեությանը: Նա մտադիր էր ու Ղազարի վենետիկյան միաբանության օրինակով իր հիմնադրած Նոր Նախիջևանի ու Խաչ վանքը դարձնել լուսավորության և մշակույթի կենտրոն: 1789 թվականին Խալաթյանի տպարանը հաստատվեց Նոր Նախիջևանում և կոչվեց Արղության արքեպիսկոպոսի անունով: Ժրաջան այս մեծ եկեղեցականը առաջին հերթին

տպարանը ապահովեց տնտեսապես: Նա մարդիկ և կոչեր ուղարկեց ամենուրեք, մինչև անգամ Հնդկաստան: Նրա կոչերին հընդկահայ մեծահարուստներ Մասեհ Բաբաջանյանը, Եղիա մահտեսի Հակոբյանը և ուրիշներ պատասխանեցին իրենց առատաբերությամբ նվիրատվություններով և կտակներով: Նոր Նախիջևանի ու Խաչ վանքի տպարանը իր գոյության ընթացքում ունեցավ բազմաթիվ օգտակար հրատարակություններ: Վստահորեն կարելի է ասել, որ 1781 թվականի Պետերբուրգի առաջին տպարանը, որ 1789 թվականին տեղափոխվեց Նոր Նախիջևան, ԺԸ դարի Արևելյան Հայաստանի հայության համար միակ լուսավոր երևույթը դարձավ 1771 թվականին Մայր Աթոռում հիմնադրված տպարանից հետո:

Հայ գրքի տպագրությունը սկսվելով և ճյուղավորվեց Հայրենիքից հեռու, օտար ավերում: Մայր Աթոռը հենց սկսվեց հանդես բերեց գործնական հետաքրքրություն հայ գրքի տպագրության գործում և ջանքեր չըթանայեց իր ներկայացուցիչների միջոցով կատարելության հասցնելու այն: Ս. Էջմիածինը, մտահոգված իր վավականների լուսավորության և հայ մշակույթի պարզացման գործով, սիտանական կազմակերպչական աշխատանք տարավ Եվրոպայի գանապան քաղաքներում իր հոգևոր ու աշխարհիկ ներկայացուցիչների անջափախնդիր աշխատանքով հրատարակված հայերեն գրքերը հայրենիք փոխադրելու՝ դրանով իսկ նախադրյալներ ստեղծելով հայրենիքում նոր դպրոցների և ապգի լուսավորության նոր կենտրոնների հիմնադրության համար: Տպագրված գրքերի առատությունը նպաստեց նաև Հայոց Եկեղեցու և ի մասնավորի ու Էջմիածնի համար լուսամիտ վանականներ պատրաստելու գործին: Մայր Աթոռի դպրոցական, մշակութային և հոգևոր դաստիարակության ծրագրերի իրականացմանը լավագույնս նպաստելու դիտավորությամբ Հակոբ Դ Ջուղայեցի կաթողիկոսը, ինչպես հաստատում է ԺԸ դարի ձեռագրերից մեկի հիշատակարանը, 1668 թվականին ու Էջմիածնում հիմնադրեց տպագիր գրքերի մատենադարան «Ընդ որս և մատենից գումարությունք ի մի ոչ սակաւ և նոցին խոկացողք և ի նոնյս պարապողք յոգնակ հանճարի»¹²:

Մոտավորապես երեք հարյուր տարի (1512—1800) հայրենիքից հեռու, բազում հայորդիների անշահախնդիր աշխատանքի.

¹² Տես Մաշտոցի անվան Մատենադարան, ձեռ. 981, էջ 502ա: Այս մասին տես նաև Աջ. Հովհաննիսյան, Դրվագներ հայ ազատագրական մտքի պատմությունից, հատ. Բ, Եր., 1959 թ., էջ 169:

պրկանքների ու տառապանքի շնորհիվ հնարավոր եղավ հրատարակել շուրջ 1000 անուն հայերեն մատյան: Հասունացել էր հայրենիքում տպագրական մեքենաներ ունենալու խնդիրը: Նախախնամության կամքով 1763 թվականին Լուսավորչի գահին է բազմում Սիմեոն Երևանցի կաթողիկոսը, որին պատկանում է Հայաստանում առաջին տպարանի և թղթի գործարանի հիմնադրի մեծ պատիվը:

Այն, ինչ երեք հարյուր տարիների ընթացքում չհաջողվեց իրագործել նախորդ հայրապետներին, փայլուն կերպով իրականացրեց Սիմեոն Երևանցի կաթողիկոսը, որի մոտ, ինչպես հաստատում է Օրմանյան սրբապանը, «Այդ միտքը հղացած էր, երբ կաթողիկոսանային քսան տարի առաջ, տակավին սարկավազ՝ Հնդկաստանի նվիրակությունը կկատարեր»¹³: Սիմեոն կաթողիկոսը, ստանալով մատրասաբնակ Գրիգոր Միքայելյան Զակիկյանցի նյութական նվիրատվությունը (3106 ոսկի) Մայր Աթոռի բակում կառուցում է հասուն տպարանի շենք: Նորաբաց տպարանը անվանվում է ս. Գրիգոր Լուսավորչի անունով: Քիչ անց մեծանուն հայրապետը կառուցում է նաև թղթի գործարան, որը ողջ Անդրկովկասում առաջինն էր: «Աստուծով հաստատեցաւ տպագրատունս նոր ի նորոյ ի սուրբ Աթոռս Էջմիածին ամենայն պարագայիքն, հոգաբարձութեամբ Տեառն Սիմեոնի Սրբապան Կաթողիկոսին Երեանցոյ, արդիամբ Զուղայեցի եւ Հինդ բնակեալ բարեսլաշտօն Գրիգոր աղային Զաքիկենց ...թուին ՌՄԻ (1771)»: Առաջին գիրքը, որ Մայր Աթոռի տպարանից լույս տեսավ 1771 թվականին, Սիմեոն կաթողիկոսի հեղինակած «Փռքիկ


Տաղարան» գիրքն էր: Մինչև դարի վերջը Մայր Աթոռի տպարանից դուրս եկավ 12 անուն գիրք: Ճիշտ է, համեստ է այս թիվը, բայց դրանով հիմք դրվեց հայրենիքում գլոբալ տպարանի գործի հետագա բուռն զարգացմանը: Ասենք նաև, որ Սիմեոն կաթողիկոսից հետո ս. Էջմիածնի տպարանը մի քանի հայրապետների կողմից նորոգվել է, կամ նոր մեքենաներ են տեղադրվել այնտեղ:

Տպագիր հայ գրքի անցած տատասկոտ, դժվարին, բայց փառքի ճանապարհը, որն սկսվեցավորվեց 1512 թվականին Վենետիկում, հասավ հայրենիք, ս. Էջմիածին 1771 թվականին: Հավետ հարգանքի ու մեծարանքի արժանի համեստ մեր հրատարակիչները, Մայր Աթոռի և նրա գահակալների օրհնությամբ, արին անհնարինը հայ հրատարակչական գործի ծաղկման համար՝ նվիրելով հոգեմաշ այդ աշխատանքին իրենց առողջությունը, նյութական հնարավորությունները, ջատ հաճախ նաև ամենաթանկը՝ կյանքը: Նրանք իրենց հրատարակած մեծուսկառառ գրքերով ոչ միայն նպաստեցին ազգի լուսավորության և մշակույթի զարգացման սրբական գործին, այլև խավարի ու հոգևարքի մեջ գտնվող մեր ժողովրդին ներշնչեցին հավատք իր լուսավոր գալիքի նկատմամբ: Հավերժ փառք անցյալի մեր հրատարակիչներին և հավերժական Մայր Աթոռ ս. Էջմիածնին, որ այնքան իմաստուն կերպով կապակերպեց հայ մշակույթի հոյժ կարևոր այդ բնագավառը՝ հայ հնատիպ գրքի հրատարակության գործը, որը նախադրյալներ ստեղծեց հայ մշակույթի հետագա արագ և բուռն ծաղկման համար:

¹³ Մաղաքիա արքեպիս. Օրմանեան, Ազգապատում, Դեյրուք, 1960, սյունակ 3099:

ԵՂԻՇԵ ԱՎԱԳ ՔԱՀԱՆԱ ՍԱՐԳՍՅԱՆ





ՅԱԼԹԱՅԻ ՀԱՅՈՑ ԵԿԵՂԵՑԻՆ

Յայթա: Առողջարաններով, նավահանգիստով, տուրիզմի խոշոր կենտրոնով հայտնի ծովափնյա այս քաղաքը գտնվում է Ուկրաինական ՍՍՀ Ղրիմ թերակղզու հարավային ծովախորշերից մեկում: Եվ ահա հեռավոր այս անկյունում, որպես հայ հավատացյալ հոգու պայծառ վկայություն, անսասան և կանգուն է մնացել հայկական մի գեղեցկատես եկեղեցի:

Ծովային ճանապարհով Յայթա այցելողի համար անհնար է չնկատել հորիզոնին՝ երկրների ու ծովի կապույտի վրա վեր հառնած հայառձայն եկեղեցին իր երկնապաշտ գմբեթով: Բարձունքին բազմած այս եկեղեցին, թաղված մենության գրկում, որպես հավատքի և հույսի փարոս, իրեն է ձգում բազմաթիվ մարդկանց: Եկեղեցին իր արտաքին տեսքով շատ նման է Էջմիածնի Ս. Հռիփսիմե տաճարին: Այս նմանությունը պատահական չէ, քանի որ այն կրում է Ս. Հռիփսիմե կույսի անունը: Ո՛վ է այս եկեղեցու հիմնադիրը, ինչո՞ւ է այն նման Ս. Հռիփսիմե եկեղեցուն ու կոչվում նրա անունով, և ե՞րբ ու ինչո՞ւ է այստեղ կառուցվել:

Այս բոլորը կապված է մի տխուր պատմության հետ, որը պատահել է դարիս սկզբներին:

Բաքվի հայերից հայտնի արդյունաբերող Պ. Հ. Տեր-Ղուկասյանը (Ղուկասով) ուներ մի դուստր Հռիփսիմե անունով: Աղջիկը հիվանդանում է թոքերի բորբոքումով: Բժիշկների խորհրդով Տեր-Ղուկասյանն իր աղջկան բուժելու նպատակով տանում է Յայթա: Սակայն 1905 թ. դեռատի Հռիփսիմեն մահանում է՝ սգի մեջ թողնելով իր հորը: Վշտերի մեջ թաղված հայրը աղջկան թաղում է Յայթայի ամենաբարձր բլուրներից մեկի վրա:

Տարիներ շարունակ Յայթայում ապրող հայերը բազմաթիվ խնդրագրեր են ուղարկում

Էջմիածին՝ եկեղեցի ունենալու համար: Վերջապես 1904 թ. Ամենայն Հայոց կաթողիկոս Տ. Մկրտիչ Ա Խրիմյանի (1892—1907 թթ.) օրոք, «Սինոդը լսեց Ներքին Գործոց նախարարի գրությունն, որով հայտնում էր Յայթա քաղաքի եկեղեցու շինության համար տրված բարձրագույն թույլտվությունը»¹:


Տեր-Ղուկասյանը սիրելի աղջկա հիշատակը հավերժացնելու նպատակով օգտվում է այս հարմար առիթից և համաձայնության գալով նախաձեռնողների հետ՝ իր ծախսերով 1905—1909 թթ. կառուցել է տալիս Էջմիածնի Սուրբ Հռիփսիմե տաճարի նման մի երկհարկանի դամբարան-եկեղեցի և աղջկա անունով էլ կոչում Ս. Հռիփսիմե:

Եկեղեցու նախագիծը Տեր-Ղուկասյանի հանձնարարությամբ կատարել է հայ անվանի ճարտարապետ Գաբրիել Միքայելի Տեր-Միքայելյանը (1874—1949):

Վերելքը դեպի եկեղեցի սկսվում է բլրի ստորոտից քարե լայն աստիճաններով, որոնց սկզբին, աջ և ձախ կողմերում, կառուցված են երկու մատուռանման գեղեցիկ շինություններ: 128 աստիճաններն ավարտվում են եկեղեցու հարավային ճակատի առջև գտնվող հարթակով, որի ավարտը տանում է դեպի եկեղեցու առաջին հարկը՝ մի հանգրստարան, ուր և գտնվում է վաղամեռիկ Հռիփսիմեի գերեզմանը: Բուն եկեղեցին գրունդվում է երկրորդ հարկում: Հանգստարանի աջ և ձախ կողմերի լայն աստիճանները տանում են երկրորդ հարկ՝ եռակամար թաղածածկ սրահը, որը կցված է եկեղեցու հարավային ճակատին, ուր և գտնվում է գլխավոր մուտքը: Մյուս մուտքը արևմուտքից է: Ճարտարապետ Տեր-Միքայելյանը եկեղեցու կառույցի մեջ «հաշտեցրել է» հայկական-եկե-

¹ «Արարատ» ամսագիր, 1904 թ., էջ 392:

ղեցական շինարարության տարբեր ժամանակաշրջանների կառուցողական ավանդությունները: Այստեղ լայնորեն օգտագործվել են Հաղբառի (10-րդ դար) վարդաքանդակների գեղարվեստական հնարանքները, իսկ



Յալթայի Ս. Հռիփսիմե եկեղեցին

երկհարկ եկեղեցի-դամբարանի միտքը վերցված է Ամաղուի Նորավանք եկեղեցու շինությունից (13-րդ դար):

Յալթայի Ս. Հռիփսիմե եկեղեցու ներքին ձևավորման աշխատանքներին մասնակցել են ճանաչված նկարիչ Վարդգես Սուրենյանցը, քանդակագործներ Տարագրոսը (Տեր-Վարդանյան), Մերկուրովը: Եկեղեցու վարդաքանդակների ընտրությունը կատարել է Վ. Սուրենյանցը՝ ցուցաբերելով բացառիկ ճաշակ: Նա կատարել է նաև ներքին նկարավարողությունը, որոնց ոճավորումը նույնպես փոխ է առնված հին հայկական վարդարվեստից (9—18-րդ դդ.): Գմբեթի որմնավարդերը իրենց բնույթով ու հորինվածքով հիշեցնում են Էջմիածնի Մայր տաճարի գմբեթի նկարավարողությունը (18-րդ դ. 60-ական թթ.):

Եկեղեցու արտաքին տեսքը, դիրքը, ներքին ձևավորումը խաղաղությամբ են համակում այցելողի հոգին՝ նրան տրամադրելով խոկումի և ինքնամոլորման:


Գմբեթի վրա երևում է եկեղեցու միակ արձանագրությունը, որը մեր փրկիչ Հիսուս Բրիստոսի ավետարանական ճշմարտության և փրկարար լույսի պատգամն է. «Գնացե՛ք այսուհետև աշակերտեցե՛ք պամենայն հեթանոսս, մկրտեցե՛ք վնոսա յանուն Հօր և Որդւոյ և Հոգւոյն Սրբոյ: Ուսուցե՛ք նոցա պահել պամենայն որ ինչ պատուիրեցի ձեզ. ահառասիկ ես ընդ ձեզ եմ պամենայն արուրս, մինչև ի կատարած աշխարհի» (Մատթ. ԻԸ 19—20):

Եկեղեցու բակում է գտնվում հայտնի նկարիչ Վարդգես Սուրենյանցի գերեզմանը (նա մահացել է 1921 թ. ապրիլի 6-ին):

«Յիշատակն արդարոց օրհնութեամբ եղիցի...»:

ՍՏԵՓԱՆ ՍԱՐԿԱՎԱԳ ԿԱՐԱՊԵՏՅԱՆ





«ЭЧМИАДЗИН»
ОФИЦИАЛЬНЫЙ ЖУРНАЛ ЭЧМИАДЗИНСКОГО КАТОЛИКОСАТА
(АПРЕЛЬ 1984 г.)

1. Пасхальная проповедь Патриарха и Католикоса всех армян Вазгена I, произнесенная в Кафедральном соборе св. Эчмиадзина, 22 апреля 1984 г. (стр. 3—5).

2. Обмен приветственными телеграммами и посланиями между Его Святейшеством Верховным Патриархом и Католикосом всех армян Вазгеном I и главами братских церквей по случаю праздника чудесного Воскресения Господа нашего Иисуса Христа (стр. 6—8).

3. Поздравительное послание Его Святейшества Вазгена I, адресованное трем иерархическим престолом Армянской церкви, а также всем предстоятелям епархий и церковным общинам, по случаю св. праздника чудесного Воскресения Господа нашего Иисуса Христа (стр. 9—10).

4. Чудесное Воскресение Христово (редакционная статья) (стр. 11—12).

5. Энциклика Его Святейшества Вазгена I о праздновании 100-летия блаженной памяти Нерсеса Варжапетяна, патриарха Константинопольского, 20 апреля 1984 г., № 1249 (стр. 13—14).

6. Св. праздник Воскресения Христова в первопрестольном Эчмиадзине, 22 апреля 1984 г. (стр. 15).

7. Годовщина армянского геноцида в Турции, отмечавшаяся в первопрестольном Эчмиадзине, 24 апреля 1984 г. (стр. 16).

8. Религиозная жизнь (хроника): краткие сообщения о литургиях, проповедях и прочих событиях, имевших место в первопрестольном Эчмиадзине (стр. 17—19).

9. Епископ Аваг Асатуриян—Воспоминание о чудесном воскрешении Лазаря (проповедь)—(стр. 20—22).

10. Проф. Варздат Арутюнян—Начинания в области строительства, предпринятые первопрестольным Эчмиадзином в 1956—1980 гг. в период правления Католикоса всех армян Вазгена I (исследование) (стр. 23—28).

11. Н. Тер-Микаелян—Хримиан Айрик-орел Васпуракана (стр. 29—37).

12. Старший священник Арамаис Мирзаян—Посещение армянской епархии в Австралии архиепископом Сионом Манукяном (стр. 38).

13. Жизнь епархий

а) Вести из армянской епархии в Болгарии (стр. 39).

б) Вести из армянской епархии в Ираке (стр. 40).

14. Международная конференция сторонников мира в Москве, 2—4 апреля 1984 г. (стр. 41).

15. Паргев Шахбазян—Новая книга архимандрита Егише Тертеряна, патриарха Иерусалимского (рецензия)—(стр. 42—46).

16. Л. Тер-Петросян—Влияние памятника «Учение Григория Просветителя» на символику искусства хачкаров (исследование) (стр. 47—51).

17. Старший священник Егише Сарксян—Роль св. Эчмиадзина в деле развития раннего армянского книгопечатания (исследование) (стр. 52—58).

18. Диакон Степан Карапетян—Армянская церковь в Ялте (исследование)—(стр. 59—60).



"ETCHMIADZIN"
OFFICIAL JOURNAL OF HOLY ETCHMIADZIN
(APRIL 1984)

1. The sermon of His Holiness Vasken I, the Catholicos of All Armenians, in the Holy Cathedral during the feast of Easter (22nd April 1984) — (pages 3—5).

2. The cables and letters of greeting exchanged between His Holiness Vasken I, the Catholicos of All Armenians and the spiritual heads of the Sister Churches, on the occasion of the Holy Resurrection (pages 6—8).

3. The congratulatory letters of His Holiness to the three hierarchical Sees of the Armenian Church, all the diocesan primates and church communities, on the occasion of the feast of Holy Resurrection (pages 9—10).

4. The marvelous Resurrection of Christ — (editorial) — (pages 11—12).

The encyclical of His Holiness on the occasion of the 100th anniversary of the death of the blessed memory of Patriarch Nerses Varjabedian of Constantinople. 20th April 1984, № 1249 (pages 13—14).

6. The feast of the Holy Resurrection in the Mother See, 22nd April 1984 (page 15).

7. The anniversary of the 1915 genocide in the Mother See, 24th April 1984 (page 16).

8. Divine liturgy services and sermons delivered in the Holy Cathedral and description of church festivities in the Holy See during the month of April (pages 17—19).

9. Bishop Avak Assadoorian — In memory of the resurrection of Lazarus (sermon) — (pages 20—22).

10. Prof. Vafazdat Harutiunian — The history of the architectural activity of the Holy See of St. Etchmiadzin, during the patriarchate of His Holiness Vasken I, the Catholicos of all Armenians (1956—1980) (study) — (pages 23—28).

11. N. Ter-Mikaelian — Khrimian Hayrik, the Eagle of Vasboorakan (pages 29—37).

12. Archpriest Aramayis Mirzayan — The visit of Archbishop Sion Manoogian to the diocese of the Armenians of Australia (pages 38).

13. **Diocesan life**

a) News from the diocese of the Armenians of Bulgaria (page 39).

b) News from the diocese of the Armenians of Iraq (page 40).

14. International conference of peace in Moscow, during the days of 2—4th April 1984 (page 41).

15. Barkev Shahbazian — The new book of Archbishop Yeghishe Derderian, the Patriarch of Jerusalem (pages 42—46).

16. L. H. Ter-Petrossian — The echo of St. Gregory's doctrine in the art of khatchkars (stone-cross) (study) — (pages 47—51).

17. Archpriest Eghishe Sarkessian — The role of Holy Etchmiadzin in the publication of the old Armenian books (study) — (pages 52—58).

18. Deacon Stepan Karapetian — The Armenian Church of Yalta (study) (pages 59—60).



„ETCHMIADZINE“

ORGANE OFFICIEL DU SAINT-SIEGE D'ETCHMIADZINE
(AVRIL 1984)

1. Homélie de Sa Sainteté Vasken Ier prononcée le 22 avril 1984 dans la cathédrale de Saint-Etchmiadzine à l'occasion de la sainte fête de Pâques (pages 3—5).

2. Echange de télégrammes et de lettres de félicitation entre Sa Sainteté et les chefs spirituels des Eglises sœurs à l'occasion de la fête de la sainte Résurrection de notre Seigneur Jésus-Christ (pages 6—8).

3. Lettres de félicitation de Sa Sainteté adressées aux chefs des trois sièges hiérarchiques, aux prélats diocésains et aux communautés religieuses de l'Eglise apostolique arménienne à l'occasion de la fête pascalle (pages 9—10).

4. „La Résurrection merveilleuse du Christ“ (éditorial)—(pages 11—12).

5. Encyclique № 1249 de Sa Sainteté publiée le 20 avril 1984 à l'occasion du 100e anniversaire du bienheureux Nersès Varjapétian, patriarche des Arméniens de Constantinople (pages 13—14).

6. Le 22 avril, célébration de la fête de la sainte Résurrection au Saint-Siège d'Etchmiadzine (page 15).

7. Le 24 avril, commémoration du 69e anniversaire du génocide de 1915 au Saint-Siège d'Etchmiadzine (page 16).

8. Brèves informations concernant la célébration des saintes messes, les sermons prononcés à cette occasion et d'autres cérémonies religieuses qui ont eu lieu dans la cathédrale de Saint-Etchmiadzine au cours du mois d'avril 1984 (pages 17—19).

9. Evêque Avak Assatourian.—A la mémoire

de la résurrection de Lazare“ (sermon)—(pages 20—22).

10. Prof. Varazdat Haroutiunian— Histoire des travaux de construction réalisés par le Saint-Siège d'Etchmiadzine dans les années 1956—1980, du patriarcat de Sa Sainteté Vasken Ier (suite)—(pages 23—28).

11. N. Ter-Mikaéljan—„Khrimian Haïrik l'aigle de Vaspourakan“ (pages 29—37).

12. Père Aramais Mirzayan—Visite de l'archevêque Sion Manoukian au diocèse des Arméniens d'Australie (page 38).

13. Vie diocésaine:

a) Nouvelles du diocèse des Arméniens de Bulgarie (pages 39).

b) Nouvelles du diocèse des Arméniens d'Iraq (page 40).

14. Conférence internationale pour le maintien de la paix tenue à Moscou du 2 au 4 avril 1984 (page 41).

15. Parkev Chahbazian —Le nouveau livre de l'archevêque Yéghiché Tertérian, patriarche des Arméniens de Jérusalem (compte rendu)— (pages 42—46).

16. L. H. Ter-Pétrossian—L'écho de la „doctrine de saint Grégoire“ dans l'art des khatchkars (étude)—(pages 47—51).

17. Père Yéghiché Sarkisian—Le rôle de Saint-Etchmiadzine dans la publication des anciens livres arméniens (étude)—(pages 52—58).

18. Diacre Stépan Karapétian — L'église arménienne de Yalta (étude)—(pages 59—60).



ԲՈՎԱՆԴԱԿՈՒԹՅՈՒՆ

Ամենայն Հայոց կաթողիկոս Ս. Տ. Վազգեն Ա Հայրապետի պատկական քարտը՝ արտասանված Սուրբ Էջմիածնի Մայր տաճարում	3
Փրկչի հրաշափառ Սուրբ Հարության տոնի առթիվ Ամենայն Հայոց Ծայրագույն Պատրիարք և կաթողիկոս, Նորին Սուրբ Օծություն Ս. Տ. Վազգեն Ա Հայրապետի և թուր եկեղեցիների հոգևոր պետերի միջև փոխանակված ողջույնի հեռագրերն ու գրությունները	6
Ամենայն Հայոց Վեհափառ Հայրապետի շնորհավորական գիրը Փրկչի հրաշափառ Սուրբ Հարության տոնի առթիվ՝ ուղղված Հայաստանյայց եկեղեցու նվիրապետական երեք Աթոռներին, թեմակալ բոլոր առաջնորդներին և եկեղեցական համայնքներին	9
ԽՄԲԱԳՐԱԿԱՆ—Քրիստոսի հրաշափառ Հարությունը	11
ԱՄԵՆԱՅՆ ՀԱՅՈՑ ՎԵՀԱՓԱՌ ՀԱՅՐԱՊԵՏԻ կոնդակը Կոստանդնուպոլսի երջանակահյուստակ Ս. Ներսես Պատրիարք Վարժապետյանի մահվան հարյուրամյակը նշելու մասին	13
Սուրբ Հարության տոնը Մայր Աթոռում	15
Մեծ եղեռնի տարեդարձի նշումը Մայր Աթոռում	16
ՄԱՅՐ ԱԹՈՒՈՒՄ—Եկեղեցական բեմ, լուրեր	17
ԱՎԱԳ ԵՊԻՍԿՈՊՈՍ ԱՍՏՈՒՐՅԱՆ—Հիշատակ Ղազարու հարության	20
ՊՐՈՖ. ՎԱՐԱՋԴԱՏ ՀԱՐՈՒԹՅՈՒՆՅԱՆ—Պատմություն Ս. Էջմիածնի Մայր Աթոռի շինարարական գործունեության Ամենայն Հայոց կաթողիկոս Վազգեն Առաջինի գահակալության օրոք (1956—1980)	23
Ն. ՏԵՐ ՄԻՔԱՅԵԼՅԱՆ—Խրիմյան Հայրիկ Արծիվ Վասպուրականի	29
ԱՐԱՄԱՅԻՍ ԱՎԱԳ ՔԱՀԱՆԱ ՄԻՐՉԱՅԱՆ—Տ. Սիոն արքեպիսկոպոս Մանուկյանի այցելությունը Ավստրալիայի հայոց թեմ	38
Լուրեր բուլղարահայ թեմից	39
Լուրեր Իրաքի հայոց թեմից	40
Խաղաղության միջազգային կոնֆերանս	41
ՊԱՐԳԵՎ ՀԱՀԱՋՅԱՆ—Եղիվարդի նոր գիրքը	42
Լ. Հ. ՏԵՐ-ՊԵՏՐՈՍՅԱՆ—«Սուրբ Գրիգորի վարդապետության» արձագանքը (') խաչքարային արվեստի խորհրդապաշտության մեջ	47
ԵՂԵՑԵ ԱՎԱԳ ՔԱՀԱՆԱ ՍԱՐԳՍՅԱՆ—Ս. Էջմիածնի դերը հայ հնատիպ գրքի տպագրության գործում	52
ՍՏԵՓԱՆ ՍԱՐԿԱՎԱԳ ԿԱՐԱՊԵՏՅԱՆ—Յալթայի հայոց եկեղեցին	59
„Эчмиадзин“ официальный журнал Эчмиадзинского Католикосата	61
„Etchmiadzin“ official journal of Holy Etchmiadzin	62
„Etchmiadzine“ organe officiel du Saint-Siege d'Etchmiadzine	63



**ԽՄԲԱԳՐՈՒԹՅԱՆ ՀԱՍՅԵՆ
ՀԱՅԿԱԿԱՆ ՍՍՀ, ԷՋՄԻԱԾԻՆ
«ԷՋՄԻԱԾԻՆ» ԱՄՍԱԳՐԻ ԽՄԲԱԳՐՈՒԹՅՈՒՆ**

Армянская ССР, Эчмиадзин, Редакция журнала «Эчмиадзин».
Rédaction de la revue «Etchmiadzine», Etchmiadzin. Arménie. URSS

Հանձնված է արտադրության 28.04.1984 թ.: Ստորագրված է տպագրության 29.05.1984 թ.:
Տպագրական 4 մամուլ + 2 ներդիր, թուղթ 60×84¹/₈, պատվեր 376:

Մայր Աթոռ Ս. Էջմիածնի տպարան, 1984 թ.